

მხროშულა მწერლობა

სრულიად საქართველოს მწერალთა კავშირის
ყოველთვიური შუბნალი.

წელიწადი მეორე

რედაქტორი
ნიკოლოზ მიწიუვილი

ნოემბერი — დეკემბერი
ტფილისი — 1927

უ ნ ა ა რ ს ი.

კ რ ო ზ ა.

სტეფან ცვაიგ — კაპიტან სკოტტ. (თარმანი გერმანულიდან გრ. რო-
ბაქიძის).

სერ. კლდიაშვილი — ჭინკა.

როდიონ ქორქია — სამი ყვავილი.

ალ. ქუთათელი — გვალვა.

ნიკოლო მიწიშვილი — ეპოპეია.

ლექსები.

ვარლამ რუხაძე — საუბარი მიწასთან.

ბაჩანა — ლექსები.

ტიციან ტაბიძე — ციკლიდან „მოსკოვი“.

ვალ. გაფრინდაშვილი — შემოდგომა.

ილა მოსაშვილი — უცნობთან.

საფო მგელაძე — * * *

სიმონ წეველი — ნასაკირალი.

ხალხური ზეპირსიტყვიერება.

„თავფარავნელი ჭაბუკი“ — (ჩაწერილი ია კარგარეთელის მიერ).

წერილები.

გერონტი ქიქოძე — უსათაურო შენიშვნები.

ტიციან ტაბიძე — ალ. სუმბათაშვილი.

შალვა რადიანი — დემნა შენგელაიას შესახებ.

ქრისტ. რაჭველიშვილი — მესხეთ-ჯავახეთში.

დოკუმენტები.

ხომლედი — ცხოვრების მოედანზე.

ბიბლიოგრაფია.

გრ. გიორგაძე — სიმ. ხუნდაძე — სოციალიზმის ისტორიისათვის სა-
ქართველოში.

კოკი აბაშიძე — შ. დადიანი: „უბედური რუსი“.

ვ. მ. — სილოვან ხუნდაძე: ქართული მართლწერისა და სწორების
ძირითადი საფუძვლები.

ქრონიკა.

— : —

3 6 9 8 5

სტეფან ცვაიგ

კაპიტანი სკოტს.

(თარგმანი გერმანულიდან გრიგოლ რობაქიძის).

გამოვიდა სტეფან ცვაიგის ახალი წიგნი. „ვარსკვლავთა უამნი კაცობრიობის“ (ხუთი ისტორიული მინიატურა). „კაპიტანი სკოტტ მათ შორის მეხუთეა.

ბრძოლა მიწისათვის.

მეოცე საუკუნე თავს დაჰყურებს უსაიდუმლო სამყაროს. გამოკვლეულია ყოველი მხარე, გადავლილია ყოველი ზღვა. ლადმაფტები, რომლებიც ადამიანთა ერთი დგმის წინ კიდევ თვლემდენ ნეტარ თავისუფალნი უსახელოს წიაღში. დღეს უკვე მონურ ემსახურებთან ევროპას. ნილოსის დიდხანს ძიებულ ნაკადებამდე მისცურავენ გემები. ვიქტორიას ჩქერნი. ნახევარ საუკუნის წინ პირველ ევროპიელის მიერ პირველ ხილულნი. ჰქმნიან მორჩილებით ელექტროს ძალას. სარტყელი ერთადერთ ხელუხებელ მხარის. ტიბეტის, გაწყვეტილია. სიტყვა „Terra incognita“ გადანიშნულია მცოდნე ხელით. მეოცე საუკუნის კაცმა იცის თავის სიცოცხლის ვარსკვლავი. მკვლევარი ნება ეძიებს უკვე ახალ გზას: უნდა ჩაეშვას იგი ზღვათა სიღრმეში ფანტასტიურ ფაუნისაკენ, ან და ავიდეს მალლა დაუბოლოებელ ჰაერში. დარჩა მხოლოდ ცა— და ჰაეროპლანთა ფოლადის მერცხლები. მის შემდეგ, რაც მიწის მკერდი გაიხსნა ახალის ხილვის ნდომის მიმართ და იქცა უსაიდუმლო, მიჰქრიან ჯიბრით მალლა, რათა მიაღწიონ ახალ სიმაღლეს და ახალ სიმორეს.

საქართველოს
ეროვნული
ბიბლიოთეკა

ხოლო ერთმა უკანასკნელმა გამოცანამ დაჰფარა ჩვენს დრომდე ადამიანთა მზერისაგან მიწის ოცხვენა: ორი პატარა ადგილი მისი დაკეპილი და წამებული სხეულის გადაარჩინა მან მის საკუთარ შვილთა ხილვისაგან. სამხრკიდური და ჩრდილოკიდური, ხერხემალი მისი სხეულის, ეს ორი თითქმის უარსო და უგზნეო წერტილი. საცა ათასწლოებით ტრიალობს მისი ღერძი. სამხრკიდური და ჩრდილოკიდური წმინდათ დამალა მიწამ და არ მისცა იგი ბილწს. ყინვის სარები ამართა მან ამ უკანასკნელ საიდუმლოს წინ, მარადი ქარი წამოუყენა წინ მის ხილვის მსურველთ. ყინვა და ბუჭი ჰკედლავენ მთავრულად მისავალს. შიში და საფრხე სიკვდილით აფეთებენ გამბედავებს. თვითონ მზემაც გაკვრით უნდა იხილოს იგი მხოლოდ, ხოლო კაცის თვალმა არაოდეს.

რამოდენიმე ათი წელია. ექსპედიცია მისდევს ექსპედიციას. ვერც ერთი ვერ აღწევს მიზანს. ჯერ კიდევ უპოვნის, განისვენებს სადღაც ყინვის კუბოში ცხედარი უმამაცესის მამაცთა შორის. ცხედარი ანდრეესი. რომელსაც სწაღდა ჰაერბურთით კიდურის გადაფრენა. ხოლო უკან აღარ დაბრუნებულა. ყოველი შემართება ტყდებოდა ყინულის თეთრლესილ ზვავებზე. ათასწლებიდან დღემდე აქ პირს იბურავს მიწა. ყოველთვის გამარჯვებული მის შვილთა ატეხილ ვნების პირისპირ. ქალწულურ და წმინდათ ინახავს იგი თავის ოცხვენას ქვეყნის ახალის ხილვის ნდომისაგან.

მაგრამ ყრმა საუკუნე. მეოცე. ხელებს იშმუშნის უთმენელ. მან გასჭედა ახალი იარაღი ლაბორატორიაში. მონახა ახალი ჯავშანი საფრხის ასაცდენი — და დაბრკოლებანი აღვივებენ მხოლოდ მის წადილს. მას ჰსურს იცოდეს ყოველი ქეშმარიტება. მის პირველ ათწელს უკვე ჰსურს დაიუფლოს ის. რაც მანამდე არ შეეძლო არც ერთ ათასწელს. კერძო პირის შემართებას ერთვის ჯიბრი ერევის. ამიერითგან იბრძვიან ისინი არა მარტო კიდურისათვის: ალამისათვისაც — რომელიც უნდა თავს დაჰფრი-ალებდეს ახალ მხარეს. ჯვაროსანთა დენა რასსების და ხალხების მიიმართება ლტოლვით წმინდა-ქმნილ ადგილე-

ბისაკენ. ქვეყნის ყოველი კუთხიდან ახლდება შემართება. უთმენელ ელის უკვე კაცობრიობა: მან იცის — ეს არის კითხვა ჩვენი სიცოცხლის სივრცის საიდუმლოსი. ამერიკიდან მიდიან Peary და Cook ჩრდილოკიდურის მიმართ. სამხრეთისაკენ მისცურავენ გემები: ერთის მბრძანებელი ამუნდსენ არის. ნორვეგიელი. მეორის — კაპიტანი სკოტტი. ინგლისელი.

ს კ ო ტ ტ.

სკოტტი: რომელიმე კაპიტანი ბრიტანეთის საზღვაოსი. რომელიმე. მისი ბიოგრაფია იგივეა. რაც სამსახურის ფურცელი. იგი მსახურობდა მის უფროსთა საკმაყოფილოდ. შემდეგ მონაწილეობა მიიღო შეკლტონის ექსპედიციაში. არავითარი განსაკუთრებული ქცევა არ ამხელს მის გმირობას. მისი სახე ისეთივეა. როგორც ათასი, ათათასი ინგლისელის: ცივი, ენერგიული, კუნთებუძრავი, თითქო მკაცრ გაყინული შინაგან ქცეული ძალით. თვალები ფოლადრუხი. ქვაკუთხე მოკუმული ბაგე. არსად რომანტიული ხაზი. არსად ციალი ხალისისა ამ სახეზე. რომელიც ნებაა და პრაქტიკული აღლო. მისი ნაწერი: რომელიმე ინგლისური ნაწერი. უჩრდილო და უხუჭუჭო მალი და მჯერი. მისი სტილი: ნათელი და რიგიერი. შემბოჭველი ფაქტიურის გადმოცემაში. ხოლო უფანტაზიო როგორც პატაკი. სკოტტი სწერს ინგლისურად. როგორც ტაციტი ლათინურად. თითქო დაუხვეწელ ქვებით. ეტყობა. იგი სრულიად უოცნებო კაცია. ფანატიკოსი საგნობრიობის. ნამდვილი შვილი ბრიტების რასის. საცა თვით გენიალობაც კი მოვალეობის ასრულების კრისტალურ ფორმაში იწურება. ეს სკოტტი ასჯერ იყო ინგლისის ისტორიაში: მან დაიპყრო ინდოეთი და უსახელო კუნძულები არქიპელში. მან აქცია აფრიკა კოლონიად. მან იმარჯვა ქვეყნის პირისპირ ომებით. ყოველთვის იმავ რკინეული ენერგიით. იმავ თემური შეცნებით. იმავ ცივად შეკავებული სახით.

რვალივით მაგარია ეს ნება: ეს ემჩნევა საქმის დაწყებამდე. სკოტის ჰსურს დაასრულოს ის, რაც დაიწყო შეკლტონმა. იგი მართავს ექსპედიციას, მაგრამ საშვალება არ ყოფნის. ხოლო ეს ვერ აბრკოლებს მას. მას მსხვერპლად მიაქვს თავისი ქონება. იგი ვალებს იღებს. დაჯერებული, რომ მიზანს მიაღწევს. ახალგაზრდა ცოლი აჩუქებს მას ძეს — იგი არ ირყევა, ახალი ჰექტორ, მიატოვოს ანდრომახა, მეგობრები და ტოლები მონახული არიან, არავითარ მიწიერს აღარ შეუძლა მოღუნოს ნება. „ტერრა ნოვა“ სახელია იმ იშვიათი გემის. რომელმაც უნდა მიიყვანოს ისინი ყინვის ზღვის კიდემდე. „იშვიათი“ — რადგან ორმაგ ნაშენ-მორთულია იგი: ნახევრად ნოეს კიდობანი. სავსე ცოცხალი პირუტყვით. და თანვე თანადროული ლაბორატორია ათასი იარაღით და წიგნით. ყველაფერი უნდა იქნას მიტანილი იმ ცალიერ უდაბურ მხარეში. ყველაფერი, რაც კი ადამიანს სჭირდება სხეულისა და სულისათვის. უცნაურ ერთვიან აქ ერთიმეორეს: პრიმიტიული იარაღი პრეისტორიულ ადამიანის. ტყავეული და ბეწვეული. ცოცხალი პირუტყვი — ეს ერთი მხრით. მეორით: უკანასკნელი რაფინემანი ბოლო ხანების განვითარებულ ტექნიკის. და ფანტასტიურია, როგორც ეს გემი, აგრეთვე ორმაგი სახე მთელი შემართების: ავანტიურა. ხოლო ისეთი, რომელიც მოხანგარიშებულია როგორც გეშეფტი. გაბედულობა თუ თავაღებულობა სიფრთხილის ყოველი ხედულობით. უბოლოება სწორად მოფიქრებულ ცალკე ანგარიშის წინააღმდეგ კიდევ უფრო ძლიერ შემთხვევის უბოლოებისა.

ივნისის პირველს 1911 მიატოვეს მათ ინგლისი. ამ დღეებში ნათელია ანგლოსაქსური მხარე. რბილად და მწვანედ ჰყვავიან ველები. თბილად და ბზილით ეყუდება მზე უნისლო არეს. შიშით სცილდებიან მოგზაურნი ნაპირებს. რომლებიც ნელინელ ინთქებიან: იციან ხომ მათ, რომ ისინი ემშვიდობებიან სითბოსა და მზეს წლობით, ზოგი. შესაძლოა. სამუდამოდ.

Universitas antarctica.

იანვარში, მცირე დასვენების შემდეგ ახალზეელანდში. მიადგენ მოგზაურნი ჭიმს ევანსს მარადი ყინვის კიდესთან. აშენებენ სახლს საზამთროდ. დეკემბერი და იანვარი იქ ზაფხულის თვეებია: წელიწადში იქ ერთხელ ბრწყინავს მზე, ორიოდ საათი, თეთრ ლითონის ცაზე. ხისაგან არიან ნაშენი კედლები ოთახის, სწორედ ისე. როგორც წინანდელ ექსპედიციის დროს. მაგრამ შიგნით ამჩნევთ დროის წინსვლას. წინანი ისხდნენ აქ წინად მყრალი და მხრჩოლავი ჭრაქებით განათებულ ნახევარ სიბნელებში, დაღლილნი თავიანთ სახის დანახვით, მოქანცულნი უმზეოდ დღის ერთფეროვანებით. ამათ კი, მეოცე საუკუნის ხალხს, აქვთ აქ მთელი სამყარო. მთელი მეცნიერება შემოკლებით ოთხ კედელ შორის. აცეტინის მართი აფრქვევს თეთრ თბილ სინათლეს. კინოტილო ჰფენს ჯადონობით სურათებს შორეულისას. ტროპიკულ სცენებს დაწებულ ლანდშაფტებიდან. პიანოლას მოაქვს მუსიკა, გრამოფონს ადამიანის ხმა. წიგნთსაცავს ცოდნა. ერთ კუთხეში არაკუნებს საწერი მანქანა. მეორე კუთხე გამოყენებულია როგორც საკანე სიბნელის. საცა ირკვევიან კინემატოგრაფიული და ფერიანი გადაღებანი. გეოლოგიცდის ქვებს რადიოდალის მხრით. ზოოლოგი ჰპოულობს ახალ პარაზიტებს დაჭერილ პინგვინებში. მეტეოროლოგიური ხილვა სცვლის ფიზიკურ ცდას. ყველას მიკუთვნილი აქვს სამუშაო ერთი თვის სიბნელის მანძილზე. და გონიერი წყობა აქცევს ცალკეულ ცოდნას საერთო სწავლად. ყოველ საღამოს მართავენ ისინი მოხსენებას, საუნივერსიტეტო კურსებს აწყობენ ყინვაში და სიცივეში. თვითეული ცდილობს გადასცეს მეორეს თავისი ცოდნა და საუბრის ცოცხალ გაცვლა-გამოცვლაში მათ წინ იკვეთება მსოფლიოს ხილვა. გასპეციალება კვლევისა ჰკარგავს აქ თავის მედიდურობას და ეძებს გაგებას ერთობილ ყოფაში.

ელემენტარულ პირველყოფილ მხარეში, განმარტოებით, იქ, საცა დრო არაა, უზიარებენ ისინი ერთიმეორეს მეოცე საუკუნის მიღწევებს. და აი აქ ამხნევთ შინაგან არა მარტო საათს, არამედ წამსაც მსოფლიო საათისას. გულის შემრხევია კითხვა იმისა, თუ ეს სერიოზული კაცები შინაგადაშიგ როგორ შეჰხარიან შობის ხეს, ან და მცირე ოხუნჯობას „Couth Polar Times“, საჰუმარო გაზეთისას, რომელსაც თვითონ სცემენ. თუ როგორ იქცევა პატარა რამ — ამოტივტივებული ლომთევზა თუ დაცემული პონი — განცდად, და მეორის მხრით, თუ როგორ გადადის დიდი რამ — აღვივებული ჩრდილონათელი. შემზარავი ყინვა. გიგანტური მარტოობა — ყოველდღიურში და ჩვეულში.

ხანდახან ჰბედავენ მცირე წინწაწევასაც. ცდიან მარხილებს, სწავლობენ თხილამურებით ვლას. წვრთნიან ძაღლებს. ამზადებენ დეპოს დიდი მგზავრობისათვის — ხოლო ხელა. მეტად ხელა ფურცლავს კალენდარი ზაფხულამდე (დეკემბრამდე). რომელსაც მოაქვს მათთვის დატეხილ ყინულებში. გემი ბარათებით სახლიდან. პატარა ჯგუფები ჰბედავენ ეხლაც. სასტიკი ზამთრის შუაგულში. გამამაგრებულ დღიურ მგზავრობას, სინჯავენ კარვებს. ამტკიცებენ ცდას. ყველაფერს ვერ ახერხებენ. ცხადია. მაგრამ სწორედ სიძნელენი ჰგვრიან მათ ახალ მხნეობას. როცა უკან ბრუნდებიან. გაციებულნი და მოქანცულნი. მათ იღებს შინ სიხარული და თბილი კერას ციალი — და ეს საამო სახლი მიწის სიგანის 77 გრადუსზე ეჩვენებათ მათ სამყაროს ნეტარ სამყოფელად.

ხოლო ბრუნდება ერთხელ დასავლით ექსპედიცია უკან და ერთ ამბავს შეაქვს სახლში მდუმარება. მათ აღმოაჩენს ამუნდსენის საზამთრო ბინა: სკოტტმა იცის წამსავე, რომ ყინვისა და საფრთხის გარდა. ვილაც სხვა საეჭვოდ ხდის მის სახელს, სხვა ვინმე რომელიც. ვინ იცის, პირველი გამოგლეჯს უდრეკელ მიწას საიდუმლოს. ამუნდსენ. ნორვეგიელი. საშიშროება მოჰქროლავს სკოტტის სტრიქონებიდან. როცა იგი რწმუნდება. რომ ამუნდსენის ბინა ასათი კილომეტრით უფრო ახლოა კიდურთან ვიდრე მისი. შიში იპყრობს მას. მაგრამ იგი გულს მაინც

არ იტყვს. „წინ, ჩემი მამულის პატივისათვის!“ სწერს იგი
ამაყად თავის დღიურში.

მხოლოდ ერთხელ. მარტო ერთხელ, თავსა ჰყოფს
ამუნდსენის ეს სახელი სკოტტის დღიურში. შემდეგ —
ალარ. მაგრამ ამჩნევთ: იმ დღიდან შიშის ლანდი ევლება
თავს სახლს, რომელიც იყინება მარტვილი. და ალარ
არის იმიეროიდან წუთი. როს ეს სახელი მას ძილს არ უფრ-
თხოვდეს და ღვიძილს.

კოლიუსის მიმართ.

ქოხიდან ერთი მილის მანძილზე. ობსერვაციის ბორ-
ცვზე. მუდმივ იცვლება დარაჯი. აქ აპარატია ამართული.
ფრიალო მალლობზე. განმარტოებით. თითქო ზარბაზანი
უხილავი მტერის წინააღმდეგ: აპარატი — რომ მით ჰზო-
მონ მოახლოვებულ მზის პირველი პირისჩვენებანი. დღი-
თიდღე ელიან ისინი მზის გამოჩენას. დილის ცაზე რეფ-
ლექსები აჯადოებენ აღვივებულ ფერთა სასწაულს, ხო-
ლო მრგვალი გრკალი ჯერ კიდევ ვერ აღწევს ჰორი-
ზონტს. გარნა ეს ცა. ავსილი მზის სიახლოვის მაგიური
სინათლით. ეს წინასწარი თამაში სარკულ-ასახულის, აცე-
ცხლებს უკვე მოუთმენელ ვაჟკაცებს. ბოლოს, რეკავს
ელსმენი კარვის თავანიდან გაბედნიერებულთა მომართ.
გამოჩენილა მზე. პირველად, თვეების შემდეგ, ამოჰყო
მან თავი ზამთრის ღამეში ერთი საათით. სუსტია ფრიად
მისი ელვარება. მკრთალია იგი სრულიად. ძლივს შესძლო
მან ყინვიან ჰაერის ოდენ გამოცოცხლება, ძლივს-ღა სა-
ხავენ მისი ფრქვეული ტალღები ცქრიალა ნიშნებს აპა-
რატში. — ხოლო უბრალო გამოხედვაც იწვევს უკვე ბე-
დნიერებას. ექსპედიცია ემზადება ციებცხელებით. რომ
უკლებლივ გამოიყენოს პატარა მტკაველი სინათლე, რომ-
ელიც ერთსადაიმავე დროს გაზაფხულია. ზაფხული და
შემოდგომა. — ჩვენი შუათანა სიცოცხლის მცნებებისა-
თვის კი კიდევ საშინელი ზამთარია. წინ მისრიალებენ
ავტომარხილები. მათ უკან: მარხილები სიბირის პონებით
(პატარა ცხენებით) და ძაღლებით. გზა დაყოფილია ეტა-

პეზად. ყოველ ორი დღის სავალზე მართავენ დებოს: რომ უკან დაბრუნებისას ჰქონდეთ მათ ახალი საცმელი, საჭმელი, და უსაჭიროესი, ნავთი, შენახული სითბო დაუბოლოვებელ ყინვაში. რაში მიდის ერთობილ, განრიგებული, რომ შემდეგ დაბრუნდეს ცალცალკე ჯგუფებად: ისე, რომ უკანასკნელ მცირე ჯგუფს, რჩეულ დამპყრობთ კიდურისას, სხვა ჯგუფებმა დაუტოვონ მაქსიმუმი საგზაურის, ახალი სახედარი და საუკეთესო მარხილები.

ოსატურად არის გეგმა გამართული. წინხილულია თვითონ უბედობაც რომელიმე შემთხვევაში. და უკანასკნელი არც აყოვნებს. ორი დღის სავალის ბოლოს ტყდებიან მოტორ-მარხილები. პონებიც ვერ იჩენენ სიმარჯვეს. როგორც იყო მოსალოდნელი. გარნა აქ იმარჯვებს ორგანიული იარაღი ტექნიურზე: დავარდნილები, რომლებიც გზაში მოკლულ უნდა იქმნან, აძლევენ ძაღლებს თბილს, სისხლმაგარ საჭმელს და აღონიერებენ მათ ენერგიას.

ნოემბრის პირველს 1911 გაემართებიან ისინი ცალკე ჯგუფებად. ნახატებზე სჩანს ამ კაცთა სასწაულური ქარავანი: ჯერ ოცდაათი, შემდეგ ოცი, მერე ათი და ბოლოს ხუთი, რომელნიც მიილტვიან უსიცოცხლო სამყაროს თეთრ უდაბნოში. წინ ყოველთვის ერთი კაცია, მუმიად გამოწყობილი. ბეწვეულით და ტილოებით. ველურბარბაროსული არსი, რომელსაც ბურვილიდან უჩანს მხოლოდ წვერი და თვალები. ბეწვეულით მორთულ ხელს უჭირავს სადავეთი პონი. რომელიც მიათრევს მძიმედ დატვირთულ მარხილს. პირველ კაცს მიჰყვება უკან მეორე, იმნაირივე საცმელით და იმნაირივე თავდაჭერით. იმას კიდევ სხვა — და ასე: ოცი შავი წერტილი მზოზავ ხაზში ერთს დაუბოლოვებელ დამაბრმავებელ სითეთრეში. ღამით ისინი კარვებში ძვრებიან, აყენებენ თოვლის გორებს ქარის პირისპირ. რომ პონები დაჰფარონ და დილით იწყება კვლავ სვლა. ერთფეროვანი და უნუგეშო. სვლა ყინვიან ჰაერში. რომელსაც საუკუნეებიდან პირველად სვამს ადამიანის სუნთქვა.

ხოლო ზრუნვა მატულობს. ამიდი ცუდია ისევ. 40 კილო-
მეტრის ალაგას ისინი ვლენ ხანდახან მხოლოდ 30, და იქ-
ცევა მათთვის ყოველი დღე საგანძურად, მას შემდეგ, რაც
მათ იციან, რომ ამ სიმარტოეში მეორე მხრიდან ერთი
ვინმე სწორედ იმავე მიზნის მიმართ ილტვის. ყოველი
წვრილმანი აქ საფრხეთ იზრდება. ერთი ძალლი გაიქცა.
ერთი პონი აღარ სჭამს. ყოველი ეს მაშინებელია, რადგან
ამ უდაბურში ფასურნი საოცრად იცვლებიან. აქ ყოვე-
ლი საგანი ათასფასეული ხდება. თიქმის უმაგიერო. პო-
ნის ოთხ ფლოქზე თითქო უკვდავებაა დამოკიდებული.
დაღრუბლულ ცას შეუძლია ბუქით წინ გადაელობოს სა-
ქმეს მარადისობისათვის. თანვე: ვაჟკაცების ჯანმრთელო-
ბას კარგი პირი არ უჩანს: ზოგს დაემართა აზმაითი თოვ-
ლის სიბრმავე. სხვებს დაეზროთ სხეული. პონები სულ
უფრო და უფრო იქანცებიან, რომელთაც თანვე საკვები
უნდა უკლონ თანდათან. და ბოლოს. სწორედ ბერდმო-
რის მყინვართან დავარდებიან საწყალნი. სამწუხარო მო-
ვალეობა უნდა ასრულდეს: ეს მხნე ცხოველები, რომლებიც
აქ. ამ მარტოობაში. ორი წლის ერთად ყოფნის გამო, ვაჟ-
კაცების მეგობრები გახდენ. რომელთაც ყოველი მათგანი
სახელით ცნობს და ათასჯერ მათთვის აღერსი უფრქვე-
ვია. ეს ცხოველები უნდა მოჰკლან. „სასაკლავ ბანაკს“
არქმევენ ამ მწუხარე ადგილს. ერთი ნაწილი გამოეყოფა
რაზმს ამ სისხლიან ალაგებთან და უკან ბრუნდება. სხვე-
ბი იჭურვიან უკანასკნელ დაძაბისათვის, რომ განაგრძონ
ეს საშინელი გზა მყინვარზე. ყინულის სახიფათო ზვაე-
ზე. რომელსაც კიდური სარტყელად ირტყამს, და რომ-
ლის გარღვევა შეუძლია მხოლოდ ვნებაატეხილ კაცის
სიცხეს.

უფრო და უფრო კლებულობს ვლის ძალა, რადგან
აქ თოვლი იხრეშება. და ამიერიდან მარხილები კი აღარ
უნდა სწიონ, არამედ უნდა ათრიონ. მკაცრი ყინული სჭრის
ლართხებს. ფეხები წყლულდებიან ყინულის ფხვნი-
ლი სილით. მავალნი არ ნებდებიან. დეკემბრის 30 მიაღ-
წიეს 87 სიგანის გრადუსს — მეკლტონის უკანასკნელ
წერტილს. აქედან უნდა დაბრუნდეს უკან უკანასკნელი

საქართველოს
ეროვნული
ბიბლიოთეკა

გამონაყოფი: მხოლოდ რჩეულნი, რიცხვით 5. უნდა გაემართონ კიდურისაკენ. სკოტტ სინჯავს ტოლებს. მათ არ ძალუძთ წინააღმდეგობა, ხოლო გული ემძიმებათ. რომ მიზანთან ასე ახლო არიან და უკან უნდა დაბრუნდენ. მეგობრებს სახელის მიღება დაუტოვონ, როგორც პირველ მხილველებს კიდურისას. წილი ყრილია. ერთხელ კიდევ ართმევენ ისინი ხელს ერთიმეორეს. ვაჟკაცურ გათანგულნი. რომ გულის აჩუყება დამალონ, და შემდეგ გაიყოფის ჯგუფი. ორი მხრით იმართება მავალთა ხაზი. რიგი მიდის სამხრით უცნობისაკენ, რიგი ჩრდილოით მშობელ მიწისაკენ. ერთიმეორეს მოხედვენ ხოლმე ხანდახან. რომ კიდევ ერთხელ იხილონ უკანასკნელი სიახლოვე მეგობრულ სიციცხლის. მალე ჰქრება უკანასკნელიც მათგანი. მიილტვიან მარტონი უცნობისაკენ. ხუთნი რჩეულნი. სკოტტ. ბოუერს. ოტს. ვილსონ, ევანს.

სამხრეთ პოლიუსი.

უსვენარნი ხდებიან შენიშვნანი ამ უკანასკნელ დღეებში: როგორც ლურჯი ნემსი კომპასის. იწყებენ ისინი დაგდაგს კიდურთან წიახლოვებისას. „რა უბოლოოდ გძელდება ეს: სანამ ჩრდილები გარს გვერტყმიან. მარჯვენა მხრით ჩვენგან იზნიჭებიან და წინიდან კვლავ მარცხნით მიზოზავენ!“ ხოლო შიგადაშიგ კიაფობს იმედი უნათლეს. ყოველთვის ვნებატეხილობით ნიშნავს სკოტტ ძლეულ მანძილებს: „მხოლოდ 157 კილომეტრი კიდევ კიდურამდე. მაგრამ უმძიმეს იქნებიან იგინი ჩვენთვის“. ხოლო შემდეგ — უეცრად მარჯის კილო: „მხოლოდ 94 კილომეტრი კიდევ კიდურის წინ: თუ ვერ მივალწიეთ, ხომ მივუახლოვდებით“. იანვრის 14 იმედი გადადის დაჯერებაში. „მხოლოდ 70 კილომეტრი კიდევ. მიზანი ჩვენ წინ დვას“. და მეორე დღეს შენიშვნებიდან მოღვივის სიხარული მეტი გარკვევით. თითქმის სიხალისე: „მხოლოდ 50 მაჩანხალა კილომეტრი კიდევ. ჩვენ უნდა მივალწიოთ. რაც უნდა დაგივჯდეს“. ამჩნევთ გულამდე, ფრთაასხმულ სტრიქონებიდან, თუ რა მაგრად არის დაჭიმული იმედის მიერ

მათი ლტოლვა, თუ როგორ ცახცახებს ყოველი მათი ნევრები მოლოდინისა და უთმენლობისაგან. დავლა ახლოა. უკვე წვდიან ისინი ხელებს მიწის უკანასკნელი საიდუმლოს მიმართ. ერთი უკანასკნელი ძრავი კიდევ — და მიზანი მიღწეულია.

იანვრის 16.

„ამაღლებული გუნება“: გვამცნევს დღიური. დილით გადიან ადრე ვიდრე ოდესმე: მოუთმენლობამ გამოაგდო ისინი საძინებელ ტომრებიდან. რომ მალე იხილონ საიდუმლო. საშიშარ ლამაზი. თოთხმეტ კილომეტრს სტოვებენ უკან უტეხნი ვაჟკაცი ნასადილევამდე: ხალისიანად მიდიან ისინი თეთრ უსულო უდაბნოში. ეხლა აღარ ასცდებიან მიზანს, გადამწყვეტი საქმე კაცობრიობისათვის თითქმის გაკეთებულია. უეცრად აიმღვრევა ერთი მათგანი, ბოუერს. მისი თვალი იწვის მკვეთრად ამ უშველებელ თოვლის ველში ერთ ბნელ წერტილის მიმართ. იგი ვერ ჰბედავს. თავის გუმანი აცხადოს. ხოლო ყველას უცახცახებს გულში მსგავსი ფიქრი საშინელი: რომ აქ კაცის ხელს შესაძლოა გზის ნიშანი აემართოს. უგულოდ ცდილობენ ისინი, დაამშვიდონ ერთიმეორე. ისინი ჰფიქრობენ: — როგორც რობინზონ, რომელსაც უნდოდა თავისად გამოეცნო უცხო ნატურფალი კუნძულზე — ეს ყინულხეთქილი უნდა იყოს, ან და ერთგვარი ანარეკლი. აცახცახებული ნერვებით უახლოვდებიან ისინი წერტილს, კიდევ და კიდევ ცდილობენ. ერთიმეორე მოატყუონ, ისე კარგად ხვდებიან ისინი სინამდვილეს: რომ ნორვეგიელი, ამუნდსენ, მათ წინ მოსულა აქ.

უეცრად ტყდება იჭვი შავი ალამის დანახვაზე, რომელიც მარხილზე აუშართავთ მალლა: კვალი უცხო მიტოვებულ საბინადროსი — მარხილების ლართხები და ძაღლების თათების ნატურფალნი: ამუნდსენ ყოფილა აქ დაბინავებული. გაუგონარი, წარმოუდგენელი კაცთა შორის მომხდარა: მიწის კიდური, ათასწლებიდან უცხოვარი. ათასწლებიდან და შესაძლოა ყოველ თაურიდან მიწიერი

თვალთ უხილველი, ორჯერ არის აღმოჩენილი დროის ერთ მოლექულში, რაღაც ორი კვირის მანძილზე. და ესენი, ახლად მისულნი, მეორენია — დააგვიანდათ ერთად ერთი თვით, ერთი თვით მილიონ თვეებიდან — მეორენია კაცობრიობაში, რომლისათვის პირველი ყველაფერია, მეორე კი არაფერი. ფუჭი იყო მაშ დაძაბულობა, სასაკილო იყო მაშ მოკლება ბევრი რამის. სიგიჟე იყო მაშ. იმედი კვირების, თვეების, წლების. „ყოველი ჯაფა, ყოველი მოკლება. ყოველი წამება — რისთვის?“ სწერს სკოტტ თავის დღიურში: „მხოლოდ ოცნებებისათვის. რომლებსაც ეხლა ბოლო მოელოთ“. თვალეზე ცრემლები მოსდით მეგობრებს. მოქანცულნი არიან. ხოლო ძილი მაინც არ შეუძლიათ. მოლუშულნი, უიმედონი, როგორც დასახვრეტნი. უკანასკნელი ვლით უახლოვდებიან ისინი კიდურს. რომელსაც. იგულვებდენ, თავს დაესხმოდენ ყიჟინით. არც ერთი არ ცდილობს, ანუგეშოს მეორე. უსიტყვოდ მილოდავენ ქვევით. იანვარის 16 კაპიტან სკოტტ აღწევს კიდურს თავის მეგობრებით. პირველობა აღმოჩენისა მის თვალს აღარ აბრმავეს — ლენჩი მზერით ხედავს იგი არეს: „აქ არაფერია სახილველი, არაფერი, რაიც სხვაგვებოდეს უკანასკნელი დღეების ერთფეროვნებისაგან“ — ეს არის მთელი აღწერა სამხრეკიდურის, რომელსაც იძლევა რობერტ სკოტტ. ერთად ერთი რამ იშვიათი. რაც მათ აღმოაჩინეს. ბუნებისაგან კი არ არის გაშლილი. არამედ ადამიანის მოქიშვე ხელისაგან: ამუნდსენის კარავი ნორვეგიის ალამით, რომელიც უდიერ და მარჯის ხალისით ფართქალობს კაცობრიობის იერიშით აღებულ ზვავზე. წერილი კონკვისკადორის უცდის აქ იმ უცნობ „მეორეს“. რომელიც მის შემდეგ მოვიდოდა ამ ალაგს, და თხოვს. ნაწერი გაუგზავნოს ჰაკონს. ნორვეგიის მეფეს. სკოტტ იღებს თავის თავზე ამ მკაცრი ვალის შესრულებას: მოწმად იყო ქვეყნის წინაშე იმ საქმისა, რომელსაც ელტვოდი როგორც შენსას.

სევდით ჰკიდებენ ისინი გვიან მოსულ „Union Jack“ (ინგლისის) ალამს ამუნდსენის გამარჯვების ნიშნის გვერდით. შემდეგ სტოვებენ „მათი პატივმოყვარეობის მატ-

ყუარა ადგილს“. ცივად მიჰყვებათ ქარი თან. წინასწარ-
მეტყველური გზნებით (ცუდის) სწერს სკოტტ დლიურში:
„მეშინის დაბრუნების“.

დ ა ლ უ კ ვ ა .

დაბრუნება აათკეცებს საფრხეებს. კიდურის მიმართ
კომპასი უკვლევდა მათ გზას. ეხლა ისიც უნდა ყურად-
იღონ. კვალი არ დაჰკარგონ თავისი, არ დაჰკარგონ იგი
ერთხელაც კვირეთა მანძილზე. არ გადასცდენ დეპოს, სა-
ცა საჭმელია მათი. საცმელი მათი და შენახული სითბო
ნავთის ორიოდე ბალონში. სიმშვიდე ერღვევათ მათ
ამიტომ ფეხის ყოველ გადადგმაზე. როცა ბუქი მათ
უბლანდავს მზერას: რადგან ყოველი გადაცდენა ნამდვილ
სიკვდილში გადადის პირდაპირ. თანვე: მათ სხეულებს აკ-
ლიათ დაუხარჯავი სინცხალე პირველი ვლისა: მაშინ ისი-
ნი იყვენ კიდევ გამთბრანი კარგი ჭამადის ქიმიურ ენერ-
გიით. თბილი ბინით მათი ანტარქტული სამშობლოსი.

და შემდეგ: ნების ფოლადი ფხვნილია მათ მკერდში.
იქითკენ მგზავრობისას. ზესთამიწიერი იმედი. რომ ისინი
სხეულჰყოფენ მთელი კაცობრიობის ნდომას ახალის ბი-
ლვისას და ლტოლვას მის მიმართ. იმედი ზესთამიწიერი
მორგვადა მაგრად მათ ძალებს. უკვდავი საქმის შეცნევით
ზესთადამიანური (ძალის მხრით) გახდა მათთვის მისაწ-
დომი. ეხლა კი იბრძვიან ისინი მხოლოდ საღი კანისათვის,
ხორციელი. მოკვდავი არსებისათვის, უსახელო დაბრუნე-
ბისათვის: უკანასკნელის უფრო ეშინის მათ შინაგან ნე-
ბას ვიდრე ესურვის იგი.

შემზარავია კითხვა შენიშვნების, რომლებიც ამ დღე-
ებს ეხებიან. ამიდი უარესდება გამუდმებით. ზამთარი და-
დგა უფრო ადრე ვიდრე სხვა დროს. რბილი თოვლი იხ-
რეშება მათ ფეხებ ქვეშ მახედ. საცა იფლობიან მათი ნა-
ბიჯები. და ყინვა ქანცს ულევს მათ მოღლილ სხეულებს
სიხარულია ყოველთვის. როცა ისინი. დლიდან დღემდე
გზის აცდენისა და ძარღვის შეშინების შემდეგ. კვლავ
აღწევენ დეპოს. და მაშინ მათ სიტყვებს ედება ხოლმე გა-

კვრით ალი ნდობისა. და არაფერი ისე დიდათ არ ამოწმებს სულის სირაინდეს ამ ორიოდე კაცისას. როგორც ვილსონ, მკვლევარი, რომელიც აქაც კი. ბეწვის ახლო სიკვდილთან. აგრძელებს მეცნიერულ ძიებას. და თავის საკუთარ მარხილით. ისედაც დატვირთულით საჭირო ბარგით, 16 კილოგრამ იშვიათ ქვებს მიათრევს კიდევ.

მაგრამ ადამიანის სიმხნე უთმობს ნელინელ ბუნების მძლეობას, რომელიც აქ ულმობელ. ათასწლებში გაფოლადებული სიმძლავრით თავს ატეხს ხუთ გაბედულებს ყველა ძალებს დაღუპვისას: სიცივეს, ყინვას. თოვლს. ქარს. დიდი ხანია. ფეხები დახეთქილია. სხეული. უკმარ გამთბარი თბილი ჭამადით. რომელსაც იგი დღეში ერთხელ იღებს. დასუსტებული კერძების შეცოტავეებით. სხეული იწყებს უარობას. შიშით ამჩნევენ მეგობრები ერთ დღეს. რომ ევანს. ყველაზე უფრო ღონიერი მათ შორის. რალაც ფანტასტიურს ეტანება ხოლმე. იგი რჩება უკან გზაზე და ვალალებს განუწყვეტელ ნამდვილსა და წარმოსახულ ტანჯვაზე. ზარნაკრავნი გამოიკნობენ მის უჩვეულო სიტყვებიდან მეგობრები. რომ. დაცემის თუ საშინელ ტკივილების გამო. უბედური გაგიჟებულა. რა უყონ მას? მიატოვონ იგი ყინვის უდაბნოში? გარნა. სხვა მხრით, მათ ჭოჭმანის გარეშე უნდა მიაღწიონ დეპოს. თორემ—სკოტტ ირყევა თვითონ. აქ სიტყვა დაუმატოს. თებერვლის 17. ლამის 1 საათზე. კვდება უბედური აფიცერი. სწორედ ერთი დღის სავალის წინ „სასაკლაოს ადგილამდე“, საცა დანარჩენნი საჭმელად ჰპოულობენ ერთი თვის წინ მოკლულ პონების ხორცს.

ოთხნი-ლა მიდიან ეხლა. მაგრამ. დახე უბედურებას: შემდეგი დეპო მწარედ უმტყუნებს მათ. იქ ნაკლებადაა ზეთი — და ეს ნიშნავს: უსაჭიროესს. საწვავ მასალას. მომჭირნეობით უნდა მოექცენ. უნდა ჰზოგონ სითბო. ეს ერთადერთი ნამდვილი იარაღი ყინვის წინააღმდეგ. ცივი ქარბუქიანი ღამე და უმხნეო გამოღვიძება: ძლივს-ლა ჰყოფნით მათ ძალა. რომ ჩაიცვან ბეწვეული ფეხსაცმელები. გარნა. მაინც მილოღავენ ისინი ქვევით. ერთს მათგანს. ოტსს. ფეხის თითები უკვე მოთოშილი აქვს. ქარი

უბერავს უმძაფრეს ვიდრე ოდესმე. და მარტის 2, შემდეგ დეპოსთან. მეორდება შემზარავი გატეხა იმედის: აქაც ნაკლებობა საწვავ მასალის.

ახლა შიში სიტყვებშიაც გადადის. ემჩნევა, თუ როგორ ცდილობს სკოტტ, რომ შიში დამალოს. ხოლო ხშირად სჭრის შუაგულში მის ხელოვნურად მოგვრილ სიმზვიდეს მძაფრი კვილი სასოწარკვეთის. „ეს ასე არ უნდა გაგრძელდეს“. ან: „ღმერთი იყოს ჩვენთან: ამ გათანგვას ჩვენ მეტს ვეღარ ვუძლებთ“. ან: „ჩვენი თამაში ტრაგიულად მიდის“. და ბოლოს შემადრწუნებელი შეგონება. „განგება მაინც მოვიდოდეს ჩვენდა საშველად: კაცთაგან შველას ჩვენ აღარ ვეღობთ“. ხოლო მიხობხვენ ისინი ქვევით და ქვევით, უიძედოთ, კრიჭაშეკრულნი. ოტს მიდის შეგობრებთან ერთად, უფრო და უფრო დასუსტებული. იგი ბარგი ხდება მათთვის ვიდრე დახმარება. მათ უნდა შეაჩერონ ერთ ალავს სვლა: შუადღის ტემპერატურა 42 გრადუსს აღწევს. და უბედური ოტს ამჩნევს (და იცის), რომ იგი მისი შეგობრებრსათვის ბარგია ზედმეტი. უკვე ვმზადებიან მავალნი საშინელისათვის. ისინი ართმევენ ვილსონს, მკვლევარს, თვითეული 10 ტაბლეტ მორფინსას, რომ საჭირო წამს დააჩქარონ თავიანთი აღსასრული. ერთი დღის სავალზე ცდიან კიდევ ისინი ავადმყოფთან ერთად სვლას. მაშინ მოითხოვს უბედური თვითონ: დასტოვონ იგი მის საძინებელ ტომარაში და გამოჰყონ თვისი ბედი მისი ხვედრისაგან. უკუაგდებენ მეგობრები ენერგიულ ამ მოთხოვნას. თუმცა ისიც კარგად იციან რომ იგი მათთვის შემსუბუქებას ნიშნავს. ორიოდე კილომეტრი ბორძიკობს კიდევ ავადმყოფი დამზრალ ფეხებზე ლამის ახალ ბინამდე. მას სძინავს მეგობრებთან ერთად დილამდე. გაიხედავენ დილით: გარეთ მძვინვარებს გრიგალი.

უეცრად წამოვარდება ოტს: „მე მინდა იქითკენ გავიდე“. ეუბნება იგი მეგობრებს: „შესაძლოა ცოტა ხანს დავრჩე გარეთ“. დანარჩენნი ცახცახებენ. ყოველმა მათგანმა იცის. თუ რას ნიშნავს ეს. ხოლო ვერ ჰბედავს ვერც ერთი. დააკავოს საცოდავი. ვერ ჰბედავს ვერც ერთი, ხელი გაუწოდოს მას გამოთხოვების. რადგან ისინი

გოდნობენ ყველანი შიშნარევი რიდით, რომ რიტტმაისტერ ლავრენს ი. ე. ოტს, ინისკილინგის დარაგონერი, ვით რანდი მიდის სიკვდილის მიმართ.

სამნი-ლა მიდიან ეხლა. მიჩოჩავენ დაუძღურებულნი. ყინვარკინიან დაუბოლოებელ უდაბურში. მოქანცულნი უკვე, უიმედონი. მხოლოდ თავის-მენახვის ჩლუნგი ალლო ბარბაცა ვლად ჰბოჭავს კიდევ მათ ლტოლვას. უარესდება ამიდი. ყოველ ახალ დეპოსთან თავს დასცინის მათ ახალი გატეხა იმედის. კიდევ და კიდევ: ნაკლებობა ზეთის. ნაკლებობა სითბოსი. მარტის 21 გასცილდენ ისინი დეპოს 20 კილომეტრზე შორს. მაგრამ ქარი უბერავს ისეთი მკვლელური ძალით. რომ მათ არ შეუძლიათ მიატოვონ კარავი. ყოველ საღამოს იმედობენ ისინი შემდეგი დილით: რომ მიზანს მიაღწიონ. გარნა. თავდება საკვები და მასთან ერთად იმედიც. საწვავი მასალა აღარ არის მეტი და სითბოს მზომავი უჩვ. 40" ნულის ქვეით. ქრება ყოველი იმედი: მათ წინ ეხლა არჩევანია უფრო—ან სიმშლით სიკვდილი ან ყინვა. რვა დღე იბრძვიან სამნი პატარა კარავში აუცდენ აღსასრულის წინააღმდეგ პირველყოფილ თეთრ სამყაროს შუაგულში. მარტის 29 იციან მათ. რომ ამიერიდან მათი ხსნა არავითარ სასწაულს აღარ შეუძლია. და გადასწყვეტენ: არავითარი ნაბიჯი არ გადადგან ბედისწერის წინააღმდეგ და სიკვდილი გადაიტანონ ამაყად როგორც ყოველი სხვა უბედურება. ისინი ძვრებიან თავიანთ საძინებელ ტომრებში. და მათი უკანასკნელი ტანჯისაგან ერთი კვნესაც არ გადავარდნილა სამყაროში.

წერილები მომავლის.

ამ წუთებში. მარტოდ მარტო უხილავ და მაინც სუნთქვაახლო სიკვდილის მიმართ. როცა გარეთ ცოფიანი გრიგალი თავს ატყდება კარავის თხელ კედლებს. კაპიტან სკოტტ იგონებს ყოველ ერთობილობას. რომელთანაც იგი დაკავშირებულია. უყინულეს სიჩუმეში. რომელიც არ ისუნთქავს არაოდეს ხმას ადამიანისას. გმირულ იცნევს იგი ძმობას თავის ერის მიმართ. მთელი კაცობრიობის

მიმართ. შინაგანი „ფატა მორგანა“ — სულსა იწვევს მის წინაშე ამ თეთრ უდაბნოში ყველა იმათ სახეებს, ვინც კი ოდესმე გადაბმულ იყო მასთან: სიყვარულით. ერთგულებით. მეგობრობით. და მიმართავს მათ იგი სიტყვით. გაშეშებული თითებით სწერს კაპიტან სკოტტ. სწერს წერილებს თავის სიკვდილის წუთიდან ყველა ცოცხლებს. ვინც მას უყვარს.

სასწაულურია ეს წერილები. ყოველი წვრილმანი უკუგდებულა მათში სიკვდილის მძლეველი სიახლოესაგან. კრისტალური ჰაერი ამ უცხოვარ ცის. სჩანს. გადასულია მათში. ადამიანებისადმი ეს წერილები მიმართული და მაინც კაცობრიობას ელაპარაკებიან ისინი. ერთი ხანისადმი ეს წერილები დაწერილი და მაინც მარადისობას ეუბნებიან ისინი.

სკოტტ სწერს თავის ცოლს. იგი აგონებს მას. მოუაროს გან. კრისტალური ჰაერი ამ უცხოვარ ცის. სჩანს. გადასულ მას. დაიფაროს შვილი ყოველგვარ ლაჩრობისაგან. სკოტტ ამბობს თავის თავზე. მსოფლიო ისტორიის უმაღლეს მიღწევის ბოლოში: „შენ იცი. მე ძალა უნდა მეხმარა ჩემ თავზე, რომ ქცეულვიყავ ქმედი — მე მქონდა მუდამ მიდრეკილება უქმედობისადმი“. ერთი მტკაველის სიგანეზეა სკოტტ სიკვდილთან. და. იმის მაგიერ რომ იჯავროს. იგი აქებს თავის გადაწყვეტილებას. „რამდენი რამ შემეძლო მომეთხრო შენთვის ამ მოგზაურობიდან. და მაინც. რამდენად უფრო უკეთესი იყო იგი. ვიდრე კმაყოფით სახლში ჯდომა!“

და სწერს იგი ერთგული არიფობით ცოლსა და დედას თავის სიკვდილის-მეგობრებისას. რომელთაც მასთან ერთად მიიღეს სიკვდილი. სწერს. რათა გადასცეს მათ უკანასკნელთა სირაინდე. იგი ანუგეშებს. თვითონ მომაკვდავი. ცოცხალ-დარჩენილებს (სხვებს) თავის მაგარი და უკვე ზესთადამიანური გზნებით ამ წუთის სიდიდისა და ამ დაღუპვის ღირსხსოვისა.

და სწერს იგი მეგობრებს. თავდაბალი თავის თავად. იგი ამაყია თავის ერისათვის: იგი გრძნობს ამ წუთში აღფრთოვანებით თავის თავს როგორც მის ძეს

და ღირსეულ ძეს. „მე არ ვიცი, ვიყავი თუ არა დიდი აღ-
მოდინი. — აღიარებს იგი: ხოლო ჩვენი აღსასრული მო-
წმობა იქნება იმისა, რომ ჩვენი რასიდან ჯერ კიდევ არ
ამოფხვრილა სული სიმამაცის და ძალა თმენის“. და ის.
რის თქმას მთელი სიცოცხლის განმავლობაში მას ნებას
არ აძლევდა ვაჟკაცური ქვაული, სულიერი სიქალწულე.
— ეს აღსარება მეგობრობისა გამოგლიჯა მას მხოლოდ
სიკვდილმა. „მე არ შემხვედრია ჩემს სიცოცხლეში ისე-
თი ადამიანი. — სწერს იგი თავის საუკეთესო მეგობარს. —
რომელსაც ავეფრთოვანებო იმე როგორც თქვენ, და რომ-
ელიც მყვარებოდა იმე როგორც თქვენ. მაგრამ მე არ
შემეძლო არაოდეს თქვენთვის მეჩვენებია ის. რასაც
ნიშნავდა ჩემთვის თქვენი მეგობრობა. რადგან თქვენ
გქონდათ ბევრი, რომ მოგეცათ, მე კი თქვენთვის არა-
ფერი“.

და სწერს იგი უკანასკნელ წერილს, უმშვენიერესს
ყველასაგან, ინგლისელი ერის მიმართ. იგი იძულებულ
გრძნობს თავის თავს, რომ მისცეს ანგარიში: რომ იგი ამ
ბრძოლაში მისი საკუთარ ბრალით არ დაცემულა. იგი ჩა-
მოთვლის ცალკე შემთხვევებს, რომლებიც მის წინააღმდეგ
შეიფიცენ, და უხმობს იგი ყველა ინგლისელებს, — ამ ხმას
სიკვდილის გამოძახილი გასაოცარ პათოსს აძლევს. — ნუ
მიატოვებენ მის მეგობრებს უკან დარჩენილებს. მისი უკა-
ნასკნელი ფიქრი თავს გადაუარს მის საკუთარ ხვედრს. მი-
სი უკანასკნელი სიტყვა უხმობს არა საკუთარ სიკვდილზე,
არამედ სხვის სიცოცხლეზე: „ღვთის გულისთვის, იზრუ-
ნეთ ჩვენს უკან დარჩენილებისათვის!“.

უკანასკნელ წუთამდე, თითების დაზრვამდე, ფანქრის
ხელიდან გადმოვარდნამდე, კაპიტან სკოტტ აგრძელებს
დღიურს, იმედი, რომ მის ცხედართან ნახავენ ამ ფურც-
ლებს, რომლებსაც შეუძლიათ აცნაურონ მისი რასის
მხნეობა. ეს იმედი აძლევს მას ძალას ზეკაციურ და-
ძაბვისას. ვითარ უკანასკნელს, აფრქვევენ მისი გა-
ყინული თითები მის სურვილს ცახცახით: „გაუგზავ-
ნეთ ეს დღიური ჩემს ცოლს“. ხოლო შემდეგ შლის მისი

ხელი სიტყვას „ჩემს ცოლს“ და აწერს თავზე შემზარავს:
„ჩემს ქვრივს“.

პ ა ს უ ხ ი.

კვირები იცადეს მეგობრებმა ქოხში, ჯერ იმედიანად, შემდეგ ნელი ზრუნვით, ბოლოს მატებული უსვენარობით. ორჯერ იყო გაგზავნილი ექსპედიცია საშველად, მაგრამ ორივეჯერ ამიდმა გამოცოცხა იგი უკან. მთელ გძელ ზამთარს ახანებენ უმეთაურონი ქოხში. უიმედოთ, დაღუპვის ლანდი შავად ეცემათ გულში მათ. ამ თვეებში კაპიტანი რობერტ სკოტის ბედი და საქმე თოვლში და სიჩუმეშია შთანთქმული. ყინვა იჭერს მათ შუშიან კუბოში დაბეჭდილთ. მხოლოდ ოქტომბრის 29, ჩრდილოეთის გაზაფხულზე, მიდის ექსპედიცია, რომ ცხედარნი მაინც ნახონ. ნოემბრის 12 აღწევენ კარავს. ისინი ნახულობენ ცხედრებს გმირებისას, საძინებელ ტომრებში გაყინულთ. სკოტტ ძმურად ჩახვევია სიკვდილში ვილსონს. ნახულობენ წერილებს: საბუთებს. თხრიან ტრაგიულ გმირებისათვის საფლვას. ერთი სადა, შავი ჯვარი. თოვლის ბორცვის თავზე. გადაჰყურს მარტვილი თეთრ სამყაროს. რომელიც თავის ქვეშ სამუდამოდ ჰფარავს რაინდულ საქმეს კაცობრიობისას.

— : —

ჭ ი ნ კ ა.

დღეები იყო ცხელი. ბუჭები ეხვეოდნენ დუქნებში ხილს და სამიკიტნოების ვიტრინებში დაყრილ სანოვაგეს.

ატყამ მიხურა ფანჯრის დარაბა, გატიტვლდა და ტახტზე მიეგდო. მზე ადგებოდა ფანჯარას. შემოდინდა დარაბის ჭუჭრუტანიდან და ტახტის პირდაპირ კედელზე ანათებდა. რამოდენიმე ბუჭი ნათელ რგოლს არ სცილდებოდა. ატყა ხედავდა როგორ ეთამაშებოდნენ ისინი ერთმანეთს. მზის სვეტში, რომელიც ფანჯრიდან კედლამდე მოდიოდა, ირეოდა მტვერი. მტვერი დაუსრულებლად ამოდინდა ქვევიდან ზევით და მიყვებოდა სვეტს.

დღის განმავლობაში მზეს გაუხურებია ოთახი. ატყას უმძიმდა სუნთქვა. ვერ იძინებდა და გულმოდგინეთ იწმენდდა სახეს და ტანს, თითქო ოფლი ყოფილიყო დამნაშავე რომ ცხელოდა.

ატყა სახლში ყოველთვის უხასიათოთ იყო. სხვაგან მხიარულს და ხალისიანს, შინ სახე უმჟავდებოდა.

— ერთხელ მაინც გახსენი, შე კაი კაცო. წარბი! — საყვედურით ეტყოდა ცოლი, — ჟამი ხომ არაა შენ სახლში, რა დაგემართა!

— შენი შეხედვით ასე რომ ვარ, არ გიკვირს? — იღრინებოდა ატყა. შეჭამდა, დალევდა და ძილათ მიეგდებოდა.

მაგრამ ეს დღეები მირონ ნაცხებივით დადიოდა და სახლში გაღიმებულიც ნახეს.

დიდი ხანია დაპირდა ნათლი-მამა კარგი ჯიშის სანადირო ძაღლს. დაპირების დღეს ატყამ ნათლი-მამას სანაქებო პატივი სცა. როცა ძაღლის გამოგზავნა დაგვიანდა,

შესახსენებლად რამდენიმეჯერ დუქნის თუთუნიც გაუგზავნა თავისი ქალაქით.

— ლეკვს არ დავეძებ, იმ კაცს მაინც არ დავეკარგე! იმედი აღარ ჰქონდა ატუას და როცა ნაცნობები მოაგონებდნენ, სწყინდა, რადგან დაცინვით მიაჩნდა.

იმედი არ ჰქონდა, მაგრამ ერთ დილას, როცა ატუას არც ძალლი გახსენებია და არც კაცი, მიიღო დაპირებული საჩუქარი.

რამდენიმე დღე ძალლი სალაპარაკოთ იყო მთელ ქალაქში. ნაცნობებს გარდა, სანახავად მოდიოდნენ უცნობებიც.

იმავე დღეს, ცოლის რჩევით, ატუამ შეაბა ლეკვს პატარა, ნაპირმომტვრეული ქარვა.

— რამდენი ვინმე ცხოვრობს ქალაქში! რამდენი ოხერია, ყველას ამბავი ხომ არ იცი. თვალი ეცემა, დაგლუპავს კაცს!

ლეკვის სანახავად მრავალი მოვიდა და ყველა ერთსადა იმავეს ამბობდა: ჯიში საუკეთესოა, მსგავსი არავის ყოლია, ნადირობაში ძალლი ვერ აჯობებს. მხოლოდ ერთ რამეში ედავებოდნენ: ატუა არასოდეს ყოფილა მონადირე, უსარგებლოა მისთვის ასეთი ძალლი, ვერ გაწვრთნის და გააწუწუკებს.

— თოფსაც ვიყიდი, მაგაზე ადვილი რაა! — თავს იმართლებდა ატუა.

სხვა დროს შეიძლება ყურადღებაც არ მიექცია ჭუჭრუტანიდან შემოპარულ მზეზე მოთამაშე ბუზებისათვის. მაგრამ ეხლა ისინი თავისი დაუსრულებელი ცელქობით აგონებდნენ საყვარელ ლეკვს და ატუაც სიამოვნებით უყურებდა მათ.

— ატუა! — ეზოდან ხმა მოესმა უეცრად.

ატუა ზანტად წამოდგა, ტიტველ ტანზე ზეწარი მოიხურა და ფანჯარა გააღო.

ცხელი მზე ოთახში შემოიჭრა.

— რომელი ხარ? — იკითხა ატუამ. რომელსაც მზე არ ახედვინებდა თვალებში.

სარდიანმა პასუხიც არ გასცა, ხელი მოავლო ფან-
რის ჩარჩოს და ოთახში ისკუპა.

ატუამ წელზე შემოიხვია მხრებზე მოფარებული ზე-
წარი და გაკვირვებით შეხედა დაუპატიჟებლად შე-
მოსულს.

— რამ მოგიარა, ვაჟო?

ოთახში მეტი არავინ იყო. მეორე ოთახიდან ცოლის
ლონიერი ხვრინვა ისმოდა.

სარდიანმა კუთხეში გაიხმო ატუა და ხმა დაბლა და-
უწყო ლაპარაკი.

— დიდი ხანია ასეთი ამბავი არ გამიგონია. წინად
რომ იტყოდენ, დაეჭვებული ვიყავი. ეხლა კი ჩვენ მე-
ზობლად მოხდა ისეთი, რომ...

— რა მოხდა? მოკლეს ვინმე თუ?

— უარესი! კაცი რომ მოკვდება, გათავდება და ის
იქნება. აქ კი არ ვიცი რა ვიფიქროთ...

— სთქვი ბარემ, რას გაჭიმე! — მიაძახა ატუამ.

— შენც გაიგებდი, სამი დღის წინ მოულოდნელად
დაბრუნდა დავითი. გუშინ ღამე კი, ისეთი რამ მოხდა მის
სახლში, რომ ყველა გაკვირვებულია.

როცა ატუა გამოვიდა ქალაქში. დარწმუნდა, რომ
მთელი ქალაქი ლაპარაკობდა უცნაურ ამბავზე.

სახლი, სადაც მოხდა ის, თუმცა ყველას ჰქონდა ნახუ-
ლი და ზოგიერთი დღეში რამოდენიმეჯერ ჩაუვლიდა.
ეხლა გახდა საერთო ყურადღების საგნათ.

როცა მზე დაცხრა, მრავალი მოქალაქე მოადგა და-
ვითის ეზოს და, თუმცა ვერაფერს ხედავდენ იმის გარდა,
რომ სახურავი იყო კრამიტის, კედლები ალავ თეთრად
შედებილი, ალავ შავი — რადგან წვიმას ჩამოერეცხა, —
მაინც იდგენ და უყურებდენ. ზოგი სახლს, ზოგი მაღალ
ხეს, ზოგი არაფერს უყურებდა.

სახლი გასაკვირველი არატრით იყო და კიდევ რომ
ყოფილიყო, ვერავინ შეამჩნევდა. რადგან მრავალი წლე-
ბის განმავლობაში ახსოვდათ ასეთი, ხედავდენ ყოველ
დღე და თვალი შეჩვეული იყო.

სახლი ოდესღაც იდგა ქალაქის მოშორებით.

ქალაქი იყო პატარა. იწყებოდა აღმოსავლეთით და თავდებოდა სადგურთან. მას შემდეგ, რაც ქვიტკირის სადგური აშენდა და მატარებელმა დაჰკივლა ხევში, სახლების რიცხვი გამრავლდა. სახლები დალაგდა რკინის გზის ლიანდაგის ორივე მხარეს. გაიყო ორ ნაწილად და გაიზარდა დასავლეთისაკენ. ქუჩა გაგრძელდა, სახლებმა იჩოჩეს, მოვიდენ დავითის სახლთან. რომელიც წინად ქალაქ გარედ იდგა და გაუსწრეს კიდევ.

ქალაქი იყო ძველი და თამცა იშვიათად მოიძებნებოდა ეხლა კაცი ისეთი, რომელიც მოსწრებოდა მას რკინის გზაზე, მაგრამ გადმონაცემი ყველას ახსოვდა.

ძველები ამბობდენ — ქალაქში შეიცვალა მხოლოდ ის, რომ გამრავლდენ დუქნები და სახლები. ქალაქს რომ ახალი შენობები მოაკლო. დაინახავ — ცვლილება სულ არ მომხდარა.

სერიდან ქალაქი სჩანდა ჩამხოზილი. გახუნებული ყავრით დახურული ხის პატარა კოლოფები მიკროდენ ერთმანეთს და ეძინათ. გარშემო იყო მზე, ცხელი და გულსავსე. დუქნებში იდგა ნოტიო და ბნელოდა. ზოგიერთს, ძუნწი რომ არ ყოფილიყო, დღითაც სჭირდებოდა ლამფის ანთება.

წინად მოედანი იყო ქალაქის შუაგულში. როცა ქალაქი გაიწია დასავლეთისაკენ. ბაზარი იქვე დარჩა, მაგრამ შუაგული აღარ იყო. ამით ბაზარს არაფერი მოკლებია და იყო ისეთივე, როგორც წარსულში.

პარასკეობით რგვალი მოედანი, მისი მიმყოლი შესახვევები და ჩიხები ივსებოდა სოფლებიდან ჩამოსულ გლეხებით. ურმებით. გასაყიდათ ჩამორეკილ ოთხფეხით, მხარზე ყაბალახ გადაგდებულ აზნაურებით. თავსაფრიან დედაკაცებით და ადგილობრივ მოქალაქეებით. რომელნიც ამ დღეს იცვამდენ ახალ ტანისამოსს და ფეხსაცმელს. ფეხსაცმელი ისვრებოდა დათლილ საზამთროების, ნესველის კანში და იფლებოდა საქონლის ნეხვში.

მახლობელ ეზოებში ჭიხვინებდენ აზნაურთა ცხენები, პატარა მჭლე ცხენები. მაგრამ მიმინოსავით სწრაფი და მოქნილი, როცა მოხვდებოდათ მხედარის მათრახი.

მოედანზე, დუქნების წინ, ქვაფენილზე ქუჩის პირად. ყველგან ისხდენ დედაკაცები, ხნიერი გლეხები და წინ ეწყობთ კალათები. სოფლიდან მოქონდათ. თხილი, კვერცხი, აბრეშუმის ძაფი, ყაჭი, ქლიავი, პატარა დოქებით ღვინო — ცოტა მოჭვანკული და წყალნარევი. ქალაქიდან მიჰქონდათ მარილი, ნავთი, ფერ-უმარილი, სასაქმებელი ზეთი. ტყეების სიჩუმეს მიჩვეული სოფლელები რეტდასხმული დადიოდენ აჭრელებულ და ახმაურებულ მოედანზე და ქუჩებზე, ჩერდებოდენ დუქნების წინ სრულიად უმიზნოთ. მიშტერებოდენ ვიტრინებს, გროვდებოდენ კუთხეში მდგარ ლატარიასთან.

ლატარიას კალათში ეწყობ მოვარაყებული საშაქრეები, ვაზები და ათასგვარი აჭრელებული ჭურჭელი. ლატარიის პატრონი ოხუნჯობდა და ბედის ცდას ურჩევდა ყველას. ზოგიერთი გაბრიყვდებოდა, გაიმეტებდა ფულს, დაატრიალებდა სინის რგოლს, მაგრამ შეხვდებოდა შპილკები ან ისეთი უმნიშვნელო, რომ მიცემულ ფულად არ ღირდა. ლატარიის გარშემო შეგროვილნი უყურებდენ და უცდიდენ ვის შეხვდებოდა საშაქრე, ვაზა, ან საინი, მაგრამ ასეთი არავინ იყო. ყველას ერთიდაიგივე ხვდებოდა.

სიცხისაგან დაღალული, თავსათვარ მოფუთხული დედაკაცები დაათრევდენ კალათებით ნეშოდაფარებულ ყველს და თუ არ კითხავდი რა ჰქონდა გასაყიდი, არ გადახდიდა კალათს. მაშინაც კი, როცა მუშტარი სინჯავდა ყველს და კალათში ხელებს უფათურებდა. გამყიდველი თავის მეზობლად მდგომ დედაკაცს ელაპარაკებოდა.

მოედნის გვერდით, საგანგებოთ მიჩენილ ადგილზე, ყიდდენ ხარებს და ცხენებს.

პარასკევამდე რამოდენიმე დღით გამყიდავი ასვენებდა ხარს, წინა დღით კი იმდენს აჭმევდა, რომ პირუტყვი დაწოლასაც ვერ ახერხებდა: პარასკევ დღით ისევ ამოუვსებდა ფერდებს, რომ მუშტარისთვის სუქნათ მოეჩვენებია.

გამყიდავი მხოლოდ მოიყვანდა გასასყიდელს. მას არ სჭირდებოდა მუშტორის ძებნა და გასაღებაზე ფიქრი, რადგან ამაზე ზრუნავდენ დახელოვნებული დალალები.

დალალობა კი ყველას არ შეეძლო. დალალობისთვის ბევრი რამ იყო საჭირო: მოქნილი ლაპარაკი, ფეხის სიმარბე, ტყუილის თქმა, თვალის დაპაჭუნება და სხვა მრავალი, რაც მხოლოდ მათ იციან.

ამოიღებდა თუ არა ნიშანში დალალი რომელიმე ხარს, დატრიალებდა მას თავზე, ხან ერთ მუშტარს მოიყვანდა, ხან მეორეს. პატრონს არაფერი ეკითხებოდა. დალალი, რომელსაც მუდამ ხელში ჰქონდა შოლტი, გამოართმევდა პატრონს ხარებს, შემოატრიალებდა, მარდათ გაართნიებდა, კბილებს უსინჯავდა და ყოველნაირად ცდილობდა დაერწმუნებია მყიდველი, რომ ასეთი საქონელი არსად მოიძებნება.

ძალიან ხშირად დალაღს წინად არასოდეს ყავდა ნახული არც პატრონი, არც მისი ხარი, მაგრამ იმდენ ამბებს უყვებოდა მყიდველს პირუტყვის ღირსებაზე, რომ ვინმეს შეეძლო ეფიქრა, თითქო შეზრდილი ყოფილიყო ხართან. დალალისთვის საჭიროა აგრეთვე ერთი თვისება—დალალი უნდა იყვეს მომთმენი. ხან პატრონი გაჯიუტდება და ფასზე არ დათანხმდება, ან მყიდველი დააპირებს ხელიდან დაძრომას. პატრონს უნდა შეუწყყრე და ჩუმად უთხრა, რომ მისი საქონელი იმის ნახევარიც არ ღირს, რაც აძლიეს, — მყიდველი კი უნდა მოაბრუნო და იმასაც ჩუმად უთხრა, რომ უკეთესს ვერ იშოვის და მისი ხათრისთვის რამენაირად დაითანხმებს პატრონს.

ბოლოს, როცა ხარი გაიყიდებოდა, ჩვეულების თანახმად, მყიდველი ჩოხის კალთაში გახვეული ხელით ჩამოართმევდა ხარის რქებში ჩაბმულ ბაწარს, მიაბამდენ პირუტყვს ლობეზე და ამის შემდეგ ღვინის დასალევად მიდიოდენ.

შუა დღიდან სამიკიტნოები იგსებოდა. სადაც ადგილი აღარ იყო, დანგასთან დგებოდენ.

დოქნის პატრონისთვის უმთავრესი საზრუნავი იყო ღვინის მიტანა. რადგან კერძებზე მუშტრები დახარბებუ-

ლი არ იყვენ და ხშირად მარტო ღვინოზე გადადიოდენ.

მყიდველი და გამყიდავი თავის მოვალეობად სთვლიდენ პატივი ეცათ დალაღისათვის. დალაღს დუქნამდე ერთი ორი სხვაც აეტორღილებოდა. ერთხანს ისინი კიდევ ლაპარაკობდენ გაყიდულ ხარის ღირსებაზე, მაგრამ ჩქარა ივიწყებდენ, რადგან მშიერ სტომაქზე ღვინო მალე აბრუებდათ.

სამიკიტნოებში ისე ხმაურობდა და ირეოდა ხალხი, როგორც ფუტკარი სკაში. ფხიზლობდა მხოლოდ მიკიტანი, რომელიც ერთსადაიმავე დროს განკარგულებას აძლევდა მოსამსახურე ბიჭებს, რომელ სუფრაზე რამდენი კვარტი მიეტანათ, უნდა ეანგარიშნა დანახარჯი მიმავალთათვის, რომელნიც ყოველთვის ჭინჭყლობდენ, რომ ამდენი არ იყო დაღეული და ხან ერთ, ხან მეორე სუფრასთან უნდა მისულიყო ღვინის დასალევათ. მიკიტანს თუმცა ღვინის დაღევა სულ არ უნდოდა, მაგრამ ამას მოითხოვდენ მუშტრები და ისიც იძულებული იყო დაეღლია და მათი გულის მოსაგებად ეჩვენებია სმის ერთი ხერხი, რომელიც ყოველთვის სიცილს იწვევდა მუშტრებში.

ბაზრობაზე ჩამოდიოდენ ისეთებიც, რომელთაც არც საყიდელი და არც გასაყიდი ჰქონდათ, მაგრამ ყოველ პარასკევს უსათუოდ გაჩნდებოდენ.

თუმცა მათ სოფლებში ღვინოც ბევრი ჰქონდათ და საკლავიც, მაგრამ მოვალეობათ სთვლიდენ ამ დღეს ბაზრის სამიკიტნოში გაეტარებიათ დრო.

ამ დღეს ისინი იცავამდენ ახალ ტანსაცმელს, უძიროებს. ჩაიგლიდენ მოედნის მიმყოლ ქუჩას, ერთმანეთს მოსძებნიდენ და შიმოიგ სამიკიტნოში ათაგობოინ დღეს.

განიერ მხრიბზე ყაბალახ გადაგდებულნი, ვიწრო წილზე დოინჯ შემორტყმულნი დინჯათ შედიოდენ დუქანში, მიკიტანს თავაზიანი სალამით მოიკითხავდენ და მალე იმგვარადვე მღეროდენ და ითვრებოდენ, როგორც სხვები.

დიდი ხნიდან მოედანი ასე ხვდებოდა ყოველ მზიან პარასკევს.

ხანდახან შეიძლებოდა გვეფიქრა, რომ მოედანზე და-
ყრილი ქვები, ძიწა, მოედნის ძიძყოლი დუქნები და ყვე-
ლაფერი ის, რაც მოედანს ეკრა, უხსოვარ დროიდან ისე
იყო გაქლენთილი ხალხის ყაყანით, ფეხზე მოვაჭრეთა
ყვირილით, ხარების ზმუილით, ცხენების ჭიხვიხით და
დუქნებიდან გამოსულ სიმღერით, რომ შესაძლებელია
ერთ დღეს, როცა შემთხვევით პარასკევი პარასკევს არ
დამსგავსებოდა, ან და, წარმოვიდგინოთ, პარასკევი დღე
დაკარგულიყო, თითონ მოედანი გაიმეორებდა პარასკე-
ვის ყველა თვისებებს.

და შეიძლება ამიტომაც იყო, რომ მოედანი არ ივიწ-
ყებდა უკვე დიდი ხნის წინედ გარდაცვლილ რომელიმე
გამოჩენილ დაღალს, მოქეიფეს და მოქეიფეთა შორის
ერთ ძალალ, შავ-წვერა აზნაურს, რომელსაც ახირებული
ჩვეულება ჰქონდა: ჩამოუვლიდა მოედანზე ყველა მედუ-
ქნეს, გაუწევდა ფეხს და მედუქნეს უნდა ეკოცნა მესტზე.
მედუქნეები ყოველთვის უყოყმანოთ უსრულებდენ სურ-
ვილს, თითქო მოვალეხი ყოფილიყვნენ, რადგან იცოდენ,
რომ ამის მეტი მაღალს, შავ-წვერა აზნაურს არაფერი
უნდოდა.

*
*
*

სხვანაირი იყო ქალაქი, და განსაკუთრებით მოედანი,
ჩვეულებრივ დღეებში.

რამოდენიმე დღე კიდევ ეყარა დუქნების წინ, მოე-
დანზე, ქუჩებში გატეხილი კვერცხები, საზამთროების კა-
სი, სახაგასი გახსნისი საქოალის ხეხვი. პარასკევის ნაკ-
ვალევი ხშირად რამოდენიმე დღე რჩებოდა და თუ წვიმა
არ ჩამორეცხავდა, ან ქარი არ მიახვეტდა, ორი ნაპარას-
კევი ერთად ეყარა. მოედანი ღებულობდა ისეთ სახეს, რო-
გორც სუფრა ქორწილის შემდეგ, როცა დაღლილი მას-
პინძელი მეორე დღემდი გადადებს ალაგებას.

შაბათ დილიდან მედუქნეები მოწყენით იჯდენ დახლ-
თან, ან ეძინათ სკამზე დუქანში შესავალ კარებთან.

დიდი ხნიდან ისე იყვნენ ერთმანეთთან შეჩვეული,
რომ სალამის მიცემა დავიწყებოდათ და ორი დღეც რომ
არ ენახათ ერთი მეორე, ისე შეხვდებოდნ, თითქო რამო-
დენიმე წუთის წინ ერთად იყვნენ.

დილით გამოდიოდენ თავის ბნელ დუქნებიდან, სადაც ღამეებსაც ითევდენ, მალარიისაგან გაყვითლებული კაცები, დგებოდენ მზის ქვეშ და თბებოდენ. ზოგიერთი გავდა იმ ფარგას, რომელიც დუქნის წინ ეკიდა რკინის კაკვზე, ზოგში დაბერებული იყო ციება და ტანი იყო გაბერილი როგორც სათესლე კიტრი.

გალვიძების შემდეგ რამოდენიმე წუთით ხვდებოდენ ერთმანეთს სამიკიტხოში, სადაც ჭაჭის არაყს სვამდენ და შემდეგ ისევ შორდებოდენ.

მოედნის ერთ კუთხეში დიდიხნიდან იდგა ოთხკუთხიანი ბუდკა, რომელზედაც აფიშებს აკრავდენ.

რადგან ქალაქში ხშირად არ იმართებოდა წარმოდგენა, ხანდახან თვეობით რჩებოდა ძველი აფიშა და მიაყვითლდებოდა ფიცარს.

ყოველი ახალი აფიშის გაკვრა დიდ ცნობისმოყვარეობას იწვევდა. შორიდგან თვალს მოკრავდენ თუ არა აფიშების გამკვრელს, რომელსაც ერთ ხელში ვედრო მიქონდა წებოს სითხით, მეორე ილიაში კი გრძელი ქალღლებების შეკვრა, ბრბო თავს იყრიდა ბუდკის გარშემო ზოგი ელოდა აფიშას, ზოგი შეყურებდა ბუდკას, რომლის საძირკველი გამონგრეული იყო და იდგა მხოლოდ ნამუსზე, ზოგი კიდევ მათ, ვინც გაჩერებულიყო.

რამდენიმე ხნით, როცა გათავდებოდა აფიშის გაკვრა, ყველა მას მიაჩერდებოდა. ზოგი ხმამაღლა კითხულობდა, ზოგმა რამდენიმეჯერ წაიკითხა და მაინც უყურებდა. ხირომანტი, გიპნოტიზიორი, რომელსაც მრავალი საჩუქრები და მედლები მიუღია სპარსეთის შაჰისაგან და ბუხარელ ემირებისაგან, პირდებოდათ საკვირველ სანახაობას: დააძინებდა ყველას, დარბაზიდან შეუმჩნეველად გააქრობდა რამოდენიმე კაცს, გამოიცნობდა სხვის აზრებს და ბოლოს, თუ ვინმე მოისურვებდა, თავს მოკვეთდა და შემდეგ ისევ გააცოცხლებდა.

აფიშაზე ამ საზღაპრო ადამიანის სურათიც იყო. კაცი ისეთი, როგორც ყველა-გაკრახმალეული საყელოთი და თვალები... თუმცა თვალებს რას გაუგებ, ქალღღზე ყველა ერთფერი გამოდის.

აფიშები რიგდებოდა შემდეგ დუქნებში და თუ რამეს არ გახვევდენ, ეკიდა კუთხეში სხვა ძველ აფიშებთან ერთად.

მაგრამ ასეთი რამ ხდებოდა იშვიათად და ამიტომ დღეები უფრო ხშირად იყო მოწყენილი.

უმნიშვნელო რამეც, რისთვისაც სხვა მდგომარეობაში შესაძლოა არავის მიექცია ყურადღება, ყველას გამოაცოცხლებდა. ქალაქში ბევრი იყო ძალლი და რადგან მოედანზე ხშირად ეყარა კბილგასაკრავი, ძაღლებს უყვარდათ იქ ყოფნა.

ხანდახან ორი ძალლი გადაებმებოდა ერთმანეთ. ამის დანახვაზე ქვაფენილებიდან გადმოდგებოდენ გამვლელები, აღვიძებდენ მედუქნეები ერთი-მეორეს და სიამოვნებით უყურებდენ — როგორ ცდილობდენ ძაღლები დაშორებას და ვერ ახერხებდენ.

მაყურებლები ჯერ იცინოდენ, უყვიროდენ, ბოლოს კი დაურობდენ ქვევს და ვეღარ იკავებდენ ხარხარს, როცა ძუკნა გაიქცეოდა და თან წაათრევდა გამწარებულ ხვადს. გამხიარულებული მედუქნეები ამის შემდეგ ფარდულის ქვეშ ნარდის სათამაშოთ დაჯდებოდენ.

წინად, სანამ შეეჩვეოდენ, ართობდათ კიდევ გიჟი მიხაც, რომელზედაც ამბობდენ რომ ნეკნების მაგიერ ერთიანი ძვლის ფერდი აქვს და ხიშტიც ვერ უვნებს შიგნეულს.

მიხამ იცოდა მრავალი ლექსი, გრძელი პოემები და ვინც დვინოს შეპირდებოდა, მისთვის დაიწყებდა დეკლამაციას:

ართობდათ კიდევ რუსი დედაბერი, რომელიც მუდამ თან ატარებდა კალათში მამალს და ხელით კრუხს.

ხანდახან, თითქო იმისთვის, რომ დასიცხული მედუქნეები ნირვანიდან გამოეყვანათ, ვინმე მოიტანდა საკვირველ ამბავს:

— ახალი ამბავი არ იცით? ეგერ ვიყავი ახლა ონისიმეს დუქანში. ვერძი დაკლეს და მაკე გამოდგა.

— არ შეიძლება ეგ ამბავი... ვერძი მაკეთ არ იქნებოდა! არ იჯვრებდენ მედუქნეები.

— ჩემი თუ არ გჯერათ, მიდით და ნახეთ.

— არ მომხდარა არასოდეს... ვერძი არ დამაკლება. არ ყოფილა ასეთი შემთხვევა!

— მიდით და ნახეთ! ირწმუნებოდა ამბის მომტანი. საჩქაროთ შორდებოდა მათ და ჩაუვლიდა დანარჩენებს, რომელთაც ჯერ კიდევ არ გაეგოთ ეს საოცარი შემთხვევა.

ვაჭრებზე მეტი ჩვეულებრივი მოქალაქე ცხოვრობდა. რომ ადამიანები ერთმანეთისაგან არ გახიზნოდნენ, არც სახელები ექნებოდათ სხვადასხვა და ამიტომ ამ ქალაქის მცხოვრებნიც, თუ ყველაფერით არა, სახელით და სახით მაინც არ გავდნენ ერთი მეორეს.

იყვენ ისეთებიც, რომლითაც ამაყობდა ქალაქი. ერთ წარჩინებულ მოქალაქეს იუბილევც გადაუხადეს და ქალაქმა მიართვა ეტლი.

თუმცა ამ ეტლით მხოლოდ ორჯერ გაისეირნა წარჩინებულმა მოქალაქემ, მაგრამ ეს იმიტომ, რომ ეტლს გაუტყდა ღერძი და გოგრებიც დაემსხვრა.

მიზეზათ ამბობდნენ, რომ ქუჩებში ოღრო-ჩოღროები და რესორებმა ვერ გაუძლეს.

ჩუმად ლაპარაკობდნენ იმასაც, რომ ეტლი გაიმეტეს, რადგან სახმარათ აღარ ვარგოდა და მაინც უსაქმოთ ეგდო.

თუმცა უმრავლესობა ისეთი იყო, რომ ცუდლუტობით და ტყუილებით გაჰქონდათ დღეები და ზოგი თავის გასართობათ თავისთავსაც კი ატყუებდა, მაგრამ საერთოდ ყველა იყვენ გულკეთილი და თუგინდ უცნობი ყოფილიყო, მაინც ყველა მიდიოდა მის გასვენებაზე.

სალამობით ახალგაზრდებს უყვარდათ სეირნობა ქვაფენილზე, მოხუცებს კი სიკვდილის ეშინოდათ და ადრე იკეტებოდნენ ოთახებში.

შაბათიდან პარასკევამდე ქალაქი იყო მშვიდი, თითქო იკრეფდა ძალას, რომ იმ დღეს ისევ დაეხარჯა დაუ-

* * *

ზოგველად.

— სისულელეა! — სთქვა ატყამ, — ყურადღება არ უნდა მიაქციო, თითონ იზამდა დავითი. გამოყერყეტებუ-

ლი მოხუცია და დაავიწყდებოდა. რაც იმას წიგნები უკითხავს თავის სიცოცხლეში, აბა რა სიკეთე დაეყრებოდა!

დიდიხანია დავითი მოშორებული იყო ამ სახლს და ცხოვრობდა ქალაქში. ქალაქის ძველ მკვიდრებსაც დავიწყებული ყავდათ და არ მოვლოდენ მის დაბრუნებას.

დავითის უეცარმა ჩამოსვლამ შორეულ დიდ ქალაქიდან, საიდანაც მას მრავალი წლების განმავლობაში წერილიც არ გამოუგზავნია, გააკვირა ყველა. და ყველაზე უფრო ნიკა, რომელიც დავითის წასვლის შემდეგ, სრული ბატონი გახდა სახლის.

ძველმა ნაცნობებმა ინახულეს დავითი და გაიგეს, რომ მას დიდ ქალაქში ყველაფერი წაართვეს და ამიტომ დაუბრუნდა ძველ ბუდეს.

ცოტა დარჩა ქალაქში ისეთი, რომელსაც ახსოვდა დავითის წარსული, მაგრამ ბევრს ჰქონდა გაგონილი, რომ იყო პირი წარჩინებული ფრიად, უყვარდა წიგნების კითხვა და როცა წავიდა, დასტოვა ერთი ოთახი, სადაც თაროები სავსე იყო ტომებით.

როცა დაბრუნდა. თაროები ნახა ხელუხლებელი, მხოლოდ ზოგიერთ წიგნში აღარ იყო სურათებზე მიკრული თხელი ქაღალდის ფურცლები, რომელიც გასაჭირის დროს თუთუნის გასახვევად ეხმარა ნიკას.

სახლი დახვდა ცოტათი დაბერებული და ფერშეცვლილი, მაგრამ უარესიც რომ ყოფილიყო, მის იქით მაინც არსად წავიდოდა.

ნიკამ მიიღო დავითი სიხარულით, პირდებოდა უფრო უკეთ მოაწყობდა და ზრუნვას არ მოაკლებდა.

ყველაფერი დაიწყო კარგათ. დავითიც კმაყოფილი იყო ეხლა, რომ დანგრეული არ იყო ძველი ბუდე. მაგრამ ერთ დილას, როცა ჩვეულებრივად გათენდა, ნიკა, რომელიც ბუზსაც არ აკარებდა დავითის ოთახის კარებს, დაუკრიდებლად და დაუკითხავად შევიდა მასთან.

— ხომ არაფერი მომხდარა წუხელი? შემპარავი ხმით იკითხა ნიკამ.

დავითმა შეხედა და არაფერი უპასუხა.

— ხომ არ გაგიგონიათ ხმა... კარები ხომ არ გაუღიათ? ისეთი ოხერი ძილი ვიცი, ყურთან ზარბაზანიც რომ დამიცალო, გვერდზე არ გადაებრუნდები.

— რა მოხდა? აგერ როდისღაც იკითხა დავითმა.

ნიკამ მხრები აჩეჩა, ცალი წარბი ასწია და ერთხანს ასე იდგა.

თქვენ არ ყოფილხართ გუშინ საღამოს ოთახში, სადაც წიგნები აწყვია?

— ვიყავი...

— წიგნებს ხომ არ ეძებდით?

— აი ეს წიგნი ჩამოვიღე...

საწოლის თავთან სკამზე იდგა შავყდიანი წიგნი და ზედ სათვალეები.

— იატაკზე ხომ არ გადმოგიწყვიათ?

— იატაკზე? არა...

— მაშ ალარ ვიცი რა ვიფიქრო!...

დავითი წამოჯდა ლოგინზე და ნიკას მიაცქერდა.

— ხომ არ გაუჭურდავთ?

— ქურდის ხელი არ უნდა იყოს. ვინ ქნა, ეს მაკვირვებს. თქვენსა და ჩემს მეტი სახლში არავინ ყოფილა. თქვენ არ გიქნიათ, მე მეძინა. წიგნები კი იატაკზეა დაყრილი...

დავითმა საჩქაროთ ჩაიკვა და ორივენი წიგნთსაცავში შევიდნენ. თაროები დაცლილი იყო, წიგნები მწყობრად გალაგებული იატაკზე. გადაარჩიეს და ნახეს — არათფერი აკლდა.

ბევრი იფიქრეს, ითათბირეს. გამოკითხეს მეზობლებს და როცა ვერაფერი გამოარკვიეს, წიგნები ისევ შეაწყვეს თაროებზე.

ორი დღის შემდეგ იგივე განმეორდა. წიგნები ისევ გადმოლაგებული და იატაკზე დაწყობილი ნახეს. თანჯარა შიგნიდან დაკეტილი. დამე ხმა არ გაუგონიათ.

ვერც შემოვიღოდა ვინმე. რადგან კარებს ურდულეები ჰქონდა გაყრილი.

ნიკამ ამის შემდეგ ჩამოიარა ნაცნობები და ყველას გააგებინა ეს საკვირველი ამბავი.

— ალარც ვიცი რა ვიფიქრო, — სთქვა სარიდანმა, —
აქ რალაც მამაძალლობა უნდა იყოს!..

მაგრამ ზოგიერთები იმ აზრს დაადგენ, რომ სახლს მაგ-
ნე სული შეეჩვია.

იმავე დღეს ქალაქში უცნაური ხმები გავრცელდა.

გახშირდა ლაპარაკი, რომ ეს ადგილი ძველადაც იყო
ნაძრახი. ზოგმა დავიწყებული ამბავი გაიხსენა: წინად და-
ვითის სახლის ახლო პატარა ღელე ჩამოდიოდა. ღელის
პირად იდგა პატარა სახლი, რომელსაც შეეჩვია ჭინკა.
ერთ დღეს, როცა სახლის პატრონმა ღვდელი მოიყვანა
საწირავად, ეშმაკეული არც მას დაერიდა. ცეცხლთან
ძვდარ ღვდელს ლოცვის დროს გადაშლილ სახარებაზე
დაეცა კვერცხი ბუხრიდან და შეშინებულმა ლოცვა ვერ
განაგრძო. ზოგი თუმცა ამბობდა, რომ ჭინკა აღმოჩნდა
ძეწობლის ბიჭი, რომელიც სახლის გვერდით მდგარ ხი-
დან იპროდა კვერცხებს ბუხარში და შეისწრეს კიდევ,
როცა კვერცხებით უბე ავსილი ზედა ტოტზე გადიოდა
მაგრამ ყველას არ სჯეროდა ეს და ამიტომ ადგილი დარჩა
ნაძრახათ.

ამ დღის შემდეგ დავითის სახლი სხვანაირი ეჩვენებო-
დათ მოქალაქეებს. კედელიც ისეთი არ იყო, როგორც სა-
ზოგადოთ სახლებს აქვს, სახურავიც ისეთი, თითქო გაფ-
რენაზე იყოს გამზადებული და ხის კიბეზე რალაც კვალი
სჩანდა. ახალგაზრდები ეცინოდენ შეშინებულ დედაბერს,
ლამით კი თითონაც შორიდან უვლიდენ სახლს. მოხუცები
აფორიაქდენ და ერთმანეთს ხშირად დაუწყეს ნახვა.

ქალაქში ვიღაცამ ეჭვი გამოსთქვა სავრახარდაზე და
თავდაპირველად ბევრი ჩააფიქრა იმან.

— სახით შავია, ლამე ვერც კი დაინახავ... ჩვენებურია
არ ესმის, და ვინ იცის რომელ ქვეყნიდანაა!..

* * *

პატარა ქალაქი, სადაც ერთმანეთს ისე ხშირად ხედავ-
დენ, რომ მობეზრებული ყავდათ ერთი მეორე, ყოველ
უცნობის ჩამოსვლა საერთო ყურადღებას იქცევდა. გან-
საკუთრებით დიდი ფასი ქონდა უცხოელს. ერთი, ორი
დღე დაურიდებლად დაყვებოდენ. გაჩერდებოდენ მის წინ
და შეყურებდენ სახეში. ზოგიერთი ცნობისმოყვარე

ყველგან დასდევდა და აინტერესებდა გაეგო-რას სჭამდა რესტორანში. რას ყიდულობდა დუქანში.

სავრახარდამ დიდიხანია გადააცილა ამ საზღვარს. მისი სახე მოსაწყენი გახდა.

ყველასათვის უცხო დადიოდა ქუჩებში, ჩაივლიდა დუქნებს და როცა იშოვიდა განმარტოებულ ადგილს, ჩამოჯდებოდა და პატარა ჯოხით ჩუჩქნიდა მიწას და ეთამაშებოდა კენჭებს.

სავრახარდამ ისწავლა რამოდენიმე სიტყვა და ამბობდა მათ მხოლოდ მაშინ. როცა აუცილებელი ხდებოდა.

ის იყო ინდოელი, ინგლისის ჯარის კაცი, თავისიანებს ჩამორჩენილი.

მრავალი ვაჟკაცი წავიდა იმ წლებში ამ ქალაქიდანაც და ბევრი შინ აღარ დაბრუნებულა. იმ წლებში ომი იყო შორეულ ქვეყნებში და სავრახარდაც წაიყვანეს თავის თბილ ქვეყნიდან.

თუმცა პატარა ქალაქი არავის არაფერს უშავებდა და მით უფრო გერმანელებს და ინგლისელებს, რომელთა ღამბაღალ ძაფსაც კი ეხარბებოდნენ მოქალაქენი, მაგრამ ისინი აქაც შეეებნენ ერთმანეთს.

შორს იყო ეს ქალაქი იმ ადგილებიდან, სადაც რამოდენიმე წელიწადი იბრძოდა სავრახარდა, მაგრამ მისთვის სულერთი იყო, რადგან ყველა ქვეყანა მაინც შორს იყო სამშობლოდან.

სავრახარდა კი, ისე როგორც მისი დანარჩენი ამხანაგები, იყო გამგონე, მორჩილი და მიეჩვია იმას, რომ ერთი ქვეყნიდან მეორე ქვეყანაში ათრევდნენ.

ჯარის ნაწილი, სადაც მსახურობდა სავრახარდა, შესდგებოდა ინდოელებისაგან.

როცა თეთრკანიანები ხედავდა მათ, ასე ეგონა-რომ ყველა ერთმანეთს გავდა.

ხოგიერთს შესაძლოა ისიც უკვირდა, თუ რატომ აქვს თითოეულ მათგანს ცალკე სახელი, როცა შეიძლება, ყველას ერთხანად ერქვას, რადგან, სულერთია, მათი გარჩევა ძალიან ძნელია და ჰგავან ერთმანეთს. როგორც კამეჩები.

საგრახარდა იყო შავი, როგორც კამეჩი. მისი დიდი შავი თვალები იყო ისეთივე ღმობიერი, ალერსიანი და უცოდველი, როგორც ზაქის.

როცა ქალაქში შემოვიდნენ უცხოელი ჯარის კაცები, სადგურის გვერდით მათ აუგეს თეთრი კარვები და იქ დააბანაკეს.

პირველ ხანებში მოქალაქენი ესეოდნენ იმ ადგილს, სადაც კარვები იყო.

ზოგიერთი მთელი დღე იდგა ქვიტკირის დაბალ ღობესთან და მისჩერებოდა უცხო ხალხს ჯარის კაცის ტანსაცმელში.

ინდოელებიც მიეჩვიენ, აღარ ბრაზდებოდნენ მოუშორებელ მოქალაქეებზე და ყველაფერს მათ თვალწინ აკეთებდნენ.

დილით ისინი დიდხანს ლოცვილობდნენ, დაურიდებლად გატიტვლდებოდნენ, იბანდნენ ტანს და შემდეგ ეყარნენ მიწაზე და იფიცებოდნენ მზეზე, რომელიც მოაგონებდათ თავისი ქვეყნის ცხელ მზეს.

რამოდენიმე თვის შემდეგ ინდოელებმა დაკეტეს კარვები და წავიდნენ ზღვისაკენ.

საგრახარდა კი ვერ წაყვა მათ.

საგრახარდა ჩამორჩა, რადგან ძლიერ ავად იყო და წაყვანა არ შეიძლებოდა.

დიდხანს იავადმყოფა საგრახარდამ, დიდხანს იწვა საავადმყოფოში, იმდენ ხანს, რომ ყველა მისი ნაცნობები და მეგობრები შავ ზღვას გაშორებოდნენ.

და როცა იმდენათ გამოჩნდა, რომ სიარული შეიძლო, აღარ იყო საშუალება და გზა დაწეოდა მათ.

საგრახარდას შერჩა მხოლოდ რუხი ტანსაცმელი, რომელიც ჯარში ყოფნის დროს ჰქონდა, ფოლაქები ლომით, ლურსმებით მოჭედილი ფეხსაცმელები, თავსაკრავი და ქარგასი-დანა შესაწირავისათვის, — რომელიც ყველა მის ამხანაგს ჰქონდა სახლიდან წამოღებული.

საგრახარდა დარჩა ქალაქში, მაგრამ იმედს არ კარგავდა, რომ დაბრუნდებოდა ინდოეთში. სადაც ჩასული იქ-

ნებოდენ ყველა ისინი, ვინც გადაურჩა ომს და გზაში არ დაიმარხა.

პირველ ხანებში სავრახარდას ყველა თანაგრძნობით ხვდებოდა და წყალობდა. მაგრამ როდესაც შეაჩვიეს თვალი ისე, რომ აღარ ეუცხოვებოდათ მისი შავი კანი, სავრახარდას გაუძნელდა ცხოვრება.

მთელი დღეები დადიოდა მარტო, გაიარდა ბაზარს, ჩაივლიდა მთავარ ქუჩას, ჩაათავებდა დუქნებს და როცა მოივლიდა მთელ ქალაქს. წავიდოდა სადგურზე და უცდიდა მატარებლის მოსვლას.

მატარებლის მოსვლისას სავრახარდა გამოკოცხლდებოდა, უხაროდა როცა მეზავრი გაკვირვებით შეხედავდა.

სადგურში შესასვლელთან სავრახარდას მეგობარი ყავდა. რომელთანაც თუმცა ლაპარაკს ვერ ახერხებდა, მაგრამ საათობით იჯდა. ეს იყო ფეხსაცმელების მწმენდავი აისორი კოსტა. მუდამ მხიარული შავგვრემანი ახალგაზრდა ბიჭი, რომელიც ყველას ეძახოდა დოსტის.

კოსტა გრძნობდა, რომ სავრახარდას უხაროდა მის ახლო ყოფნა. სავრახარდა იღიმებოდა, როცა კოსტა მუშტრისაგან გადმოგდებულ ფულს მარდათ ჩააგდებდა პატარა უჯრაში. კოსტას სწამდა, რომ სავრახარდა ნამსიანი არ არის, კარგი თვალი აქვს და სასარგებლოთაც მიაჩნდა ინდოელის მოსვლა.

სავრახარდა იჯდა შორი ახლო და თუ არ უღიმოდა კოსტას, თლიდა ჯოხს, ან ეთამაშებოდა ძაღლებს, რომელნიც ყოველთვის ბლომად არიან სადგურთან.

ხანდახან სავრახარდა იყო სევდიანი. ასეთ დღეებში სავრახარდა ამჯობინებდა მარტო ყოფნას. გავიდოდა ქალაქის გარეთ, წამოწვებოდა მიწაზე და მთელი დღეები რჩებოდა იქ. აზნავდებოდა მოგონებები, სტანჯავდა სიმორე თავის ქვეყნიდან და თვალწინ ეხატებოდა შორეული სამშობლო.

აგონდებოდა სოთყელი, დიდი მდინარე, რომლის გარშემო მუდამ მწვანობდენ ხშირი ლერწამის ტყეები. აგონდებოდა მეზობლები, რომლებიც შესაძლოა ამ წუთში

სადმე ყოფილიყვნ სანადიროთ წასული, ან ნავტიკებით მიემგზავრებოდენ.

ასეთ წუთებში სავრახარდა ყნოსავდა კიდევ იმ დამატრობელ სურნელებას, რომელიც აქვს ველურ ყლორტებს ტყეებში. ეს სურნელი აღიზიანბდა მას და ისე ცოცხლად გრძნობდა მათ, რომ ხანდახან სიზმარი ეგონა უცხო ქვეყანაში ყოფნა. დახუჭავდა თვალებს იმისათვის, რომ როცა ისევ გამოახელდა დაენახა — ყველაფერი იყო ცუდი სიზმარი და სხვა არაფერი.

მაგრამ როდესაც გაახელდა თვალებს, ხედავდა ისევ გადატრუსულ ველს და ცას, რომელიც აქ არასოდეს იქნება ისე წმინდა და უძირო, როგორც შორეულ სამშობლოში.

სალამოთი სავრახარდა ნელი ნაბიჯით ბრუნდებოდა ქალაქში. ლანდათ გაივლიდა ქუჩებს, რომლებსაც აქაიქ დანათოდა გაჭვარტული სანათი.

სანამ შერჩენილი ჰქონდა ძველი ტანსაცმელი, რომლის ფოლაქებზე ინგლისის ლომი იყო გამოჭრილი, სავრახარდას კიდევ ჰქონდა დაბრუნების იმედი. მაგრამ დრო ჯავშანსაც ცვეთავს. სავრახარდას შემოაცვდა ტანსაცმელი.

როდესაც ფეხსაცმელიც ისე დაეხა, რომ გაუტიტვლდა ფეხი, სავრახარდა იძულებული გახდა გადაეყარა ისინი.

ერთხანს ფეხშიშველი დადიოდა, მაგრამ ვილაც მადლიანმა აჩუქა ძველი წულამესტი, მეორემ ხონური შალის ბლუზა იდაყვებზე გახეული. სავრახარდამ დიდი სიხარულით მიიღო საჩუქარი და ბედნიერათ იგრძნო თავი. მერე სადგურზე ბარგს აზიდვინებდენ და სავრახარდა კმაყოფილი იყო, რომ მათხოვრობა არ სჭირდებოდა.

* * *

ნიკა დადიოდა მეზობლებში, შედიოდა დუქნებში და ყველას თავის გაკვირვებას უზიარებდა.

დავით თუმცა დიდ ყურადღებას არ აქცევდა ამ ამბავს. ყველას ეუბნებოდა რომ ჭინკები არ არიან და ამიტომ ადამიანის მეტი ვერავინ იზამდა. მაგრამ დაძინების

წინ ყოველთვის კეტავდა ოთახის კარებს და სკამსაც მიადგამდა.

რამდენიმე დღე არაფერი მომხდარა. წიგნებისთვის არავის უხლია ხელი, მაგრამ ერთ დილას უფრო უარესი ნახეს: სამწარეულოს თაროები დაღლილი იყო. საინები, კასრები, ქოთნები ელაგა მიწაზე. კერიაზე გადებულ ძელებზე იდგა უნაგირი და მოსართავები ხეებზე იყო შემორტყმული.

— ვილუპებით ხალხი! სასოწარკვეთით იძახდა ნიკა, ვერ ჩერდიბოთა ერთ ადგილას და გაბოროტებული დადიოდა ქუჩებში.

— შემოგვიჩდა ვილაცა... აღარ გვაყენებს. ალბად ის უნდა, რომ ავიყაროთ აქიდან. წავალთ ბატონო, მეტი რა ჯანია... აბა ეშმაკს ხომ არ ჩაუვარდებით ხელში!

ამის შემდეგ ის მოქალაქენიც, რომელნიც აქამდე ყურადღებას არ აქცევდენ დავითის სახლში მომხდარს, ჩაფიქრდენ და აღარ იცოდენ რა ეთქვათ.

ქურდი რომ ყოფილიყო, წაიღებდა რამეს, მოპარული არაფერია. უნაგირი ისე იყო მოკაზმული ხეებზე, რომ კაცის ხელი ვერ შესძლებდა ამას. ნიკა მთელ დღეს ეწვალა რომ, გაეხსნა მოსართავები. დავითი თუმცა კიდევ ამბობდა, რომ ჭინკები არ არსებობენ, მაგრამ ის აზრი გამოსთქვა, რომ ხანდახან მთვარეულები სჩადიან საკვირველს.

— გინდა მთვარეული დაარქვი და გინდა ქაჯი. ეს კი ვიცი, რომ გლახათ შემოგვიჩდა რალაცა... ცუდათ არ გათავდეს ეს ამბავი! ამბობდა ნიკა.

— ჩემს ჩამოსვლამდი არაფერი მომხდარა? იკითხა დავითმა.

— არაფერი. მხოლოდ ერთხელ, რამოდენიმე წლის წინად, როცა წერილი გამოვიგზავნეთ და გთხოვეთ ერთხელ მაინც დაგეხედათ თქვენი კარ-მიწამოსათვის. შუალამე იქნებოდა რალაცამ დაიღმუილა ამ ოთახში. არ გავადა არც ძაღლის, არც კატის, არც ტურის ხმას. გავბედე. შემვედი ოთახში, მაგრამ ვერაფერი დავინახე.

— საკვირველია! — ოდნავ გასაგონათ ჩაილაპარაკა დავითმა.

— დაუდარაჯდები ერთი-ორი ღამე — სთქვა ნიკამ, —
ენახავ მაინც ვინ არის რა არის!

ეს აზრი მოეწონა დავითს.

— მხოლოდ არავის გაუშხილო. თუ კაცია, გაიგებს და
აღარ მოვა!

იმ ღამეს გადარაჯებული იყო ნიკა. მთელ ღამეს ხეს-
თან ამოფარებული იდგა.

არავინ მოსულა, მაგრამ დილით ნახეს ჭურჭლეული
მიწაზე დალაგებული და უნაგირი ისევ ისე შეკაზმული.

— შეიძლება წაგეძინა და ამ დროს მოვიდა ვიძე?
კითხა დავითმა ნიკას, რომელიც ასე შეშენიებული არასო-
დეს ენახა.

— თვალშიც არ დამიპაჭუნებია. მიშტერებული ვიყავი
სამზარეულოს... ერთხელ ქათმები შეინძრენ ხეებზე, თო-
რემ მეტი ხმაც არ გამიგონია.

— ძაშ რა ვქნათ? იკითხა დავითმა.

— აღარ ვიცი. თქვენ როგორც გენებოს, მე კი უნდა
უტიო აქაურობას. კაცი ოჯახს ვეკიდები, ქალიც ამორ-
ჩეული მყავს და ამ დროს ეშმაკს რად უნდა შევეწირო?!

— მეც გადავალ!

— კარგს იზამთ, — მოუწონა ნიკამ, — დროებით მა-
ინც გავეცალოთ. ენახოთ, გამეორდება თუ არა. საშიშიც
არის თქვენი მართლ დარჩენა.

დავითმა და ნიკამ გადასწყვიტეს სახლის დატოვება,
როგორც კი ახალ ბინას მოიძებნიდნენ.

ნიკა ისევ დარაჯობდა ეზოში. დავითს, ყოველშემ-
თხვევისათვის, ეძინა გაუხდელათ. უხილავი კი ყოველ მე-
ორე ღამეს შედიოდა სამზარეულოში და იქაურობას აფო-
რიანებდა.

ქალაქში ბევრს ლაპარაკობდნენ ამ უცნაურ ამბავზე და
ღამით ერიდებოდნენ ქუჩაზე გავლას. დღით კი მიდიოდნენ
დაფითთან, სხვადასხვა რჩევას აძლევდნენ: ზოგი დარწმუ-
ნებული იყო, რომ ამის ჩამდენი იქნებოდა ინდოელი და
ერთი მეორისაგან დაფარულად საჩუქრებსაც იმეტებდნენ
სავრახარდასთვის. რადგან ეშინოდათ მისი.

დილიდანვე ხევში ჩანდა ნისლი. ნისლი ეკიდა ხეებზე სახურავებზე, აივნებზე. ჰაერი იყო დაგუბებული და თბილი.

ატყამ ძალლი გააძლო და ეზოდან გავიდა.

ქალაქი იყო როგორც მიძინებული, თითქოს ჯერ არც გათენებულა. ნისლი, ქვა, მიწა, სახლი, ადამიანის სახე — იყო ერთი ფერის.

ატყამ ჩაიარა ქუჩა, ვერავინ ნახა და ერთ დუქანში შევიდა.

— მარტო ხარ, სარდიონ?

ატყამ პასუხს არ დაუცადა. დაზგის წინ სკამზე ჩამოჯდა. თამბაქო ქალაქის ნახევრში დაგრიხა.

— ნაწყენი ხომ არაფერზე ხარ?

სარდიონმა სახე მიუბრუნა და თვალები გამოქაჩა.

— ნაწყენი კი არა, ბრაზი მაღრჩობს კაცს. არ იქნა, ვერაფერი ვასწავლე იმ ჩემს გამოჩერჩეტებულ დედა-კაცს... ვეუბნები, დილაზე ნუ ჩამოხვალ დუქანში, გლახა ფეხის ხარ...

— ნავსიანია?

— საკმარისია დილას დუქანში მოვიდეს, რომ იმ დღეს უკუღმა წავიდეს ჩემი საქმე. ამ დილაზე რალაცაზე მოწანწალდა და მას აქეთ არავის ფეხი შემოდგმულა დუქანში.

სარდიონი გაძდა ცოლის გინებით. როცა დამშვიდდა, ატყამ ჯიბიდან ამოიღო კარტი და „კონჩინკას“ თამაშს შეუდგენ.

გარეთ ნისლი იყო. შორიდან წვიმის ხმა ისმოდა. დუქანში არავინ შემოდინდა.

ატყა და სარდიონი გულდასმით თამაშობდნენ. მხოლოდ ხანდახან ეშლებოდათ, რადგან კარტი იყო გაქონილი და ვერ ცნობდნენ-ბაბუა იყო, თუ ვალეტი.

როცა ატყა შინ დაბრუნდა, ძალლი არ დახვდა.

უგემურად დაღეჭა სადილი და ტახტზე მიეგდო. ძილი არ ეკარებოდა. გამახვილებულ ყურს ესმოდა როგორ ეცემოდნენ სახურავზე წვიმის პირველი, ღონიერი წვეთები.

ატუა ვერ ისვენებდა. მრავალჯერ იკითხა ძაღლი. შემდეგ მოიარა მეზობლები, ქუჩები, გამოკითხა მედუქნეებს და მაინც ვერაფერი გაიგო.

სალამომდე კიდევ ჰქონდა იმედი. მაგრამ არც დაღამების შემდეგ მოვიდა ძაღლი.

ატუა ხშირად გადიოდა ეზოში, უძახდა, უსტვენდა. ძაღლი არ სჩანდა.

— მომპარა ვიღაც ოხერმა... ყველას თვალი ჰქონდა იმაზე გამოჭყეტილი. ან შეიძლება თვალი ეცა იმ უბედურს და ავდია სადმე!

გარედ ქარი იყო და წვიმა. ბჟოლის დიდი ხე ურტყამდა ტოტებს აივნის რიკულებს. წვიმა რეცხდა სახურავს, კედლებს, ქუჩებს, ღელეები ჩამორბოდნენ დაღმართებზე. მოედანზე, დაბლობ ქუჩებზე წყალი დგებოდა ტბათ.

ქარს ჩაეჭრო სანათურბი დაკიდებული დუქნების დარაბებზე.

— რა გადაყევი ამ ძაღლს! წყენით უთხრა ატუას ცოლმა. — ძაღლებს გაჰყვებოდა დილით ძუკნას მისდევდა, თითონ დავინახე. დაწეჭი. დაიძინე. მაგის მეტი სადარდებელი ნუ მოგცეს ღმერთმა. გირჩევნია ცოლ-შვილზე იფიქრო. ვის გაუგონია, ჭალარა შერეული კაცი ქოპაკისტვის თავს იკლავდეს!

ატუას ბრაზით აენტო თვალები.

— ქოფაკი თითონ ხარ! ის ძაღლი ყველას მერჩია!

— მეც?

— შენ რა წითელი კვერცხი ხარ?!

ცოლმა რაღაც წაიბურტყუნა, გაიხადა და ლოგინში ჩაგორდა.

ატუამ ერთხანს კიდევ უცადა. გარედ გამოდიოდა, ქარს და წვიმას არ ერიდებოდა. უძახდა, უსტვენდა. ძაღლი არსად იყო.

არ დაერიდა ავდარს და გავიდა ქუჩაში.

ქარი ატრიალებდა წვიმას. ქარი ხრიდა ხეებს. წვიმა მდინარედ მიექანებოდა დაღმართებზე და ქვაფენილებზე გუბეთ იდგა.

გაიარა კაცმა სანათურით ხელში. მქრთალ სინათლეზე ატუამ დაინახა: ქუჩა დაეფარა წყალს და წვიმის წვეთები ტყვიებივით ეცემოდნენ ტბათ დამდგარ წყალს. სანათურით და პლაშჩით ატუამ იცნო, რომ უცნობი კონდუქტორი უნდა ყოფილიყო. ატუა გაყვა მას. ქუჩაში არც ერთი ძაღლი არ სჩანდა. მთელ ქალაქში ძაღლი არ ყეფდა.

ვის შეეძლო მოეპარა? ცოტა საეჭვო კაცია ბიქტორა. მისი თვალები სულ საეშმაკოთ იყურება, სიარულიც შემპარავი აქვს. სიტყვასაც ისეთს გეტყვის, ვერ გაიგებ რაშია საქმე, ოჯახებში მაინცადამაინც არ ენდობიან, ეშინიათ ხელი არაფერზე წაცდეს... მაგრამ ძაღლზე არ გაბრიყვდებოდა.

ანტონიც ისეთია, რომ სულ პატიოსნათ ვერ ჩათვლი. მაგალითად, სხვისი წერილების გახსნა და წაკითხვა უყვარს: კაცს ერთმანეთზე გადაგვიდებს, თითონ კი დაიძვრენს თავს. მაგრამ ძაღლების მოყვარული არასოდეს ყოფილა.

ვალოდუას, მართალია. ერთი ცუდი ჩვეულება აქვს — რესტორანში დაგპატიუებს, მოითხოვს რაც კარგია, არაფერს დაიკლებს და მერე, როცა გამოსისტიკინდება და შეთვრება-ჩხუბს ასტეხს, მიგატოვებს და შენ მოგიხდება ნახაოჯის გასტუმრება, მაგრამ ნადირობა იმას არ უყვარს და ერთხელაც არ უთქვამს, რომ ძაღლი ენატრებოდა. როცა ატუას ძაღლი ნახა, ყურადღებაც არ მიუქცევია.

ძაღლი ვილაცას ყავს ამ ქალაქში. ყავს მაგრამ ვის? კოლია, ეგნატე, ლენტორი ავარა ხალხია, ძაღლის სურვილი იმათ არასოდეს ჰქონიათ.

მედუქნეებში? შეიძლება მათ შორის ყავდეს ვინმეს.

როცა იქნება ძაღლი ინახება, გამოჩნდება ვინ არის ქურდი, მაგრამ მანამდე დამჭლევედება, შიმშილისაგან მსუნაგობას მიეჩვევა, ან შეიძლება მუნნი დემართოს.

ვინ შეიწუხებს თავს, ვინ დაბანს!

წვიმა სცემდა ატუას სახეში. ქარი უფრიალებდა გრძელ პალტოს კოჭებამდე დაშვებულს.

როდესაც კონდუქტორმა სადგურისაკენ გადაუხვია, ატუა ბნელში დარჩა.

კიდევ გაიარა რამოდენიმე შესახვევი. ღამეში ძლივს იცნო სარიდანის სახლი და კარებს მუშტები დაურთო. არავინ აღებდა. ატუამ უფრო ღონიერად მიარტყა, მიადახა რამდენიმეჯერ. მაგრამ ვერ აგონებდა. ქარის ხმა გრგვინვასაც ფარავდა.

— რამ დააყრუა ეს მამაძალი! იგინებოდა ატუა. ის იყო დააპირა დაბრუნება. რომ კარები გაიღო.

ატუა შევიდა ოთახში.

წყალი წურწურით ჩამოსდიოდა პალტოდან. ქუდიდან, სახიდან.

სარიდანი გააკვირვა მოულოდნელმა სტუმრობამ ასეთ ღამეში. დაავიწყდა რომ კარებთან მხოლოდ თეთრეულში იდგა. გაოცებული მიშტებოდა და იფხანდა ბანლით დაფარულ მუცელს... მერე ფეხი წაუყარა ქუსლ შათელილ წულებში და ჩამოჯდა მაგიდაზე.

— გაიხადე. ბიძია, ეგ პალტო. ვერ ხედავ ტბა დააყენე?!

ატუამ პალტო მიაგდო კუთხეში.

— რამ აგატრუა ამ წარღვნაში.

ატუამ უამბო თავისი გასაჭირი

— ძალი მოგპარეს? მერე მაგას დარდობ?

— ჩემს თავს მერჩია სარიდანი! სასახელოდ მყავდა. იმაზე ვიყოლიებდი თავს. დილას ჩემთან იყო. გულიც დამშვიდებული მქონდა, არაფერს მოველოდი. (კუდი ამიღი იყო. დუქანში წავედი, ცოლს დავუტოვე. იმ ოჯახდასაქცევს გარედ გაეშვა და მას შემდეგ აღარ მოსულა. არ ვიცი ვიზე მივიტანო ეჭვი, ვინ მიზამდა ამას...

სარიდანს გააზმორა.

— მე რა გიშველო?

— შენს იქით გასაქანი არ მაქვს. თუ მიშველი, შენ მიშველი!

მეორე ოთახში ჯერ არ აპირებდენ ძილს. მეორე ოთახიდან ორი ახალგაზრდა ხმა ისმოდა. ერთი იყო სარიდანის და არიადნა. არიადნა გიტარაზე აყოლებდა ხმას. მეორე ხანდახან აპყვებოდა.

— ეჭვი არავიზე გაქვს?

— არა.

— არავის გამოუგზავნია მოციქული მომყიდე ძაღლიო?

— არავის.

— საგანგებოთ არავინ მოსულა შენთან ძაღლის სანახავათ? ან ხომ არ უთქვამს ვინმეს, ძაღლს გიქებენ და უნდა მაჩვენო?

— არ მახსოვს.

— სანადიროთ ხომ არ უთხოვია ვინმეს?

— სანადიროთ?!

ატუა ჩაფიქრდა. სარიდანმა თითქო ციხის გასაღებს მიაგნო, დაუტრიალდა ამ აზრს, ჩამოთვალა ყველა მონადირე ქალაქში, ვის როგორი ძაღლი ყავს, ვინ რაზე ნადირობს, ვინ როგორი კაცია.

— გელაძეს მეძებარი არ ყოლია! სთქვა ატუამ.

— არ ყოლია! გაიმეორა სარიდანმა. ხელი მაგრად ჩაჭიდა თეთრეულს ძირს, რომ არ ჩამოვარდნოდა და გაიარა ოთახში.

მთელ ქალაქში ყველა მონადირეზე უფრო გელაძეს იცნობენ მონადირედ.

თუმცა მისი ნანადირევი არავის არასოდეს უნახავს. მაგრამ მონადირეს თუ ვინმეს დაუძახებდენ, უპირველესათ მას. გელაძის მამა, გელაძის ბიძა, გელაძის ბაბუა მონადირენი იყვნენ. ასე ახსოვდათ ძველ მოქალაქეებს, ასე ახსოვდათ მოხუც მედუქნეებს და ამიტომ არავის უკვირდა, რომ ეს გელაძეც მათ კვალს გაჰყვა.

დილით, არც ისე ადრე, როცა იღებოდა დუქნები, ერთ დანიშნულ დროს, მაღალი, ხმელი. თვალეზე ჩამოწეულ შალის ქუდით, კაყიანი თოფით მხარზე, დინჯად ჩაუვლიდა დუქნებს. გვერდით მისდევდა პატარა ყავისფერი მწევარი, რომელიც შეიძლება მხოლოდ იმიტომ ეგონათ მწევარი, რომ ძალიან გამხდარი იყო.

გელაძე ჩაივლიდა მთავარ ქუჩას. სალამს არავის მისცემდა, თითქო ნაცნობი არავინ ყოლოდა. ჩაათავებდა დუქნებს, ქუჩის ბოლოს წყაროზე პეშვით წყალს დალევდა. სახეზე შეისხამდა. დაუცვდიდა ძაღლს, სანამ ისიც დალევდა, გადაივლიდა რკინის გზის ლიანდაგს, გაყვებოდა მა-

ზუთით გაშავებულ ბილიკს ლიანდაგის გვერდით და ქალაქ-გარეთ გავიდოდა.

ზაფხულის დღეებში გორაკის გადაღმა ველი იყო ცხელი და ბალახები დამწვარი მზისაგან. მწვანე იყო მხოლოდ იქ. სადაც იდგა ნოყო, დაუმშრალი და შმორიანი.

ნაშუადღევს გელაძე ბრუნდებოდა ქალაქში. ისევ დინჯათ და მდუმარეთ მიაბიჯებდა ქუჩაში, ჩაუვლიდა დუქნებს. არავის შეხედავდა არც მარცხნით, არც მარჯვენით. გვერდით კი ძუნძულით მიჰყვებოდა პატარა, ყავისფერი მწვეარი.

გელაძის შინაური ამბავი არავინ იცოდა. ჯერ არავის ეთქვა, რომ იყო მასთან. ზოგს წარმოდგენაც ჰქონდა, რომ ეს კაცი დილით აღმოსავლეთიდან დასავლეთით ჩავიდოდა, ნაშუადღევს დასავლეთიდან აღმოსავლეთში ბრუნდებოდა. მაგრამ სად იყო გზის ბოლო, არავინ იცოდა. ის თითქო დაუსვენებლად და შეუჩერებლად ზომავდა მანძილს ქვევით და ზევით.

ყველა ვინც ცოტა რამეთი განიჩეოდა ქალაქში, იცვამდა წკიპათ, დიდ სახლში უყვარდა გავლა გამობერილ პორტფელით ილიაში, უკადრისობდა ჩვეულებრივ მოქალაქეებს, ან დადიოდა იკლიკანტურად, მას მთელი ქალაქი აუხირდებოდა, უკანიდან დაუწრუპუნებდენ; დუქნებიდან გულმოსაკლავ სიტყვას მიაძახებდენ.

გელაძესთვის კი ჯერ არავის გაუცია ხმა. მას თითქო არც ხედავდენ. ის მხოლოდ მოშინაურებული მოჩვენება იყო ქალაქში, სადაც ძალსაც არ აუვლიდენ გვერდს, რომ არ მოეალერსათ, ან ქვა არ ესროლათ.

— არ ყოლია, არც ახლა ეყოლება! წამოიძახა სარიდანმა.

ამაში ორივენი შეთანხმდენ.

სარიდანმა ჩამოთვალა ყველა მეზობლები, გზადაგზა გახსენებისას ზოგს ლანძღავდა, ზოგს დასცინოდა და ხანდახან ისე გაიტაცებდა რომელიმე მოგონება, რომ თავდავიწყებით და გატაცებით ლაპარაკობდა. მაშინ ატყუას მოა-

გონებდა რატომ მოვიდა ამ წვიმიან ღამეში, რა დიდა მწუხარებაა ეს მისთვის და რაზე აჯობებდა ეფიქრათ.

— რა გამიჭირვე საქმე მუნიანი ძაღლით! ძაღლი კი არა, მამაჩემი არ მიტირია! წყენით ჩაილაპარაკებდა სარიდანი. მაგრამ ისევ ძაღლის ქურდის გამოძიებას დაუბრუნდებოდა.

სარიდანი უეცრად დაკვიწიალდა, ხელები მოიფშვნიტა და გაჩერდა ატუას წინ.

— კაცი არ ვიყო, თუ არ მოგაძებნიო!

ატუას, რომელიც აქამდე თითქმის უიმედოთ იყო და შეიძლება მხოლოდ იმიტომ მივიდა სარიდანთან, რომ გაეზიარებია მწუხარება. ეხლა იმედი მიეცა.

შეიძლება ეს ბედნიერი დღე ხვალ გათენდეს. სარიდანი რომ შეიწუხებდეს თავს, ამაღამაც ინახება ძაღლი. ხვალ კი, ბედნიერი დღე იქნება: ძაღლი ისევ შემოვა ოთახში, თვალებით ეტყვის უბედური ღამის თავგადასავალს, შემდეგში კი გარეთ არსად გაუშვებს. იყიდის ძეწკვს და ატარებს თან.

ატუა წამოდგა.

— რა გაგიყვანს ამ სხმაში! დარჩი და დაიძინე. ხვალ ერთად ავდგებით და საქმესაც შეუდგებით. არიადნა!

მეზობელ ოთახში შეწყდა გიტარის ხმა.

— დაუგე იმ ტახტზე! უთხრა სარიდანმა.

რადგან ატუა უარზე იდგა, არიადნაც არ შეპატიჟებია.

არიადნა ზრდილობას იჩენდა მხოლოდ უცოლო მამაკაცებთან, ცოლიანები მისთვის კაცებში არ ითვლებოდნენ. არიადნა ყოველ ცოლიან ვაჟს გამოტირებულად სთვლიდა. მასთან ლაპარაკი დროის დაკარგვით მიაჩნდა.

შეიძლება ასე მოქცევა ხანდახან ჭკუაზე შორს არ იყოს. შეიძლება ამიტომაც იყო, რომ ახალგაზრდა ვაჟებში არიადნას სახელი ყველაზე უფრო ხშირად იცვითებოდა.

პატარა ქალაქში ყველაზე უფრო ძნელია შეყვარება. შეყვარებულს ენატრება მარტო ყოფნა სატრფოსთან, წასვლა ისეთ ადგილას, სადაც არავინ არის. პატარა ქალაქში კი, თუმცა ბევრი ყუდრო ადგილია, მაგრამ თავზე

ხელაღებული უნდა იქნე, რომ გაბედო განმარტოება ქალ-
თან. მეორე დღეს მთელმა ქალაქმა იცის, მედუქნეებიც
ლაპარაკობენ და თუ ბედმა გაგილიმა და გაულახავი გა-
დაურჩი ქალის ნათესავ ბიჭებს, იმაში დარწმუნებული
უნდა იყო, რომ სატრფო თქმით ათრიეს სახლში.

არიადნა არც თმით უთრევიათ, არც განმარტოებულა
ვინმესთან, მაგრამ ქუჩაში კი მატარებლის ჩამოვლის
დროს ბაქანზე მუდამ ვაჟებში დადიოდა ფარშავანგით
კუდგაშლილი.

არიადნას მსუქანი, წითელი სახე ბევს სახეზე უარე-
სი იყო ქალაქში. მაგრამ, თურმე მარტო სახე არაფერს
ნიშნავს.

არავინ იცის საიდან დაიწყო ეს ამბავი, მაგრამ მთელ
ქალაქში ვნებიან ქალის სახელი ჰქონდა.

— როცა ქალი გამკრავია, სახეზე თეთრი ბზუკები
იცის! ამბობდენ ქალაქში და რადგან არიანდეს ლოყები,
შუბლი და ხანდახან ნიკაპიც პატარა თეთრთავიანი მუწუ-
კებით ჰქონდა დაყრილი, არიანდა ყველას თვალში დაუ-
შრეტელი ვნება იყო.

ქალს ახარებდა ყურადღება, რომელსაც იჩენდენ ვა-
ჟები და თუმცა არასოდეს გაბრიყვებულა და განმარტო-
ებულ ადგილას არავის წაყოლია, მაგრამ სამაგიეროდ დუ-
ქნების წინ ტკეპნიდა ქვაფენილს ისევე გულმოდგინეთ,
როგორც სხვა მრავალი.

არიადნა უფრო ხილდებოდა თავს და ამწუხრებდა მხო-
ლოდ ის, რომ ვერაფრით მოიშორა მუწუკები.

ნაცნობებში გაიგო, რომ შველოდა გამხმარი ღამურას
შიგნეული, ზოგმა ოფოფის ნაღველაც ურჩია, მაგრამ არა-
ფერმა უშველა.

ბოლოს ბედს შეურიგდა და იმითაც კმაყოფილდებო-
და, რომ სანამ ქუჩაში გავიდოდა, დიდიხნობით იდგა სარ-
კესთან და ფრჩხილებით სრესდა თეთრთავიან დამწიფე-
ბულ ფერისმჭამელას.

მხოლოდ ერთი რამ ძალიან უკვირდა ქალს: მას წმინ-
და სიყვარული უნდოდა, ვაჟები კი ყოველთვის ქარაგმე-
ბით ელაპარაკებოდენ.

— სახში რომ არ მივიდე, გადაირევიან! უარზე იდგა ატუა.

მეტი არავინ შეპატიჟებია. ატუამ სოველი პალტო ჩაიცვა. არიადნამ აღარ დაუცადა მის წასვლას. მეორე ოთახში გაბრუნდა. კარები მიახალა. გიტარა ისევ ატირდა სიყვარულზე, საწამლაგზე, მთვარეზე.

— ხვალ მოდი იცოდე დილიდანვე... ისე არ შემიძლია. დამგეშე იმ შენი ძაღლით. მეც შემაცოდე. ძებნის ხასიათი მომეცე. ისე ვერაფერს გავაკეთებ!

მიდიოდა ატუა ღამეში და იწყევლებოდა.

ღელეები მოდიდებულყო. ნარვალები ავსილიყო და წყალი ნაპირებიდან გადმოდიოდა. სადღაც დარაბას შერჩენოდა სანათი. შუქზე ძლივს მოსჩანდა პატარა მოედანი და მოედანზე თეთრი ძეგლი, რომელსაც წვიმა რეცხდა.

უეცრად ქუჩა გადაირბინა ძაღლმა. ატუამ იცნო ვისი იყო ეს ნაგაზი და თავისი გაახსენდა.

ქარის ხმაურში და ღელეების ჩხრიალში ხანდახან ყურს ესმოდა, თითქო სადღაც ყეფდა ნაცნობი ხმა. არა, კი არ ყეფდა, ყმუოდა.

შესახვევში სამიკიტნოდან სიმღერა მოესმა. შეჩერდა, ჭუჭრუტანაში შეიხედა. მაგიდას შემოსხდომოდა რამოდენიმე კაცი. მაგიდაზე ორი საინი იდგა. ერთი პურით. მეორეზე ვერ გარჩია რა იყო. რამოდენიმე კვარტი ღვინით და ჩაის ჭიქები.

დუქნის პატრონს გაუხდელად დასძინებოდა დაზგაზე. მუშტრების შორიახლოს სკამზე ყვინთავდა პატარა ბიჭი წინსაფარით. ქალღმერთ აწებებული ღამა ჩხოლაგდა ოთახს.

მოქეიფეებში ატუამ იცნო სცენის მოყვარე ჟან ჟანიძე. ჟანი იჯდა სუფრის თავში და, სჩანდა, სუფრას დირიჟორობდა.

— აბა. მაგარი ბანი, ბიჭებო! მაგარი ბანი!

* * *

ახალი ბინა იპოვეს. დავითი და ნიკა მხოლოდ გამოდარებას უცდიდნენ. წვიმიანი დღეები ერთმანეთს წაება. ტა-

ლახში ეფლებოდენ ეტლები. სახლებში ჩადგა ნოტიო.

დაბინდების შემდეგ ადრე იძინებდენ. ღამით კიოდა მატარებელი.

დავითის სამზარეულოში უცნობი ისევ ხშირად სტუმრობდა და დილით მიწაზე გადმოლაგებული ხვდებოდათ ჭურჭელი და უნაგირი ხეზე მიკრული.

დაღამებამდე დავითის ოთახი ყოველთვის სავსე იყო ნაცნობებით.

— ბოლო არ უნდა მოეღოს ამ ამბავს? სასოწარკვეთილებით კითხულობდა დავითი.

— გავეცლები და ბოლოც მაშინ იქნება! თავს ხომ არ შევაკლავთ ამ სახლს! ბედისადმი მორჩილი იყო ნიკა.

— წასვლა ადვილი საქმეა, მაგრამ არც ეგ ივარგებს!

— სხვა აზრის იყო სარიდანმა, — ვცადოთ რამე... შეიძლება გამოვარკვიოთ.

— მთელ ღამეებს ვუდარაჯებ.. ღამე დღეთ გადავაქციე. უძილობით თვალებში სინათლე აღარ მაქვს... ვერაფერი გავიგე... მაგის მქმნელი რომ ადამიანი იყვეს, კვალს მაინც დატოვებდა სადმე. ამ ტალახში ადამიანის ფეხი კი არა. ჩიტის დაცხიკვებაც სტოვებს ნაკვალევს...

— ერთი ჩინებული აზრი დამებადა! — სთქვა სარიდანმა. მთელ სამზარეულოში ნაცარი მოვაყაროთ... თუ რამე ცხოველია, არ შეიძლება კვალი არ დატოვოს. კვალის საშუალებით კი გავიგებთ. რა არის, ვინ არის.

სარიდანის რჩევა მოეწონათ. იმავე დღეს ნიკამ სამზარეულოში მთელი მიწა ნაცრით დაფარა.

მეორე დილით, როცა სამზარეულოს კარები შეაღის, თაროები ისევ გადმოლაგებული ნახეს და უნაგირი ხეზე მიკრული.

— მოიცა რაღაც კვალია! მიაძახა სარიდანმა ნიკას, რომელიც სამზარეულოში გადაბიჯებას აპირებდა.

ნაცარზე რამოდენიმე კვალი იყო. დააკვირდენ, დიდხანს უცქირეს, მაგრამ ვერ გამოარკვიეს. ნაკვალევი იყო რგვალი, თითქო ბურთი დავარდნილიყო. არ სჩანდა არც ქუსლი, არც თითები, სხვა ისეთი, რომელიც შეიძლებოდა რამეს მიმსგავსებოდა.

— კაცი არ უნდა იყოს! შეშინებული ხმით სთქვა სარიდანმა.

ალარც ახლა გჯერათ?! ამდენ ხანს კიდევ მქონდა იმედი, ახლა კი ცხადათ ვხედავ ვიღუპებით. დღესვე მივდივარ აქედან, მეტი აღარ შემიძლია! ვერ ისვენებდა ნიკა.

თითქმის ყველას სჯეროდა ადამიანისაგან არ იქნებოდა ეს, მაგრამ ზოგიერთმა მაინც გამოსთქვა ის აზრი, რომ შესაძლებელია სავრახარდო ყოფილიყო. რამოდენიმე მოქალაქემ ის აზრი გამოსთქვა, რომ შავი კაცის კვალი არ დააჩნდებოდა ნაცარს. ფეხი გახდილი ექნებოდა და შავი ხორცი კვალს ვერ დასტოვებდა.

სარიდანმა, რომელიც სამზარეულოში დაფორათობდა და სათითაოდ უკვირდებოდა ნაკვალევს, უნაგირის ახლო რაღაც მძივი იპოვა.

— ეს შენ დააგდე? მიმართა მან ნიკას.

— ჩემი ძაღლის ქარვა! უეცრად დაიყვირა ატუამ.

* * *

იმავე დღეს მთელ ქალაქს მოედო ქარვის პოვნის ამბავი. დაკარგულ ძაღლზე ყველა ალაპარაკდა.

— საკვირველია, — სთქვა სარიდანმა — შენი ძაღლის კისერზე ჩამოკიდებულ ქარვას რა უნდოდა იქ?

ატუა თითონაც გაოცებული იყო.

— ხომ არ ატყობდი რამეს, სხვანაირი ხომ არ იყო შენი ძაღლი?

— რა ვიცი, მე არაფერი შემიჩინევია ისეთი... მიყვარდა კი, ძალიან ჭკვიანი იყო. ხანდახან ისეთი თვალებით შემომხედავდა, თითქო რაღაცას მეუბნებოდა, თითქო მიცინოდა კიდევ:

— გიცინოდა?

— ალერსიანი იყო... არასოდეს დაუყეფია.

— არ დაუყეფია?

სარიდანი გაკვირვებული შეყურებდა ატუას.

— რაღაცას მეუბნებოდა... გიცინოდა... არ დაუყეფია ლამე გაპარვა იცოდა... ქარვა უნაგირთან ვნახეთ..

— ღვთის წინაშე, რაღაც სხვანაირი კი იყო, სხვა ძაღლებს არ გავდა!

სარიდანს სახე აენტო.

— აქამდი ვერ მითხარი ეს ამბავი? შე მამაცხონებულ-
ლო. ავსულს გაძებნივბდი ეს სამი დღე?

ქალაქში მალე გავარდა ხმა. რომ დავითის სახლის ამ-
ფორიაქებელი იყო ძალდი. რომელსაც კისერზე ჰქონდა
შებმული ქარვა. სთქვეს ისიც, რომ ქარვა ატუას ძალდის
კი არ იყო, არამედ ჭინკას რქის ნატეხია, რადგან ჭინკას
აქვს ყვითელი რქა.

ამას ამბობენ მოხუცები, მაგრამ ამის შემდეგ ახალ-
გაზრდებიც ერიდებოდენ ღამით ატუას სახლთან ახლო
გავლას.

თითქო პირველად შეხედეს ატუას სახლს უკვირდე-
ბოდენ კიბეს, კედლებს, სახურავს. თითქო ჩვეულებრივი
იყო და თითქო სხვანაირიც. ატუაც სხვანაირი გახდა, მისი
ცოლიც. ატუა ყველაფერ ამას ამჩნევდა და თითონაც ერი-
დებოდა ხალხის.

— ესლა მაკლდა! გამწარებული იყო ის — რათ არ
დაიქცა ის დღე. როცა ლეკვი გამომიგზავნეს! რა ოხრათ
მინდოდა, რომელი მონადირე მე ვიყავი!

* * *

დილით, როცა გაიღვიძეს, მზე დაყურებდა ქალაქს.
მზე იყო მხიარული, მზე დასცინოდა ატალახებულ ქუ-
ჩებს. ლაფში ამოსვრილ მოქალაქეებს.

ყავრის სახურავებიდან მზე იწოვდა სისოვლეს. სინეს-
ტეს. სინესტე ამყრალდა დუქნებში.

დასილულ ქვაფენილებზე ეგდო სახლებიდან გადმოყ-
რილი ჩვრები, დაგლეჯილი წალები, დამღვრჩვალი წიწი-
ლები.

მზე არ უხაროდა მხოლოდ ატუას. მისთვის სულ ერთი
იყო, გამოდარებას მხოლოდ იმით იმჩნევდა, რომ ტანსაც-
მელი არ უსოვლდებოდა.

თუ შინ არ იჯდა, მარტო დადიოდა ქუჩაში. ნაცნო-
ბები, რომელნიც წინად ხალისით ხვდებოდენ, ახლა ისე
უყურებდენ, თითქო მის სახლში მიცველებული ესვენა
და ნუგეშის თქმა ეძნელებოდათ.

ისინიც კი, რომელნიც წინად ბოდიშსაც არ მოითხოვდენ ისე ამოუღებდენ ჯიბიდან სათუთუნეს, ეხლა ისეთი ზრდილობით უკრავდენ თავს, რომ ატუას აწუხებდა ეს გადაჭარბებული თავაზიანობა.

— როდის გავხდი ასეთი პატივსაცემი კაცი! ფიქრობდა ატუა და თითონაც უკვირდებოდა თავის სიარულს, ხმას. — რომ გაეგო მართლა ხომ არაფერი ცვლილება მომხდარა მასში.

შინ მისვლა ეზარებოდა. მოქალაქეთა მოზიდება აზრაზებდა.

• შეუმჩნევლად სარიდანის ფანჯარას მიაღწა.

სარიდანს არ გახარებია ეს მოულოდნელი სტუმრობა.

— სარიდან! — ბოდიშით მიმართა ატუამ — არ მინდოდა შენი შეწუხება... შენი შემაწუხებელი ღმერთმა დაღუპოს... მაგრამ მეტი ვერ მოშითმენია! რას გავს ეს ამბავი? ყველა ისე მოკრძალებით მესაღმება, თითქო ატუა კი არა, თამარ დედოფალი ვიყვე..

— პატივსაცემი კაცი არ ხარ, თუ?

— შე კაი კაცი, აქამდი სამასხაროთ თუ ვინმე დაძიკავდა დაბლა თავს, თორემ სალამის მოცემაც დავიწყებული ჰქონდათ. ეხლა კი ნაცნობი და უცნობი წელში ორად იღუნება და ისე მხვდებიან, როგორც ყვენს...

— პატივს გცემენ და შენც შეიშენე.

სარიდანმა მეტი არაფერი უთხრა. ატუას გული ატკინა მეგობარის პასუხმა.

— სარიდან! — თითქმის დაიყვირა ატუამ. — ჩემს ჰკუაზე აღარ ვარ.. ვერ გამიგია, რამ გადარია ეს ხალხი? ვაჟკაცები მგონიხართ. დედაბრები ხომ არა ხართ! ვილაც მუდრეგი დაფოთარობს სამზარეულოში, მე კი რა შუაში ვარ?! ჰკვიან კაცად გთვლი და მითხარი, განა დასაჯერებელია უგონო ძაღლმა ჩაიდინოს ის. რაც დავითის სახლში ხდება?

— ქარვა... წამოცდა სარიდანს — ეს მაკვირვებს მხოლოდ!

— შენზე ნაკლებ არც მე ვარ გაკვირვებული... ერთი კი ვიცი, ჩემი ძაღლის კვალი იმ სახლიდან უნდა ვეძიო.

ატუას თანდათან ემატებოდა ბრაზი. სარიდანი ისევ გულგრილად იდგა და ატუას წასვლას ელოდა.

— ერთი მეგობრობა უნდა გამიწიო! ხმა დაბლა დაიწყო ატუამ, — ბოლო უნდა მოეღოს ამ ამბავს... რათაც არ უნდა დამიჯდეს, უნდა გავიგო... ბევრი ვიფიქრე და ბოლოს გადავწყვიტე: გაუდარაჯდები, ვნახავ ვინაა.. შენც უნდა წამომყვე.

— შენ რაც გინდა ის ქენი, — სიტყვის გათავებაც არ აცალა სარიდანმა, — მე კი ნუ გამრევ... ტკბილად ვცხოვრობ ჩემთვის, არავის ვაწუხებ, არავინ მაწუხებს... რათი გავიხადო საქმე სახლათორთო!

* * *

ცა იყო მოწმენდილი და ღამე ნათელი. მთვარე დახარბებოდა ხევში ჩაძინებულ ქალაქს. სახლებში დიდი ხანია ჩაქრს სინათლე. სანთელს ეკიდა მხოლოდ დავითის ოთახში — როგორც გატყობთ, გეძნელებათ აქედან გადასვლა თქვენი ნება იყვეს, დარჩით... მე კი, ნუ დამემდურებით, ხვალ უნდა მოვშორდე აქაურობას!

დავითი დაღონებული შეყურებდა ლოგინზე ჩამომჯდარ ნიკას.

— მაინცა და მაინც არაფერს გვიშავენს ის სულიერი. ერთი კოვზიც არ მოუპარავს. თუ ასე ახარებს ქოთნების გადმოლაგება მიწაზე, ალაგოს სანამ არ მოსწყინდება. თუ თავი მოგაბეზრა იატაკიდან ალაგებამ, მაშინ ყველაფერი გადმოვიტანოთ სამხარეულოდან და რომელიმე ოთახში დავაწყოთ.

ნიკა გაბრაზებული წამოვარდა.

— ძლივს მოშორდა ოთახებს და გინდათ ისევე შემოაჩვიოთ? როგორც ვნებავდეთ ისე ქენით, მე კი უკანასკნელ ღამეს ვათევ აქ..

მარტო დარჩენილ დავითს კიდევ დიდხანს არ დაუძინია.

აგონდებოდა შორეული ქალაქი, წარსული დღეები. ყველაფერი სიზმარივით გაქრა..

წარსულ ნეტარებიდან ხსოვნაში დარჩა მხოლოდ სიმწარე.

და ეხლაც, როცა დაბრუნდა დავიწყებულ ქოხში, რომელიც თითქო კუბო იყო მისთვის, უკანასკნელი თავშესაფარი, არ უსვენებდა ვიღაც და აქედანაც ერეკებოდა.

დავითმა სცადა კითხვა, გადაფურცლა წიგნი... თვალეები დადიოდა სტრიქონებზე. მაგრამ ვერ იმახსოვრებდა ვერც ერთ სიტყვას, რადგან ფიქრი სხვაგან იყო. სანთელი თავისით ჩაქრა.

მთვარემ შემოიხედა ფანჯარიდან.

შეზობელ ოთახში ჭრიჭინობდა ტახტი.

ნიკას არ ეძინა. ბორგავდა, ვერ ისვენებდა.

— ვნახოთ როგორ გაჩერდება! — ფიქრობდა ნიკა — ასეთი ჯიუტი მოხუცებულიც არ მინახავს, არაფერი მაგას არ აშინებს. რას მოეთრეოდა, რა უნდოდა! არ მიჯეროს და არ მიდის? ვნახოთ თუ არ წავა!..

* * *

სახლებში დიდი ხანია ხვრინავდნენ. ქუჩებში არავინ იყო. დარბაზებზე დაკიდებული სანათებიც ჩამქრალიყო. სადგურიდან ისმოდა ორთქლმავალის ქშენა. ადიდებული მდინარე ღრიალებდა ვიწრო კალაპოტში.

ატუა ფრთხილად მიიპარებოდა ქუჩაში. ღამე იყო ნათელი და თვალი ადვილად ხედავდა შორიდგან.

ერთი მთვარე იყო ცაზე, ქუჩაში დაგუბებულ ყველა ტბორიდან კი თითო მთვარე იხედებოდა კიდევ.

არ ერიდებოდა ტალახს, გუბეში მუხლამდე ეფლებოდა. ფეხასცმელს დაჰკიდებოდა მძიმე მიწა ხანდახან მთვარე თვალთმაქცობდა, ქვათ მოაჩვენებდა წყალს და ფეხს ჩაითრევდა შიდ.

შეუმჩნევლად გაუარა სადგურს. შესახვევში ძალსაც არ დაუყეფია. გადაირბინა პატარა ეზო და დავითის სამზარეულოს უკან ყორეს ამოეფარა. ყორე იყო დაბალი მთვარე ხეებზე მაღალი და დანათოდა ატუას.

— რავა დამბლა დაცემული დედაბერივით გასივებულა! ბრაზობდა ატუა, — მაინცა და მაინც ახლა მოუნდა ჩემთან არშიყობა..

უეცრად ატყუამ ლანდს მოჰკრა თვალი. ლანდი მიიმარ-
თებოდა სამწარეულოსკენ.

ატყუა გაეკრა სოველ მიწას.

სიჩუმეში მკაფიოდ გაიგონა კარების ჭრიჭინი.

ადგილზე ვერ ისვენებდა. მიწა ეჩვენებოდა ცხელი და
ყრუ გამჭვირვალი.

— გიგდე ხელში, ვერსად წამიხვალ თვით ბელზებე-
ლიც რომ იყვე, არ შემეშინდება!

ატყუა ფორთხვით გაყვა ყორეს, დაუარა თავი და დი-
დი სიფრთხილით მივიდა სამწარეულოსთან.

შიგნიდან ისმოდა კოვზების ჩხრიალი, საინების ხმა,
გაბედული სიარული.

— როგორ გათამამებულა! მორიდებაც აღარ აქვს! ბრა-
ზობდა ატყუა.

უკანასკნელი გამბედაობა მოიკრიბა, მოსძებნა კედელ-
ში ჭურჭუტანა და შეიხედა.

ოდნავ გაღებულ კარებში შემოსულიყო მთვარის ნა-
თელი. ატყუამ გაარჩია კაცის ლანდი, რომელიც იატაკზე
ალაგებდა ქოთნებს, საინებს, დოქებს.

როდესაც ჭურჭელის გადმოლაგება დაამთავრა, ლანდ-
მა გადმოიღო უნაგირი და კერიაზე გადადებულ ხეებზე
დასდო.

მთვარის შუქზე ატყუამ გარკვევით დაინახა, რომ უც-
ნობი იყო მართლა კაცი და არავინ სხვა.

— მაგრად მოუჭირე მოსართავს, შეკოჭე ნუ გეშინია,
ცხენი წიხლს არ გესვრის! — ბრაზი და სითამამე ემატე-
ბოდა ატყუას და თავისთვის შეუმჩნეველად კარებისაკენ მი-
იწყოდა.

სჩანდა უცნობი წვალობდა მოსართავების გადაბმაზე,
რადგან რამოდენიმეჯერ დაიხვნეშა კიდევც.

ატყუამ უეცრად კატასავით ისკუბა და შეაღო კარები.

— არ დაიძრე ადგილიდან! დაიყვირა მან.

ატყუა სწრაფად დაახტა უცნობს და სწვდა კისერში.

უცნობი შეეცადა შებრძოლებას, მოუქნია მოულოდ-
ნელ თავდამსხმელს ხის ნაპობი, მაგრამ ატყუამ მოასწრო,
გაუკავა მკლავები და კედელს მიაკრა.

— ატუა! როგორც მუდარა გაისმა უცნობის ხმა.

ატუამ იცნო მოწინააღმდეგე.

— ეს შენ ბრძანდები ყმაწვილო, ამ ამბებში?! კარგი ხელობა დაგიწყია, ამფერუმ შენს ვაჟკაცობას!

კაცი ჯვარცმულივით მიკროდა კედელს და არ იძროდა.

— მართლა ნიკა ხარ, თუ ეშმაკმა მიიღო მისი სახე? სთქვი, თორემ გაგათავე! გააფთრდა ატუა.

— მე ვარ!

— ვინ შენ, სთქვი!

— ნიკა...

ატუა თითქო ეხლა გამოირკვა. ნიკა ისევ კედელს იყო მიკრული და განძრევა ვერ მოეხერხებია.

— ეშმაკი და კუდიანი თითონ ყოფილხარ და რაღას აფორიაქებდი ქვეყანას?

ნიკა ხმას არ იღებდა.

— დამუნჯდი? თუ ბიჭი ვარ, ამოგადგმევინებ ენას! აქამდე რომ დაქაქანობდი და ყველას თავს გვაცოდებდი, ეხლა ლაპარაკი დაგაგიწყდა?

— ატუა.. როგორც ძმას... თითქმის კნავილით დაიწყო ნიკამ.

— ხმა! — შევარცხვინე შენი ძმობა... ქვეყანაში თავი მომჭერი, კაცი არ მეკარება, კელამ თითონ მეგონა ჩემი თავი დაკუდიანებული... რაღა მე ამითვალთვალე, რა დაგიშავე, რას მერჩოდი?

ახლოვდებოდა დილა. მამლები ყიოდნენ. მთელს ქალაქში მხოლოდ ორს არ ეძინა.

ნიკამ როგორც იქნა შესძლო კედლისაგან მოშორება და მძიმედ ჩამოჯდა უნაგირზე.

ატუა თავზე ადგა.

— მერე და, მაგისათვის სხვა საშუალება ვერ ნახე?

ნიკამ ამოიოხრა.

— შევცდი. სისულელე მომივიდა. ასე მეგონა. შეეშინდებოდა და წავიდოდა აქედან. ოცი წელიწადი კაცი აქ არ ყოფილა. სახლი და ყველაფერი ჩემს ხელში იყო. სრულ ბატონ-პატრონად მიმაჩნდა თავი.

— ახლა გართმევდა, თუ?

— მეკარგებოდა ყველაფერი... სადსარი აღარ აქვს და გაყიდვას უბირებდა. მე კი ოჯახს ვეკიდები და უსახლკაროდ ვრჩებოდი. ვიფიქრე, ისეთ საქმეს ვიზამ, რომ მაგასაც შევაშინებ, აქედან გავაქცევ და ხალხსაც დავაშინებ. რომ სახლის ყიდვა არავინ გაბედოს.

— შენთვის საქმეს იკეთებდი, მე რაღას გამწირე შე უსინდისო?!

ნიკამ დარცხვენით ახედა ატუას.

— ნუ იტყვი, ნუ გამამხელ! გამოგადგები რამეში... კაცი კაცისთვის არ დაიკარგება!

— მერე მე რაღათი გამოვიწმინდო ნამუსი? გინდა ცეცხლი წაუკიდონ ჩემს სახლს? მაგ ჭკუაზე არ გახლავარ... ჩემი ძალლი სადაა? — უეცრად კითხა ატუამ.

— მაგაში დამნაშავე ვარ შენთან, — წაიბუტბუტა ნიკამ და თავი დაბლა დახარა.

ატუამ მუშტი აჰკრა ნიკაპში და აუწია სახე.

— სად გყავს? სთქვი, თორემ სული გაგაცხებიე ეხლავე!..

ატუა დააფრინდა მხრებზე, მაგრამ მალე უშვა ხელი, რადგან ნიკა არ შებრძოლებია.

— ერთ ჩემ ნათესავს ვაჩუქე. იმან შემიდგინა დავითის შეშინების და გამოსახლების პლანი... ჯილდოთ მაინც და მაინც შენი ძალლი მთხოვა... ვიცოდი ნებით არ მომცემდი... მეტი ღონე არ მქონდა... წვიმები რომ დაიწყო, მაშინ მოვიპარე. იმავე ღამეს მივგვარე გაღმა სოფელში. აბა სხვათ რათ მინდოდა შენი ძალლი... რომელი მონადირე მე მნახე!. იმაში კი დამნაშავე არა ვარ, რომ შენი ძალლი ავი სულათ მონათლეს. შენც იცი, ქალაქში ბლომათაა ბითურა ხალხი.. ამაში, ღმერთმა იცოდეს, დამნაშავე არ ვარ..

დილა გათენდა უფრო ცხელი ვიდრე წინა დღეს. ფე-
ხი სტოვებდა მშრალ ნაკვალევს. ქუჩის ერთი მხრიდან
მეორეზე თამამად გადადიოდენ დატკეპნილ ბილიკზე.
შუადღისას მთელმა მოედანმა იცოდა რაც ღამით
მოხდა.

აკვირვებდათ მხოლოდ ატუას გამბედაობა და სწუხ-
დენ, რომ ნიკა იძულებული ხდებოდა დავითის სახლიდან
სამუდამოთ წასულიყო.

— : —

ს ა მ ი მ ვ ა ვ ი ლ ი .

წარსულის ბრძნობა.

I

თაშუნას დიდი, ფართე, ოდნავ მოგრძო თვალები აქვს. ეს თვალები შემოუგარსავს ქუთუთოებს, ქუთუთოები დაუცხრილავს წამწამებს. განსაკუთრებით ზევითა ქუთუთო და წამწამები მიყვარს; ქუთუთოები ხშირია და გრძელი, შუაში ჩალუნული და ბოლო ზევით აწეული. როცა მე თაშუნას ვუყურებ, ვგრძნობ: უძირო, უსაზღვრო, უნაპირო ვნება თითქოს ამძინებს ამ ქუთუთოებს და სურს ამოსჩქეფოს უნაპირო სიღრმიდან. და მაგონდება ბიბლიური ივდითი. ივდითსაც ასეთი ვნებით დატვირთული ქუთუთოები ექნებოდა, ასეთი ქუთუთოები რომ არა ჰქონოდა ივდითს, ოლომფრეს ვერ მოაჯადოებდა, ვერ დაათრობდა და თავისს სამშობლოს განსაცდელისაგან ვერ იხსნიდა.

თაშუნას უყვარს საღამო. მეც მიყვარს საღამო. მივალ თაშუნასთან საღამოთი, დავჯდებით ტახტზე, ტახტი ოთახის სიღრმეშია, ფანჯრის პირდაპირ. მე ვუყურებ, როგორ აქანავებს ქარი ფანჯრის გასწვრივ მდგომ აკაციას, აკაციის ტოტებიდან უცნაური ლანდები თრთიან, ხტიან, თამაშობენ კედელზე. ხან და ხან ეს ლანდები თაშუნას ნერვებს უშლის და მაშინ თაშუნა მეუბნება:

— შეშინია პაატა!

შეშინებული ქალი ყოველთვის ლამაზია, რადგან შიშს განსაკუთრებული თვისება აქვს: შიში ვერ ითმენს იმას, რაც ეტევა მიღებულისა და დაშვებულის ჩარჩოში. შიში

გარდა სიყვარულისა ადამიანის ყველა გრძნობებზე ძლიერია და ფართეა. ამიტომაც, შიში და სიყვარული მუდამ ერთად დადიან. როდესაც გიყვარს, გეშინიან სიყვარულის დაკარგვისა. როდესაც სიყვარული ყვავილებს ჰკრეფს ტუჩებზე, შიშის აჩრდილი თვალებს წაეპარება, ან გულში შეიჭვრიტინებს.

ჰო, როდესაც შეშინებული თაშუნა თავის თბილსა და რბილს ხელებს მუხლებზე დამიწყობს. თვალებში მთვარესავით ჩამანათებს და მეტყვის:

„მეშინია პაატა!“

მე ვიცი, თუ როგორ და რითი უნდა გავართო თაშუნა. მე მაშინ თაშუნას ისეთირამ უნდა ვუამბო, სადაც ბევრია სიყვარული, სიტბო, ალერსი.

აი, ახლაც, ამ საღამოს, თაშუნა ზის პიანინოსთან და უკრავს „თავო ჩემო“-ს.

თაშუნა ადგა, ტახტთან მიმიყვანა, დამაჯინა, თვითონ გვერდით მომიჯდა, ხელები ხელებზე დამაფარა და გარინდდა.

გარეთ ქარი ჰქროდა, კედელზე ავი ლანდები თამაშობდნენ, ვიცოდი, ეშინოდა თაშუნას ამ ლანდებისა, ვიცოდი ისიც, თუ რას მეტყოდა.

და მითხრა.

— „მეშინია პაატა!“

ასეთ შემთხვევაში მე თაშუნას რამე უნდა ვუამბო. უნდა დაუფრთხო ავი ლანდები.

— პაატა, — მეუბნება თაშუნა, — მიაბე შენს წარსულიდან საში რამ: ყველაზე ლამაზი, ყველაზე სასიხარულო და ყველაზე გმირული შემთხვევა, რომლითაც ამაყოფ შენ. და მე ვუამბე:

II

ყველაზე ლამაზი.

ეს ამბავი სამარაში მოხდა, თაშუნა, ვოლგის ნაპირას. შენ საქართველოს არ გაშორებულხარ, სამწუხაროდ, შენთვის ძნელი იქნება ამ ქალაქის წარმოდგენა. რამე რომ

წარმოიდგინო შესადარებელი ობიექტი უნდა გქონდეს. შენ ეს არა გაქვს. შენ რად გაგამტყუო, ქალი ხარ ვაჟებიც რომ ღარიბნი არიან ამ მხრით ქართველი ვაჟებიც! აბა მითხარი, თაშუნა, შენ ოცდა ათი წლის ქალი ხარ და ქუთაისი გინახავს? ტფილისში დაიბადე, ტფილისში აღიზარდე. ქუთაისი კი შეხთვის შორია, უცხო. საერთოდ. ქართველების უბედურება და სირცხვილი იმაშია, რომ ჩვენ, ქართველები ჩვენს საკუთარს ქვეყანას არ ვიცნობთ. რომელ ადგილას დავიბადებით იმ ადგილას იწყება და თავდება ჩვენი გეოგრაფია. მე ვიცნობ ერთ ქართველ მწერალს: მისი აღმოსავლეთი ნავთლულით იწყება და დასავლეთი ავჭალით თავდება. მაგრამ ეს სხვათა შორის. მე ამითი ის მიხდოდა მეთქვა, რომ ყოველი ამბავი მჭიდროდ დაკავშირებულია იმ გეოგრაფიულ ადგილთან, სადაც იშლება ეს ამბავი. მაგალითად, ტარიელის მიერ ნესტან-დარეჯანის ამბავის თხრობა შეიძლებოდა მომხდარიყო მხოლოდ საშინელ განმარტოებაში, გამოქვაბულის სიჩუმეში: მდინარის ნაპირი, ზღვის ღელვა, ან მთვარიანი ღამე ამ თხრობისათვის წარმოუდგენელია.

— შესმის. — შეუბნება თაშუნა.

— ჰო. ეს ამბავი სამარაში მოხდა — განვაგრძობ მე. სამარა არც ისე დიდი ქალაქია, მაგრამ ვოლგის ნაპირად დმებარეობა ალამაზებს მას. ვოლგა აქ ვერსის სიფართეა, რაღაც ზღაპრული ძალით მოღელავს. უყურებ და გგონია: დინჯი, დარბაისელი და ლამაზი სეფექალი მიბრძანდებაო. ქალაქის მდინარეს ბალით ეხუტება. იმ ბაღში რესტორანი იყო. ბაღში უკრავდა სამხედრო მუსიკა და აუარებელი ხალხი სეირნობდა. მე სამარაში დროებით ვიყავი ჩამომხტარი. მე მაშინ აფიცერი ვიყავი და სამსახურის საქმეების გამო ვიყავი სამარაში. საქმეები მოულოდნელად ჩქარა დავასრულე და ორი დღე რომ დამრჩა თავისუფალი მიხდოდა მესარგებლა იმ ორი დღით. ხომ იცი, როცა ადამიანი სიკვდილის გზაზეა დამდგარი, ის ცდილობს რაც შეიძლება მეტი წაიღოს ამ ქვეყნიდან, მეტით დასტკბეს, მეტი იცინოს. მაშინ მსოფლიო ომი მძვინვარებდა და გერმანიის ფრონტზე აფიცრის სიცოცხლის დღენი სტატის-

ტიკურად გამოანგარიშებული იყო ჩვიდმეტი დღე. ამით აიხსნებოდა ის გაქანებული ცხოვრება, რომელსაც ვეწეოდით ჩვენ, სამხედრო პირები. მე გადავსწყვიტე ეს ორი დღე ამომეგლიჯა ცხოვრებიდან, ამომეგლიჯა ისე, რომ თან ამოყოლოდა რაც შეიძლება მეტი განცდები.

სალამო იყო. მე გამოველი ბაღში სასეირნოდ და დავიწყე მოსეირნე ქალების ზვერვა და შერჩევა. მე მინდოდა ალერსი.

— ნაყიდი ალერსი! — გულის ტკენით შემეკითხა თაშუნა.

— დიახ, თაშუნა! როცა ცხოვრება ზურგით მოგიბრუნდება, ნაყიდი ალერსიც დაგაკმაყოფილებს. როცა ხვალინდელი დღე შენ არ გეკუთვნის, დღევანდელ დღეს ბევრს მოთხოვნილებას არ წაუყენებ ხოლმე. ჰო, დავუწყე ზვერვა ქალებსა. ყურადღება მივაქციე ერთ ქალსა. რესტორანში წყლის ნაპირს. მაგიდასთან იჯდა და ყავას შეექცეოდა. თეთრი იყო, ქარვის ფერი თმები ჰქონდა, მაღალი და ოდნავ მსუქანი კისერი და კისერზე ოქროს ჯვარი ეკიდა.

— რუსი არაა, არც ებრაელი. — ვიფიქრე მე. — ვინ უნდა იყოს?

მინდოდა მივსულიყავი. გავცნობოდი, მაგრამ რადგან უცხოელობა შევატყვე, რაღაცამ შემაჩერა. მხოლოდ იქვე ახლოს მაგიდასთან დავჯექი და მეც ყავა მოვითხოვე.

როდესაც კარგად შემოვლამდა, ბაღში გახშირდნენ შეზარხოშებულთა ჯგუფები. იმ ხანებში რუსეთში სიმთვრალე აკრძალული იყო, მაგრამ ცხოვრებას მაინც თავისი გაჰქოხდა. განსაკუთრებით არ ერიდებოდნენ აკრძალვის დარღვევას სამხედრო პირები: სიცოცხლის შეტს რას კარგავდნენ?..

მე შევამჩნიე: ქალს შიში დავტყო. ავდექი, სამხედრო სალაში მივეცი, მფარველობა შევსთავაზე.

— გმადლობთ, გმადლობთ! — მიპასუხა მან. — წავიდეთ აქედან.

ხელი ხელში გამიყარა და წავედით. ლაპარაკით შევატყვე გერმანელი უნდა ყოფილიყო. მართლაც ჩემი ახალი ნაცნობი გერმანელი აღმოჩნდა. გრეტა ერქვა სახელად.

— თქვენ გეწყინათ, ალბათ, ბატონო აფიცერო! — მე უბნება გრეტა. თქვენ ჩემს ქვეყანას ეომებით და ჩემთან კისეირნობთ.

— მე ქართველი ვარ, — ვუპასუხე მე.

— მართლა? — ბავშვით გაეხარდა გრეტას. — გამიგონია ქართველების შესახებ. თქვენ საუცხოო ხალხი უნდა იყოთ.

არ მახსოვს რაზე ვილაპარაკეთ, სად ვიყავით, მხოლოდ ბოლოს, როცა უკვე შუალამე იყო, ჩვენ ვიჯექით ისევ იმ რესტორანის ბაღში, წყლის პირად. გრეტამ ოფიციანტს შამპანიური შეუკვეთა. ოფიციანტმა მე შემომხედა.

— მოიტანე! — ვუბრძანე მე.

როდესაც მაგიდა დაიტვირთა ვახშმითა და სურვილით, გრეტამ უბრძანა ოფიციანტს არ მოსულიყო სანამ არ დავუძახებდით. შემდეგ ელექტრონის ნათურას ლურჯი ქალაქი შემოახვია. სინათლე გახდა მტრედის ფერი მბჟუტავი. ვოლგა მოგორავდა, რალაცას მიდუდუნებდა ჰქროდა ნელთბილი ქარი. ბაღის ხეები ნელა ქანაობდნენ, თითქოს ეთხოვებოდნენ ერთმანეთს ძილის წინ და თანდათან ეუფლებოდა სიჩუმე ბაღის კუთხეებს.

— თქვენი სიცოცხლე, ქალბატონო გრეტა! — ვუთხარი მე და ავსწიე მაღალ ფეხიანი და ფართე პირიანი თასი.

— თქვენი სიცოცხლე, ბატონო პაატა! — შეუბნება გრეტა და თან ეტყობა, ძალიან ეძნელება ჩემი სახელის გამოთქმა.

პირველ თას მეორე მოჰყვა, მეორეს მესამე. — მისამი თასის შემდეგ მე ქალის ხელებს ხელები მოვკიდე. ქალმა დამანება თავისი ლბილი, ნაზი, ფაფუკი ხელები. შემდეგ ჩავხედე თვალებში. თვალები იყო ცასავით ლურჯი, ღრმა, სადღაც მიწვევდა, მაგრამ იმავე დროს ეს თვალები გამოუცნობი სევდით იყო სავსე.

— გახსოვთ თქვენი პოეტის „ლორელი! — “შევეკითხე მე

— მახსოვს, — მიპასუხა გრეტამ. — მე არა მაქვს ლორილის გრძნეულობა.

მიხვდა. გამიკვირდა: როგორ იგრძნო? ვინ არის ვეჭალი?

კოკოტა თუ ბაკხანტი? პირველად ვხედავ და ფაშა-ლარულად რატომ ვეპყრობი? რად მაძლევს ამის ნებას? ან კიდევ: რატომ მაჩერებს რაღაცა? რა არის ის რაღაცა?

არა, უნდა ვსინჯო კიდევ. და მე ვეუბნები:

— გიყვართ თუ არა „ფაუსტიდან“ თქვენი სეხნია გრეტხენ?

— მიყვარს. — ამოიოხრა გრეტამ. — საცოდავი გრეტა. და ვიგრძენი: ხელზე ხელი გადამისკვა.

გამიკვირდა: რატომ არ ვიხუტებ ამ ქალს? რატომ არ ვკოცნი? რატომ?...

— დედა გყავთ? — შეკითხება ქალი.

— კი.

— თქვენი დედის სადღეგრძელო! — მეუბნება ქალი და ასწია თასი.

მიკვირს: რა შუაში იყო დედა ჩემი, რატომ მოაგონდა. დედის მოგონებამ შორეული ბავშობა გადამიშალა თვალწინ. დადგნენ თვალწინ ბავშობის სურათები, მინდორი, ყვავილები, პეპლები, თევზაობა, ბანაობა და იმავე დროს. როცა ჩემს მეხსიერებაში მკვდრეთით სდგებოდნენ ეს სურათები, გრეტა მიაშობდა თავისს ბავშობას, თავის ოჯახის ამბავს.

და ამ ამბავიდან მე ხსოვნაში ჩამრჩა აი რა: გრეტას ყავდა სამი ძმა. და-ძმებს ძალიან უყვარდათ დედა. მათი დედა სრულიად მოულოდნელად. უაქიმოდ გარდაიცვალა ისხდნენ ერთხელ ოთახში, დედა თამაშობდა პიანინოზე გრეტა მღეროდა, ძმები ყურს უგდებდნენ. უცბად დედამ წყალი მოითხოვა. დალია. გადახედა შვილებს. ოთხივეს თავი ჩაიდო კალთაში, ყველას თმებში ჩაავლო ხელი, შემდეგ ყველას გადაეფარა მკერდით. მოხვია ხელები და განუტევა სული.

— მაშინ, — დაამთავრა ამბავი გრეტამ — ჩვენ, და-ძმებმა. მივეცი ერთმანეთს სიტყვა: ყოველ წლის იმ და-

მეს, როდესაც მოკვდა დედა ჩვენი, სადაც არ უნდა ვი-
ყოთ, არ დავიძინოთ და მოვიგონოთ დედა. ჩემი ძმები-
დან ერთი ომშია, გერმანეთში. მეორე ტყვეთაა, საფ-
რანგეთში. მესამე ინგლისშია. მე ომის გამოცხადებისას
რუსეთში მოვხვდი შემთხვევით და პეტერბურგიდან სამა-
რაში გადნომასახლეს. მაგრამ მე ვიცი: აი, ამ ღამეს, ჩემს
ძმებს არ სძინავთ. ისინიც სხედან მარტონი. ან ვინმესთან
ისე. როგორც მე თქვენთან, და იგონებენ დედა ჩვენს....

უკვე გარიჟრაჟდა, როცა გრეტამ გაათავა თავისი ამ-
ბავი. მან უკანასკნელი თასი ასწია და სთქვა:

— ეს ქართველ ერის სადღეგრძელო იყოს. მადლობა
იმ ერს, რომელმაც ასეთი ღამეაში სულის შვილი გაზარდა.
თქვენ თვითონ დაფიქრდით: ბაღში მთელი ღამე, მბუჟ-
ტავ სინათლესთან, უცხო ქალი უცხო კაცთან და მერე კი-
დევ როგორ კაცთან: აფიცერთან, და თქვენ კი არამც თუ
დასაპყრობად, საკოცნელადაც არ გამოწეულხართ.

— რომ გამოვწეულიყავი? — ღიმილით შევეკითხე მე.
ქალის ხელებში ბრაუნინგმა იელვა:

— ჰაერში ასროლილ პფენინგს არ ვაცდენ...

და შემდეგ დაუმატა:

— გამიგონია ქართველების შესახებ. მართლაც, სა-
უცხოო ხალხი ყოფილხართ.

III

ყველაზე სასიხარულო.

ეს ამბავი შავზღვაზე დაიწყო, ხმელეთზე გათავდა. მე
ხოვროსიიდან მოვდიოდი. იმ ხანებში სტუდენტი ვი-
ყავი, ახლად გამოცხობილი სტუდენტი. ნოვოროსიაში მუ-
დამ ძვინვარებს ერთნაირი ძლიერი ქარი ნორდოსტი. ხან
ის ისეთი სიძლიერით ამოვარდება, რომ მხოლოდ დიდი
გემები თუ გაბედავენ ზღვაში გასვლას და ისიც იშვიათად.
მე ვუცადე. სანამ ნორდოსტი დაწყნარდებოდა. ოთხი დღე
გასტანა საშინელმა ღელვამ და ამ ოთხი დღის განმავლო-
ბაში მე ფულის მარჯი სულ შემომეღია. რა მექნა? გემი

კი, დიდი გემი „მარია“ შუადღისას უნდა გასულიყო. მე წაველ ქალაქში და გავყიდე ჩემი პალტო. სანამ პალტოს გავყიდდი და დავბრუნდებოდი გემი უკვე წასულა. დავრჩი და დავიწყე ხანდაგზე სიარული.

— ხანდაგი რა არის! — შეძეკითხა თაშუნა.

— ნავთსადგურებში ზღვა შემოღობილია დიდი ქვებით, ეს ქვეები დუღაბით ჩაკირულია ერთიმეორესთან, ხვდება ზღვის ტალღებსა და იცავს ნავთსადგურს ლელივისაგან. აი ამ ქვის ჯებირებს ეწოდება ქართულად ხანდაგი. ჰო დავდივარ ხანდაგზე. ერთ მოტორთან პატარა გემს დავაკვირდი. რალაც ფაცა-ფუცი იყო გემზე. მივედი, ვიკითხე აღმოჩნდა გემი სოხუმს მიდიოდა. მეც ეს მიხლოდა. გემი კილაცა ბერძნისა იყო. ბერძენს ერთი ლამაზი ქალი და რამოდენიმე კაცი ევაჭრებოდა, ზოგი სოჭას მიდიოდა, ზოგი სოხუმსა. მეც შევევაჭრე. მოვრიგდით. გემი სალამოთი გადიოდა ზღვაში. სალამომდე რალაც ორი საათი დარჩა. ქალაქში წასვლის მეშინოდა, დამაგვიანდება მეთქი, ამიტომ გემს არ ვშორდებოდი მომშივდა, ორი პური ვიყიდე და ოთხი კვერცხი. ვიფიქრე: ერთ პურსა და ორ კვერცხს აქ შევსჭამ, ერთ პურსა და ორს კვერცხს დილით გემზე შევსჭამ. სალამოთი არასფერს არ შევსჭამ. მესამე დღეს კი ნაპირზე ვიქნები მეთქი. დავჯექი ხანდაგზე, დავიწყე ჭამა. ერთი კვერცხი ლაყე აღმოჩნდა. იცი როგორ მეწყინა? თითქოს რალაცა იმედი დამემსხვრა, ისე მეწყინა.

სალამოთი ჩვენი გემი ზღვაში გავიდა. როცა გემი ლუწას სწევდა მოვიდა ის ლამაზი ქალიც. ყველამ ჩვენ-ჩვენი ადგილები დავიკავეთ. გემში იყო მხოლოდ ერთი განყოფილება, ისეთი პატარა იყო გემი.

ჩვენი პატარა გემი სწრაფლ-მავალი აღმოჩნდა. გაქანებით მივდიოდით. ღამე ოდნავ ბნელი იყო, მაგრამ წყლის ზედა პირი მბუჟტავ ნათურასავით ნათლდებოდა. ჩვენი გემი ვიწრო და გრძელი ცხვირით სჭრიდა წყალს, ხოლო გვერდებზე აქაფებული ტალღების ორი არშია მიყვებოდა და თითქოს ორივე არშიას ცეცხლი ეკიდებოდა. გემის ბოლოს კი, სადაც ბორბალი ბდღვინავდა, ეს ორი არშია

უერთდებოდა მესამეს, რომელსაც სტოვებდა ზღვაზე გემის ბოლო.

ვიმგზავრეთ მთელი ღამე. დილას მე ყველაზე ადრე გავიღვიძე და ჩემი პური და კვერცხი მივირთვი. შემდეგ სხვებმაც გაიღვიძეს და ლაზათიანად გაძღენ.

— იქნება ქარი. — სთქვა ბერძენმა, როცა თუაპსეს მივუახლოვდით და ჩიბუხი გააბოლა.

ქალი შეკრთა, გაფითრდა, გადაგვხედა ყველას და შემდეგ ზღვის სივრცეს დაუწყო ყურება.

ჩვენ სულ ნაპირთან ახლოს მივსცურავდით. ღამით ხმელეთიდან ჰქროდა ნელი ქარი, ახლა კი ხმელეთისაკენ ჰქროდა. ცა მოიღუშა. უცბად უცნაურად დაწყნარდა ზღვა და სიჩუმე ჩამოვარდა. ბერძენმა გემი ზღვის სიღრმისაკენ მოაბრუნა. უცნაურია ადამიანის ბუნება: მე ზღვის ნაპირას ვარ გაზრდილი და ვიცოდი, რომ ღელვის დროს ასე სჯობიან, მაგრამ ნაპირთან დაშორებამ მაინც შემაშინა. ქალი კი საკოდავად იშმუშნებოდა და რეზინის ბურთივით იკუმშებოდა.

ხმაურით მოვარდა ქარი. აგორდა ტალღა. აიტაცა გემი ზევით და უცბად, თითქო ხელი უშვაო, დააქანა დაბლა. მეორე და მესამე დაქანებაზე ქარი ეცა ანძას და დაუწყო ნძრევა. ბოლოს დასწყვიტა ბაწრები და დახია იალქანი.

გემი ბურთივით ხტოდა ზღვის ტალღებზე. მგზავრები კი ეყარნენ გემის იატაკზე და, მუცელ აშლილნი, ისეთ მდგომარეობაში იყვნენ, რომ არამც თუ სირცხვილი, არამედ ერთმანეთი არ ახსოვდათ. მხოლოდ ბერძენი, ორი მეზღვაური და მე ვიდექით ფეხზე.

განსაკუთრებით წვალობდა ქალი. საწყალი, როდესაც გული აემღვრა, უნდოდა ჩვენ არ დაგვენახა და გემზე გადაიხარა. ქარმა კინალამ გადაახდო. მე რომ დროზე ხელს არ მეტაცნა უეჭველად ტალღა წაიღებდა, შემდეგ ბავშვივით ატირდა. მე მქონდა პატარა ბალიში ქალთან ახლოს დავჯექი, ავიღე ის ბალიში. მუხლზე დავიდევნი, და ქალის თავი ბალიშზე დავდე. ბერძენმა შეიკოდა ქალი და ლიმონი მომცა. მე ქალს ლიმონი ჩავაწურე პირში. ქალმა გაახილა თვალი და ისე მადლიანად შემომხედა, რომ სიტყვით ვერ შეტყობდა იმას, რაც მითხრა თვალებით.

თუაპსეს ვერ მივაღეჭით და სოჭისაკენ წავიდა გემი. სოჭასთან ქარი სულ გადაირია. გვეგონა დადგა უკანსაკნელი წუთები, როცა გემის კედლებმა კრიჭინი დაიწყეს. მე ვამხნევებდი, მაგრამ თვითონ არა მჯეროდა გადარჩენისა. ქალი კენესოდა. პირს აღებინებდა, სულ დაილილიტა მკერდი, კბილებს კბილებზე ამტვრევდა. ბოლოს მოქანცა, მოტყდა, არაქათი გამოვლია ისე. როგორც სახადით შეპყრობილ ბავშსა.

საზარელ სურათს წარმოადგენდა გემის იატაკი. გაგრა-შიც ვერ შევიდა გემი. ბერძენმა გასწია სოხუმისაკენ. და როცა მოვშორდით გაგრას. ისევ ზღვისაკენ იბრუნა გემმა პირი, იკლო ქარმა. სოხუმის გამოჩენისთანავე სულ ჩავარდა. მაგრამ წვიმა წამოვიდა. ამოვისუნთქეთ, ყველამ ზმორება დაიწყო და კუნთების დაჭიმვა. უკვე ღამდებოდა, გემი რომ მიადგა ნაპირს.

მე ამოვიყვანე ქალი გემიდან. ძლივს მოდიოდა. ლას-ლასით მივაღეჭით სასტუმროს. სასტუმრო „სან-რემო“ იქვეა, ნაპირთან. დავიჭირავეთ ნომერი. დავიბანეთ ხელპირი. ქალმა მთხოვა დერეფანში გავსულიყავი. როცა შემოვბრუნდი მას ტანისამოსი გამოეცვალა. მეც დავასუფთავე ჩემი ტანისამოსი. ლიმონიანი ჩაი დავლიეთ. შემდეგ თითო ჭიქა კონიაკი დავლიეთ. უკვე ღამე იყო და მე ავღეჭი, წასვლა დავაპირე. გარეთ წვიმდა. თითქოს წარღვნა მოდისო და ისევ ჰქროდა ქარი.

— სად მიდიხართ? — შემეკითხა ქალი.

— მე აქ ნათესავეები მყავს — ვუბასუხე მე.

— აბა რას ამბობთ. — მეუბნება ქალი. — თქვენ მე სიკვდილისაგან მიხსენით და ამ საშინელ წვიმაში გაგიშვებთ!

— ცოტა სიჩუმის შემდეგ მეკითხება:

— თქვენ ვინა ხართ?

— ქართველი ვარ. თქვენა?

— მე ურიის ქალი ვარ. სოჭაში ქორწილზე მივდიოდი. ჩემი მოსამსახურე გოგო ბარგით დიდ გემზე გაემგზავრა. მე ქალაქში დავრჩი. ვერ მოვუსწარი და ამ წყეული პატარა გემით წამოვედი. მე იმიტომ ვეჩქაროდი, რომ ჩემი რა თხოვდებოდა სოჭაში და მინდოდა ჩამესწრო. კიდევ კარ-

გი, რომ ეს კალაბა ბუფეტში დავიწყებია მოსამსახურეს,
თორემ კაბასაც ვერ გამოვიცვლიდი ახლა.

დავაკვირდი ქალსა. თვრამეტი წლის თუ იქნებოდა.
შავი თვალები, შავი ხუჭუჭა თმები, მოგრძო ოდნავ აქედე-
ბული ცხვირი, სქელი ტუჩები, ოდნავ სქელი ტანისა, თე-
თრი სავსე მკერდი და მკლავები. არა ეს ქალი არა გავდა
ლორელის.

— თქვენი სახელი? — ვეკითხები ურიის ქალსა.

— სულამით!

— უცნაურია! — წამოვიძახე მე — სულამით!

— რა არის უცნაური? — მეკითხება ქალი.

— რომ თქვენ სულამით გქვიათ. მე ამ სახელმა „ქება-
თა ქება“ მომაგონა.

— რომელი ადგილი მოგაგონათ? — ისევ მეკითხება
ქალი. — მე ზეპირად ვიცი ქებათა-ქება.

და მე ვუთხარი ზეპირად:

„თმანი მისნი ხუჭუჭნი შავნი, ვითარცა ყორანი“...

„ეგ შენი ტანი წააგავს ფინიკს,

შენი ძუძუნი მტევნებსა ყურძნის“...

— თქვენ, ქართველმა, საიდან იცით ურიასტანის მე-
ფე — მგოსნის სიტყვები? — მეკითხება სულამით.

— ჩვენ, ქართველები, მუდამ ვეძებთ სიცილსა და სიყ-
ვარულს. ხოლო სიცილითა და სიყვარულით სავსეა სოლო-
მონის „ქება-ქებათა“. — ვეუბნები მე.

— კიდევ რა იცით მისი? — და სულამითის გრძელ
წამწამიანი ქუთუთოებიდან ორმა მზემ გამოიღიმა.

— აი რა ვიცი:

„მოვიფიქრე მე: ავალ ფინიკზე.

ჩავეჭიდები მისსა ტოტებსა,

და დაე მეყოს ძუძუნი შენნი

მტევნებათ ვაზის,

და სუნთქვა შენი ვით სურნელი ვაშლთა“...

გარეთ წვიმდა, ჰქროდა ქარი და საშინლად ბნელოდა.
სულამით ადგა, მიხურა ფანჯრის დარაბები.

მე ვგრძნობდი, ძნელი იყო ჩემი დარჩენა ამ ქალთან.
მისი ტანი, ყოველი მისი მოძრაობა, ყოველი მისი მიხვრა-

მოხვრა, ყოველი მისი კუნთი და ნაკვთი მართლაც რომ მაგონებდენ მეფე-მგოსნის ფინიკის ხეს, მისს ტოტებსა, ვაზის ტევნებსა და ვაშლის სუნსა. ვგრძნობდი, რაღაცა მათრობდა და გადავწყვიტე წასვლა. ქუდი ავიღე, ქალს თავი დავუკარი და კარებისაკენ გავემართე.

— ნუ წახვალთ... — არა, ქალმა კი არა სთქვა ეგ სიჩუყები. არამედ გახურებულ საბერველიდან ამოხეთქა ცხელმა ჰაერმა და დამწვა.

— მე ბევრი მსმენია ქართველების შესახებ, — ამბობს სულამით. — მეფურად ამაყი ხართ და სულ მაღალი. მე თქვენ მიხსენით სიკვდილისაგან და ისე მიდიხართ, რომ მაღლობაც არ მიგაქვთ. შემდეგ სულამითმა კილო შეიცვალა და ჩურჩულით მიბძანა:

— თავი ასწიეთ!

როდესაც თავი ავსწიე, დავინახე ორი ცეცხლის მფრქვეველი თვალი და იმ ცეცხლში დაიწვა ის ღამე. ღამე სავსე სიცილით, სიხარულით და ნეტარებით.

მას შემდეგ გავიდა მრავალი წელი და ისეთი ბიბლიური სიხარული ღამის გაშლილ თმებში მე აღარ მიგვრძნია.

— თაშუნი, მიხვდი რატომ? — ვეკითხები ღამის სიჩუმეში თაშუნის.

— მიხვდი! — მესმის ღამის სიჩუმეში და ქალის ლბილი ხელები ჩემს თმებს თითებით ვარცხნიან....

IV

ყველაზე გმირული.

— შენ უნდა მითხრა ყველაზე გმირული. — მეუბნება თაშუნა და თან ხელები უთრთის. ვხედავ: ძლივს, ძლივს ადებს თვალებს. თითქოს იმ უნაპიროსა და უსაზღვროს, რაც სწევს დაბლა მისს ქუთუთოებს. სურს დაუხუჭოს თვალები.

— სწორედ აქედან იწყება გმირული — ვეუბნები მე თაშუნას, — ქართულმა პურმა შემინარჩუნა სიცოცხლე.

— როგორ?

— აი, როგორ. ერთხელ სამოქალაქო ომის დროს მე ტყვეთ ჩაუვარდი თეთრებს.

— არ მწყვარს, როდესაც შენ ამბობ „თეთრები“, „წითლები“... — მეუბნება თაშუნა. — ნუ თუ სხვა დაყოფა არ არსებობს ადამიანისათვის?

— ყოველ დროს თავისი საზომი აქვს ადამიანისათვის. ისტორიამ და რევოლუციამ ასე განსაჯეს, თაშუნა! დღეს მთელი მსოფლიო ორადაა დაყოფილი: თეთრი და წითელი... ჰო, ყური მიგდე: რამოდენიმე დღის ბრძოლის შემდეგ ჩვენმა მთავარმა ძალებმა უკან დაიხიეს. მე შტაბის უფროსმა მიბრძანა: თქვენი რაზმი აქ უნდა დარჩეს, აშკარად გეტყვით, თქვენ ვერ დაიხევთ, აქ უნდა დარჩეთ შუა დღემდე და სანამ თქვენ აქ იბრძოლებთ ჩვენი მთავარი ძალები სამშვიდობოს გავლენ. გესმით?

— მესმის! — ვუპასუხე მე.

— გარდა იმისა, რომ თქვენ რევოლუციონერი ხართ, გახსოვდეთ, თქვენ ქართველი ხართ. აქ დარჩენა გმირობაა.

— მესმის! — უპასუხე მე.

— მშვიდობით! — მეუბნება უფროსი და მკოცნის. ის უფროსი ჩემი მეგობარი იყო.

— თაშუნა! გამოგიცდია უკანასკნელი გამოთხოვება? გამოგიცდია ისეთი გამოთხოვება, როდესაც იცი, რომ ვერასოდეს, ვერასოდეს ვერ ნახავ მეგობარს ან საყვარელ ადამიანს? არა, ვეცოტაა. მე გეუბნები ისეთ გამოთხოვებაზე, როდესაც შენ იცი, რომ მიმავალი ცოცხალი დარჩება, შენ კი მოკვდები, მოგკლავენ. ასეთ დროს დაცარიელებულია თავი, გამოფიტულია სული, რაღაცა გტკივა მკერდში და გინდა ჩქარა დასრულდეს ყოველივე ეს. აღსასრულის მოლოდინი ყველა ტკივილზე ძნელია, და მწარე. სიკვდილის შეგრძნობა აღუნებს ხუთივე გრძნობას და იბადება ახალი გრძნობა, მეექვსე გრძნობა. ეს არის მხოლოდ სივრცის გრძნობა. თითქოს ყოველივე მოკვდა, ყველაფერი გაჰქრა და დარჩა მარტოოდენ სივრცე. ცარიელი სივრცე. ხედავ შორეულ ცის კიდურს, ხედავ წინ გაშლილ არეს და ასე გგონია შენ ერთს ადგილზე კი არა ხარ, არა-

შედ ყველგან ხარ. უკვე დაშლილი ხარ და ერთი არსება არა ხარ.

მე მაგონდება ყოველივე ეს და ვკანკალებ. თაშუნაც კანკალებს, მეკვრება.

— თაშუნა! როდესაც მე ჩემი რაზმით მარტო დავრჩი, დავრწმუნდი განწირული ვიყავი. რაზმიც დარწმუნდა ამაში. განწირულისათვის არსებობს მხოლოდ ორი გზა: უსაზღვრო სილაჩრე და უსაზღვრო სიმამაცე. და ჩვენ განწირულნი სიმამაცით ვიგერებდით მტერს. დილიდან შუადღემდე შევაჩერეთ მტრის რაზმი. შუადღისას კი მტერს ორი ჯავშნიანი მატარებელი მოუვიდა და ვერ ავიტანეთ მტრის ყუმბარები. გადავწყვიტეთ შეჯგუფებულად წავსულიყავით იერიშით, რომ ყველანი ერთად დავხოცილიყავით. ჯგუფურად სიკვდილი ყოველთვის იოლია. ჩვენ დავალება შევასრულეთ: შუა დღე გადავიდა, ჩვენები სამშვიდობოს გავიდოდენ, ჩვენ დასახევი გზა არა გვქონდა.

— ჩემო კარგო! — მოსწყდა თაშუნას ტუჩებსა.

— ჰო, გადავვდივით შეტევაზე. როდესაც წავედით, ვიგრძენი, რალაცამ ფრთა დაარხია ჩემს თავზე და თმები შემირხია. ეს სიკვდილის მოახლოვება იყო. უცბად აცივდა ჩემს გარშემო. ზატყული იყო, მაგრამ ხელები გამეყინა და ვგრძნობდი სადღაც შორს, შორს უსაზღვრო სივრცეში მივექანებოდი. ვხედავ ჩემს გარშემო მხოლოდ რამოდენიმე კაცილა დარჩენილა. წავიქეცი. ავდექი. ისევ სივრცეში მივდივარ. ისევ წავიქეცი და ვხედავ, ხელი და მკერდი სისხლში მაქვს ამოსვრილი. —

როცა გონს მოვედი. მიწაზე ვეგდე. დაჭრილი ვიყავი და ტყვეთ წაუყვანივართ.

— გონს მოვიდა? — მესმის სიძულვილით სავსე ხმა. — ხესთან!

მიმაყენეს ხესთან.

— რამდენმა ათასმა დაიხია უკან? — მეკითხებიან. დავაკვირდი ჩეჩნები არიან და ყაზახები.

— შენ გეკითხებიან! — ბრაზით გამიმეორეს. არა! პასუხის მიცემა არ შეიძლება.

— საით წავიდენ? — ისევ მეკითხებიან.

არა! ეგ ხომ სამხედრო საიდუმლოების გაცემა იქნება!
— გარდა იმისა, რომ თქვენ რევოლუციონერი ხართ,
გახსოვდეთ: თქვენ ქართველი ხართ! ვილაცამ მითხრა
ყურში.

და მე ვეუბნები მათ:

— არ ვიცი.

თოფის ლულა ჩამიდეს პირში.

— იტყვი?

თავს ვაქნევ მარჯვნიდან მარცხნით.

ყურის ძირას რევოლვერის ტყვიამ გაიზუზუნა.

— იტყვი?

ვსდუმვარ.

— იტყვი?

ვსდუმვარ. აბა როგორ შეიძლება რევოლუციის ლა-
ლატი! ვილაცამ თოფის კონდახი მკრა მკერდში, წავიქეცი.
გულზე ფეხი დამაბიჯეს. მეკითხებიან:

— იტყვი?

შევხედე ცას. მზე გადახრილა. ალერსით დამტკბარ ქა-
ლივით იღიმებოდა, ჯეჯილზე ქარი დაცურავდა, მე კი
სისხლით ამოსვრილ მტვერში ვეგდე.

— გასავალში! — ბრძანა ვილაცამ.

ამაყენეს. მიმაყენეს ხეზე.

— ებრაელია, მამაძალლი! — სთქვა ერთმა ყაზახმა.

— ჩქარა, გაათავეთ! — გაიმეორეს ბრძანება.

— მე ქართველი ვარ. — ძლივს ამოვიგლიჯე ეს სიტყ-
ვები.

— ებრაელია!

— ქართველი ვარ.

— ყმაწვილებო! ახლავე გავიგებთ თუ ქართველია —
სთქვა ერთმა ჩეჩენმა. დამიზნული თოფი დაბლა დასწია
და მკითხა ქართულად:

— მართლა ქართველი ხართ?

როგორ გამეხარდა... თითქოს საშინელი სიზმრისაგან
გამომეღვიძა.

— ქართველი ვარ. — ვუპასუხე ქართულად.

— ტფილისში გიცხოვრია?

— კი.

ჩეჩენი მიუბრუნდა ამხანაგებს და უთხრა:

— ქართველი ყოფილა. ქართველები კარგი ხალხია.
ნუ მოვკლავთ. მე მიცხოვრია ტფილისში.

მახსოვს მათი პურ-ღვინო.

და ამ რიგად გადავრჩი.

აი, თაშუნი: შენი თხოვნა შევასრულე, გაჰქრენ ავი
ლანდები?

თაშუნის ხელები კისერზე მეხვევიან, ვნებით დატვირ-
თული ქუთუთოებიდან ანათებენ ფართე თვალები და
სქელ ტუჩებს მოსწყდნენ მარგალიტები!

— შენმა სამებამ გააქრო ავი ლანდები... შენი ჭირიმე.

და ლაშემაც გაიმეორა.

— შენი ჭირიმე...

— : —

მ ვ ა ლ ვ ა.

I

1910 წელი....

ახალუხის ამარა მოსული მამაკაცები ქაქანებდენ გვალვის შესახებ წმ. გიორგის ტაძრის გალავანთან, ცაცხვის ჩრდილში.

გვალვა მართლაც განაგრძობდა მძვინვარებას:

ჭალად დამშრალი არხები ველარ შევლოდენ ყანას. ნათესია ძირებს ხრავდა თაგვი და მახრა.

საქონლები ველარ ახერხებდენ უილაჯოდ მოქნეული ყბის ძვლებით ბალახისა და ჩალის ღერის ხრახნას.

ხარებსა — ფურ-კამეჩებს უჭრიდენ ძარღვს, აცლიდენ დაავადებულ შავ სისხლს, მაგრამ ვერც ეს შევლოდა საქმესა და ვერც კუდიანი. მოხუცი დედაკაცის — ალათის მიერ ჭირისა და ფოლორცის გამოლოცვა.

ლორებს უხურდათ ქვასავით გამაგრებული რძიანი ძუძუები და უჩნდებოდათ წყლისა.

უზომოდ გავრცელდენ ურწმუნონი, ქვეწარმავალნი; ველარ სძლებდენ გახურებულ დედამიწის სოროებში; ედებოდენ ტყე-ველსა, იჭრებოდენ ქოხში, მოჰყვებოდენ ბირკვილებს; სვეტებით აივანზე მოცოცავდენ.

ისმოდა სოფლად შეშინებულ ბავშთა ტირილი და დედაკაცების მოთქმა, ქაქანი:

— გუშინ ჭალაში მურზამ თოხის ყუით უსახელოს თავი გაუსრისა!

მოწითალო ფერი ნაქონა იმ წყეულს!

— თავზე დიდი რქა ნაბამა!

— ნეტა რაგაა ერისტოს ბოვში, გველმა რო დაკბინა?

— ქუთეისში წასულარიენ!

ჭორიკანობენ ჩერია-საჩეჩელზე და ოჯახში მომუშავე დედაკაცები ბაგეზე თითის მიდებით:

— მაკრინე, ხურცოულში უნდა დამაბელიო ბჟოლები. ან და შენი ხელით დამკალი.

— ვა, შე ქალო, რაგა შამოგლეგია საქმე! ხურცოული კი არადა არ დამიტოვებია ზვარბელო, ქვასაბერტყელა, გოშოურა. ქარჩხაბი, კუხი, მათხოჯი, დედალოური და საწულუკიძო.... მერე რა?! მთლათ ერთიანათ დახრუკულია ფოთოლი. გაყვითლებული გამხმარ თუთუნით იფშენება.

— ტყვილია, აწი ველარაფერი უშველის აბრეშუმის ჭიას: გაშავდა, დაკოინდა, დაჭკნა. რასა გავს? დალუპე იქით!

— ნახევარზე მეტს ჭინჭველე დეესია!

— აბსუს: რვა ჩელტი მქონდა გამართული! მერე რა ჩელტი? სოლ მთავარ-მთავარი ჩელტები დალობა საწყალობელმა ვალიკომ.

— მაკრინე, არ გეწყინოს და ძაან ქე აწვალე მავ შენ ვალიკოს.

— ვაწვალე რა! ჩემი შვილი შენ უფრო გებრალებათუ მე?

— მამისული არ წამიწყდეს, საწყენად არ გეუბნები — კაცო, არ შეუძლია მავ შენ ხრიკიან ვალიკოს ამდონი, ხედავ რა დანტეიანია? მე მაგის საცოდაობა ვნახე, ყანას რო რწყავდა... დედია, მკვდარი იყო კაცი თელათ!..

— აბა, ვინ არის ჩვენი მშველელი? კიდოც რომ ჩავკვდეთ მეტი რა გზაა?!

— ყანამ ხომ შენი ჭირი წეილო! ჩაერია ლაპარაკში ვალიკო — ახლა ბოსტანს არ იკითხავ? ღმერთმანი ჭა დავაშვრეთ მისი რწყვით, მარა რათ გინდა მერე — არასფერმა არ უშველა... არც ბამილორი, არც ბადრიყანი, არც სუნელი, არაფერმა არ ივარგა... ერთი კიტრი, ნესვი ან ხაბურზაკი მაინც შენახა თვალით... ავთხარე და ღობეს მივაჟვერე.

— რა ჩამოდგა, შენი ჭირიმე, ეს გაგანია!? იტყოდა ერთი.

— რა ამბავია, დიდება შენ სახელს!

— შიმშილობა დაგვიდგება!

აღმოსავლეთიდან დაუბერა ხვარტიანმა ნიავმა. ქალებს მუცელში ალხი ჩაუვარდათ, ხახა მოკუმეს და პირს-ჯვარის სახვით ერთმანეთს განცვიფრებული მიაჩერდნენ.

ქვაზე წამოსკუპულს ქრისტინეს თავშალი გადუვარდა ფარფატით. ჭაკუების მოდგმის თავჯორკო ქალი წააგავს, მართლადაც, თეთრი სოკოებით დაფარულს გადაჭრილ ხის ბებერ კუნძს; პირჯვარისსახვა გაათავა და გაათურთხა:

— რა ღვთის რისხვაა, ბეჩა, ეს ჩვენს თავზე?

— რავა არ იქნება ჭირიმე?! ხომ ხედავ: წამხდარია დროება, აღარც ღმერთი ახსოვლარიენ და აღარც ხატი!?

— დაიწყო როდღაიამ როდინში ჩარჭობილ ქვასანაყივით სიტყვების ცემა როყროყი.

— მაინც ეს ნასწავლი ხალხი სულ გასაწყვეტია! შეპნიშნა ალათიმ ხეპრეთ.

— ღმერთი რო ტიგნიცა ბიჭების დასაცინი გახდა, მაშინ აშენდა ქვეყანა!? — ჩაერია ლაპარაკში დონიჯშემოყრილი თეკლე, მას შემდეგ რაც მიაბა გაძვალტყავებული თხა სიცხით ამყდნარს ანწლებში და ფერაფერებში.

— გაგონილა, გენაცვალე, ამისთანა ამბავი?! ჰკვირობდა ქვიქვირ ჩამოგდებული, მსუქანი დონდროზა დედაკაცი კატო. იგი მოვიდა ეხლახან აჩქარებულის ნაბიჯით, კაბადაკარწახებული: ახლომახლო მეზობლები მოგროვდნენ. მამაკაცებს დედაკაცები სჭარბობდნენ.

— ცოციალისტები მთლად ქვეყნის დამაქცევარი შეიქნენ: ღმერთი ჩვენ თითონ ვართო, ღმერთი ბუნება არისო. დაიწყეს საუბარი და დავა მამაკაცებმა.

— ქვეყანას მაგენი გააწორებენ?

არც მდიდარი და არც ღარიბიო!

— ქვეყანას მაგენი გაასწორებენ?

— შენ რაფერად გამანდიდრებ მე, თუ კაცი ხარ მითხარი ერთი?

— რატომ? ზოგს მაგენი მართალს უნობენ! ღარიბის დახმარებას ქრისტეც ქადაგობდა!

— კაცო, ქადაგობდა მართალია, მარა მეიცა, მაცალე, ეხლავეს გაგანტყუნებ: ვთქვათ შენ წევ ათ ფუტს, მე კი სამს, რაფერად უნდა დეგეწიო მე შენ? შენ ჩემზე უფრო მეტი ჭკუა და ღონე გაქვს და მეტიც გიშონია — შეგიძენია...

— კი მაგრამ, ვისაც ბევრი უშოვნია და შეუძენია ცოტა გლახა და ღარიბისათვისაც უნდა ჩამოერთვას.

— შენ მოგცემს რასმეს მდიდარი? მიაკითხე აბა დიმიტრიას. თუ კუდიტ ქვა არ გასროლიოს?! გაჭირვებული კაცის მდგომარეობაში ისევე გაჭირვებული უფრო შევა, ვიდრე დაღვინებული.. მაცალე კაცო.. რასაა რომ უნობ?! მაგი შენ მე მკითხე, შენ მე რას მომცემ თუ ჩემი მარჯვენის იმედი არ დევიკავე! რაც შენ გაქ იგი მე მინდა საკუთრათო, ასე იტყვი... კაცის ამბავი არ გნაცოდნა შენ. კაცი, „ყველაფერი მე მინდა და მინდაო“ იძახის; შენაც თუ გინდა ამას არ კითხულობს. ხედამ რა ხვადაგია კაცი?! პირუტყვია თელად!

— რემელიცხა მდიდარია, მაინც მდიდარი დარჩება! ჩაილაპარაკა ვილაცამ.

— აბა, შეხედე: შვანა თითი და ნეკი რეიზა არ გოუჩენია ღმერთს ერთნაირი?

— წორია! ჩაიქნია თავი ხალხმა.

მზე აჭერდა. ჭიჭინობელა განუწყვეტლივ ჭიჭინებდა. შიშველ თავიან გლეხების საფეთქლებზე სძგერდა დაჭინთული, სისხლით სავსე ძარღვი; კვინიხამდე გველის ტანივით ადიოდა და იხლართებოდა:

— ხარება დღეს რო მიწას ხნავენ, მარიობას კი ტყეს ჭრიან. მიტომაცაა ეს უბედურება და ღვთის რისხვა ჩვენს თავზე: სიძვირე, შიმშილი, გვალვა!

ხალხი გაურიავდა! სთქვა ვარდომ. ამ სიტყვების გაგონებაზე დურგალ იულომაც გადასწყვიტა ლაპარაკში ჩარევა.

* * *

იულომ შალაშინიდან ბურბუშალა ამოიღო. სული ჩაჰბერა, ხარიხაზე გადებულს ღარდაყინიდან დაბლა ჩა-

მოვიდა; ცალ ხელში თხასავით აქიციანებული ჭალარა წვე-
რი დაიკავა, ფიცარივით გაშალშინებული გათხელებუ-
ლი ტანი ღობეზე გადაჰხარა, მიჭყუტული თვალები ემ-
მაკურად შეათამაშა და ქალებს უკბილო ტუჩების ცმა-
ცურით მიჰმართა, თითქოს დიდ საიდუმლოებას ამხელსო.

— ურიე გეიმარჯვებს!

ალათის ქვედა ყბის ძვალი ჩამოუვარდა, ხახა ყუნწმი-
წყვეტილ ხოკორა ხაპივით მოეწრუპნა და, სხვა ქალებ-
თან ერთად, მიწაზე ჩოჩვით იულოს მოუახლოვდა:

— ვინ თქუა?

— ასე უწერია! უპასუხა იულომ, შუა და საჩვენებე-
ლი თითი ბირდაბირივით გაიქნია.

— ურიე არა და წითელ კაცზე კი ნამდვილათ ნაწე-
რა! ამბობდა წერაკითხვაში და საღმთოწერილში ცოტა-
ოდენ გაგებული, მოხუცი აზნაურის ქალი გულქანა.

— დედია! უკვირდათ ქალებს.

— სად უწერია?

— სად და ანდრია სალოსში! უპასუხა გულქანამ ქა-
ლებს.

— რაიო?

— რაიო და — მოპოებულ ცოდნის გამო ამაყის სა-
ხით და ფეხების ბაკუნით დაიწყო გულქანმა:

— ნამეტანი ცუდი დროება დადგესო, ხალხმა ღმერ-
თი სულ დაივიწყოსო, ბოროტება, სიძვა-სიმრუშე და კა-
ცის კვლა გავრცელდესო; მისცეს ძმამან ძმა სიკვდილად
და მამამან შვილნი და აღსდგეს შვილნი მამა-დედათა ზე-
და და მოკვლიდენ მათო...

— რაღა აკლია? პირდაპირ ჩვენი დროება ნაწერა!
შეჰნიშნა სინდუხტიმ.

— მრავალი მზისა აღმოსავლით და დასავლით მოვი-
დოდნიან ომისა და სისხლის ღვრისათვისო. — განაგრძობ-
და ისევ გულქანი და ყოველ წინადადების დამთავრებისას
მარჯვენა ხელის საჩვენებელს, ჩურჩხელასავით დაჯღარ-
კულ, ბებერ თითს მარცხენა ხელისგულზე იცემდა, თით-
ქოს ყოველ წინადადებას სათვალავში აგდებსო:

ისეთი დროება დადგება, რომ ქვეყანა დაემგვანება
ეშმაკეულთა მოვლინებასო, — ისროდა გაგონილს და გა-
ზეპირებულ წინადადებას გულქანა — მაშინ ადგეს კაცი
ვინმე, ზღვა და ხმელეთი მოიაროს, მოიაროს და მოსული-
ტოსო, სისხლის ზღვა დგებოდესო, მამაკაცები სულ გაწ-
ყდესო წერია...

— აგერ ნახამ შენ თუ ყველაფერი არ ასრულდეს! აში-
ნებდა მეზობელ დედაკაცებს ალათი.

— წორია! უპასუხებდა მეზობელი სრულის დარწმუ-
ნებით.

— მერე წერია სწორეთ იმ ანდრია სალოსის წიგნში,
რომ მამაკაცთა გაწყვეტის შემდეგ, მარტო ქალები დარ-
ჩენო, დადიოდენ და მამაკაცთ ინატროდენო, მაგრამ მამა-
კაცნი აღარსად იყონო; ისმოდეს ხმა ქალთა გოდებისა და
ტირილისო... აღიღებდენ ნაპოვნსა ჯოხსა და სასოებით
ჰკოცნიდენო: „ვინ იცის იქნებ შენ იყავ ყევარჯენი მამა-
კაცისო“ — წერია სწორეთ იმ ანდრია სალოსში! გაათა-
ვა გულქანმა.

ქალები თანაგრძნობის ნიშნად იულოს გაჰხედავდენ,
რომელიც გამარჯვებულის და მოღიძარის სახით ადას-
ტურებდა გულქანის სიტყვებს:

— კი, კი, არ გითხარი?! აქიციანებდა თავს იულო.
გულდათუთქული ქალები მკერდზე ჯილს იცემდნენ:

— უიმე. ეს რა ნაწერა შენ გენაცვალე!

II

წმ. გიორგის უძველეს ტაძრის სამრეკლოდან დიაკვა-
ნი მელიტონი განუწყვეტლივ რეკდა ზარებს.

მღვდლები — ერმოლოზ, მარკოზ, პლატონი და კო-
ტე ამბობდნენ ლოცვას ხატის წინაშე მუხლმოყრილნი.
ლოცვის დროს ერთმანეთს ესაუბრებიან ჩურჩულით; ერ-
მოლოზს კუბოსავით დახურულ და გაბელატებულ კე-
ფიდან აღმური ასდის, ქსინავს და მისი ცხვირის დაბე-
რილი ნესტოები კიდევ უფრო იბერებიან:

— არ უნდა დაეკარგოს ხალხის თვალში ძალა ხატს!

მარკოზს თვალის ქუთუთოები დასწითლებია:

— ხალხი დაუყოვნებლივ მოითხოვს სასწაულს! პლატონს შუბლსა და სახეზე ოფლი ღვარღვარად ჩამოსდის:

— სასწაული უნდა მოხდეს!

ერმოლოზი ისწორებს ჭალარა წვერს და ჯვარს, თითქოს ეხლა იგრძნო მისი მნიშვნელობა, ძალა და სიმძიმე. ერმოლოზი საოსტატო სემინარიის მასწავლებელი, ყველაზედ უფრო განათლებული მღვდელია მთელს დაბაში. მას კარგად ესმის თუ რა გავლენას ახდენს „პური ჩვენი არსობისა“ ხალხზე და როგორი მიმართება მათ შორის. ღმერთი და ხატიც ხალხმა მიიღო თავის ინტერესების დასაკმაყოფილებლად და გაჭივრებათა შესამსუბუქებლად.

„ღმერთო მოჰხედე ტანჯულთა,

უშველე, შაიწყალეო.

კარგი კარგია მაინცა. —

ბეჩავი შაიყვარეო!“ ასე ამბობს ვაჟა და ასე იტყვის ხალხიც. მაგრამ ღმერთისა და ხატისაგან ხალხი ხშირად მოტყუებული რჩება. ტყუილი არ უნდა გახდეს ხელეშესახები. ეს სახიფათოა. ამისთვის იტყოდა ხოლმე პლატონი:

— სასწაული უნდა მოხდეს!

ერმოლოზი იმედებს ამყარებს ხვალინდელ დღეზე. მაგრამ საიდან იცის მან, რომ სწორედ ხვალ გასჭრის წმ. გიორგის ხატის ძალა და მადლი არ შაირყევა ავტორიტეტი და მოვა წვიმა? ამ მცოდნეობის მოწამეა სემინარიის დირექტორის პავლოვსკის კაბინეთი. ჰაერში მომხდარ ატმოსფერულ ცვლილებათა გამზომი, გამოგონილი ადამიანის გონების მიერ. საოცარია ადამიანის გონება და მისი ძალა დაპირისპირებული ღმერთისა და ხატის ძალასთან! მაგრამ საქმე ის არის, თუ როგორი მწყემსი ჰყავს ხალხს? თუ მწყემსი დაოსტატებულია. შესაძლოა დაპირისპირება დაქვემდებარებით დასრულდეს...

ჩურჩულებენ მღვდლები.

მღვდლების ჩურჩულო ხალხის ყურს არ მიწვდომია: საკითხს ბარომეტრი გადასჭრის.

ხალხი მოდიოდა ყოველის მხრიდან.

მუხლი მოეყარათ და თაყვანსა სცემდენ აღსავლის კარებისაკენ მიმავალს კიბეებით წმ. გიორგის სასწაულმოქმედს ხატს.

მათი ყაჭივით თეთრი, გრძელი წვერი ნათალ ქვებიდან, კიბეთა საფეხურიდან და ხატებიდან ჰხვეტდენ საუკუნეთა მტვერს.

თვალეზი სავსეა სასოებით, რწმენით, წუხილითა და ღალადით.

ვნახე სახენი ბიბლიური, როგორც ფრესკები, ამოჭრილნი ტაძრის კედლებზე, კოზმიდზე, სვეტზე.

ვნახე სახენი დასვრეტილნი ძველისძველ ქვასავით, სახე გამოქარულ თიხასავით ნაოჭებით დაბზარული!

ამ მუხლმოყრილ ხალხის გაყვითლებულმა, დახეთქილმა და მიწაშეგნესილ ფეხის ტერფმა გადმოიარეს აღმოსავლეთის (ახელი ველები, ესახლებოდენ, ჰხნავდენ გუთანით დედამიწის გულს; აშენებდენ ქალაქებს და ამაგრებდენ ქვითკირის ციხე-გალავნით, სავაჭროებს დარაბეებით; იგერებდენ თურქებს, არაბებს, მონგოლთ... არ იშრიტებოდა შემოქმედებითი ძალა; ჰქმნიდენ რელიგიას, ცრუმორწმუნოებას, ენას, შეხედულებებს, ადათებს...

ასე ვიდოდა ხალხი, ხალხი წელმაგარი და არ გამწყდარა. დღესაც, ვით წინად ჰხნავენ და სთესენ, მიწაში ჰყრიან ხეს გაზის, დარკინულ ვეება ჰვევრებს და საწნახელიდან ისმება გამოულევი ტკბილი ჩქეტი, ამბოხი... ისმის ჰოროველა, ნადური, ხელხვაგი და მრავალჟამიერი...

ეგ სიციხით დაჭინთული კისრის ძარღვები ყაჭივით თეთრი წვერი და მზით გატრუსული, შიშველი თავის ქალა ქალდეადან მოდის, მოგიდა — არ უჩანს დასასრული ადამიანის მოდგმათა სვლას!

დედამიწიდან ასული აღმური და სანთლების შუქი ანათებთ სახეზე მლოცვილთ. სახეებზე იყო დაწერილი: ღალადი, აღტკინება რწმენით, თავდათრობა.

გაისმა სიტყვები წაკითხული სახარებიდან:

„არა ყოველმან, რომელმან მარქვას მე: უფალო! უფალო! შევიდეს იგი სასუფეველთა ცათასა, არამედ რომელმან ჰყოს ნება მამისა ჩემისა ზეცათასა“...

ხალხი გულმჯილისცემით ივედრებოდა:
— იესო მაცხოვარ, შენ გვიშველე!

IV

წმ. გიორგის ძვირფასის ქვეებით მოოქვილი ვერცხლის პირიანი ხატი. ჩვეულებსამებრ, ასწია ასი წლის უხუცესმა გიორგი ბახტაძემ, ზედმეტსახელად „კურატანად“ წოდებულმა...

გამოჩნდენ დროშები, ბაირაღები... ხატი...

ხალხი ზღვასავით ირხეოდა გალავანში.

ნაშუადღევის სამი საათია.

ხელიხელ ჩაკიდებულნი, ჩოხა დაკაპიწებული მამაკაცები და დედაკაცები მიდიან სამ ვერსით მოშორებულს მდინარე ცხენისწყლისაკენ.

შიშველ ფეხის ტერფებს ჰდაგავს გორახიანი გახურებული დედამიწა, ქვიშა და ქვა.

თვალებს უსერავთ მზისაგან დაღვარული სინათლე.

იმღერიან —

..... ვერცხლის პირიანო, წმინდავ გიორგი, შენ იცოდე აღარ გვინდა მზის თვალი; აშორე ჭალას, ვენახს და ხეხილს სეტყვა—ხორხოშელა; მოიყვანე წვიმა ზომიერი...

წმინდა გიორგი, შენ გვიშუამდგომლე..!

ჩამოუარეს ცაცხვებს, რომლის ტანს ძლივს შემოერთებიათ ხუთი ვაჟკაცის მკლავები.

ერთი ცაცხვი. დროთა ვითარების გამო, მეტად დაბერებული შუაზე გაპობილა, ტოტები სცვივიახ. გამხმარი, უფოთლო. როგორც ოთხმოცი წლის ბებიას ძვალზე ტყავგადაკრული დამჭკნარი ხელები, — კვდება დაჩონდრილი ბუნებრივის სიკვდილით.

გველემშაპივით დაღრენილს და აბედაკიდულს ფულუროს უჩნდება ბოლი მზის სხივისაგან წაკიდული; აქვე უზარმაზარ ჯერ კიდევ სასიცოცხლოდ მდგარ ჩინარის

ფულუროდან ამოწვდილა დიდი თუთის ხე, მასში შემთ-
ხვევით აღზრდილი; ისინი გადახლართულან სიყვარუ-
ლით, თითქოს უმხელდენ ერთიმეორეს ბუნების ძალას,
რომელიც იცქირება ლაშებ-დაღრენილის ღიმილით ჩა-
შავებულს ფულუროში განრინული.

აუარეს ამ ცაცხვებს; იმღერიან ძველისძველ წარსუ-
ლიდან წამოსულ სიმღერას წმ. გიორგიზე....

მოდინან და მოდიან საკვირვლად წოდებული მოხუცნი:
კურატანები; გლეჯია, ჯიშიტები; ცხრა-რჯულა,
ჯაკუები; ჯომერი, გლურჯები; ბურჩია,
ბუნგეები; უდრეკა, ბაკუნები.....
პაწია, კისრები; მარტია, კიკანები;
უტვიპინე, ჭიკოშები; კვატიშა, ხირაგები და სხვა
მრავალნი....

— წმინდა გიორგო! — გაისმოდა გამყივანის ხმა.

— ო, ჰო, ჰო!... — უპასუხებენ გუგუნით ბანები.

მიჰყვებიან მტვერიანს და აღმურიან ნოვალაღევ-მარ-
ტვილის გზას; ელაღინ: ქვასაბერტყელა, ზვარბელო, გო-
შოურა, ქარხნაბს, კუხიდან და სხვა და სხვა კუთხიდან
მოსულთა ანთებული თვალები.

უდრეკსა და ურყევ განწყობილებას დამორჩილებია
ამდენი ხალხი და ძმები უდრეკები თავგამოდებით იმღე-
რიან; მათ მოჰყვებიან ზაქივით ჩაჟანგულის მაგარი კისე-
რით: კისრები ახოვანი ტანის: კურატანები; ჯიშიანი მო-
ხუცნი: ჯიშიტები; და ბურთის გატანაში და ძალით შე-
ჯიბრებაში ყველა სოფლელთა მაჯობარნი: ჯიქურ-მარ-
ბენალნი — გლეჯიები...

V

გამოჩნდა სანატრელი მდინარე ცხენისწყალი.

წელამდე შიშველი მამაკაცები ჩამდგარან წყალში და
წირვა-ლოცვით განბანეს ხატი.

რიყედან ჩაეშვა ბანჯგვლიანი ათასი ხელი; ავსებდენ
ლიტრას და კოკებს ნაკურთხი წყლით და ამ დროს გაის-
მა ტოკვა, ჩოჩქოლი:

დასავლეთიდან იზრდებოდენ ღრუბლები შავიზღვისა:
მოესმათ შორეული გმინვა: აღტაცებული ხალხი, ვით
აწეული ხშირი ტყე აფოთლილ რტოებიანი ხელებით ცას
მიჰმართავდა.

თითქოს ისმინა ცამ ხალხთა გლოვა და ჩივილი გვალ-
ვაზე!? იწვიმა —

დასოვლდენ მამლერალნი:

ნიაღვარების ჩამოდგა ღვარი:

ამღვრეული ღელენი ერთვიან ცხენისწყალს:

ღანღალითა და კუდის ქნევით მისცურავენ ღლავი-
ვით გრძელი თევზები...

იყო სიხარული, აღტაცება; ულოცავდენ ერთიმეორეს:

— ვენაცვალე წმინდი გიორგის მადლსა და ძალსა!

— რა სასწაული მოახდინა, მისი სახელის ჭირიმე!?

— ღვთის ძალა არ არისო!

— ნაქონა თუ არა, ახლა შეხედოსკენ!?

— გაატკვერია ნახშირი ტინგიცა ბიჭებს!

— ჯერ კიდევ არ ვართ ღვთისაგან განწირული!

— დიდება მის სახელს!

ღედაკაცები თითით უჩვენებდენ ერთმანეთს ლეჩხუმი-
სა და სვანეთის მთებისაკენ მიმავალს ღრუბლებზე ასახულ
ცისარტყელას: ცისარტყელა დაეცა მარტვილის მონას-
ტერს.

— დედია, ბეჩა, ეგი რაია დია! რამხელაა! ღრუბლე-
ბიდან მოისმა გმინვა:

— ელიას ეტლია! — ჩიბჩიბობდა მოხუცი ღედაკაცი...

გვალვა გადატყდა... მთები ჩამოირეცხა. ცხენის წყა-
ლი აღიდდა. სიმიდის ყანები იშლებიან გრილი შრიალით
და წვიმით მონათლული ღომისა და პურის თავთავი ცი-
საკენ.

სამადლობელ სიმღერებით უახლოვდებიან წმ. გიორგის ტაძარს... ისევ მოდიან საკვირლად წოდებული გლეხები: კიკანა, ხირაგა, უტვიპინე, კურატანები.. მათი სახეები სავსეა წარმართულის სიხარულით, ღიმილით... იღვიძებენ წარსული დროებანი:

ლხინი — ჯარი — დაური ასულები...

იქნება: ოქონობა, კვირიკობა... ღამისთევა!

ხარის რქასავით ამოწვერა ტყის გაღმა მთვარემ...

ჰაერი გაიპო ხალხის აღვსილი სმღერით:

— „ჰერი-ოდა — გიხაროდეს!“

— : —

მ კ მ კ მ ი ა.

თავი მეთოთხმეტი.

ვიზა...

იციოთ თვენ რას ნიშნავს ეს სიტყვა?

არა, თქვენ არ იციოთ რას ნიშნავს სიტყვა — ვიზა. შეიძლება ამ სიტყვის შინაარსი დასტურ იცოდეთ. შეიძლება იცოდეთ, რომ ვიზაა — ნებართვა, რომელსაც ესა თუ ის სახელმწიფო აძლევს მეორე სახელმწიფოს მოქალაქეს იმისათვის, რომ ამ უკანასკნელს უფლება მიეცეს ვიზის მიმცემ სახელმწიფოში შესვლისა. დიახ, ეს მართლა ვიზაა, მაგრამ განა მართლ ამით ამოიწურება მისი შინაარსი?

სრულიადაც არა.

ვიზას უდიდესი მნიშვნელობა აქვს ადამიანის ცხოვრებაში, განსაკუთრებით ჩვენს დროს, როცა ევროპის რუკა ისეა აჭრელებული, როგორც სპარსული ნოხი. პირადათ ჩემს ცხოვრებაში ვიზამ უდიდესი როლი ითამაშა. და რომ ვიზას არა-შესაძლებელია არ დაწერილიყო არც ეს წიგნი. და გარდა ამისა, თუ მე დღეს ზოგიერთ საკითხებში უფრო რადიკალურად ვაზროვნებ, ვიდრე მომეთხოვება — ნაწილობრივ ამის მიზეზი უთუოდ ვიზაა, რომელიც მთელი თავისი სიგრძე სიგანით ჩემს წინაშე მხოლოდ სტამბოლში წამოიჭრა.

...ეს ჩემი პირველი ვიზიტი იყო საფრანგეთის საკონსულოში ვიზის გულისათვის. იდგა აგვისტოს დღე-ცხელი, მტვრიანი, ოფლიანი და მყრალი. სტამბოლი კი ყარს კლასიკურად და განსაკუთრებით მყრალია სტამბოლის ის უბანი, რომელსაც გალატა ეწოდება. გალატაში კი, ზღვის

ნაპირზე, აშენებულია საფრანგეთის საკონსულო. მე გადაჭრით არ შემიძლია ვსთქვა — ყარს თუ არა თვით საკონსულო, მაგრამ შთაბეჭდილება ისეთი დამრჩა, რომ უთუოდ საკონსულოსაც დაჰკრავს მყრალი სუნი.

საკონსულოს გარშემო ბევრი საუცფათო ფოტოგრაფიული აპარატი სდგას. თოთხმეტ პიასტრათ ათ წუთში ამოაცურებენ მღვრია წყალიდან შენს სურათს, მაგრამ ვაი მის შემხედავს! თუ გვერდში ვინმე ნაცნობი არა გყავს, რომელიც დაბეჯითებით დაადასტურებს, რომ ამ სურათის გადაღების დროს აპარატის ტუჩი მართლა შენზე იყო მიშვერილი — შეუძლებელია გამოიცილო საკუთარი თავი იმ სოველ ნამოქმედარზე, რომელსაც ათ წუთში ჩაგაბარებს ბერძენი ფოტოგრაფი საფრანგეთის საკონსულოს წინ.

მეც გადავიღე სავალდებულო სურათი, შევავსებინე საკონსულოს კანცელარიაში მჯდომ რუსის ქალს ფრანგული ანკეტა და ჩავდექი რიგში.

რიგის კუდი ქუჩაში სწყდება, ხოლო მისი თავი კონსულის კაბინეტზეა მიბჯენილი. მწკრივია გაბმული ასიოდე კაცი საგან. ჩემი ნომერია 132.

ხუთი საათის რიგში დგომის შემდეგ ჩემი პირველი ვიზიტი საფრანგეთის კონსულთან უშედეგოთ თავდება, ვინაიდან კონსულამდე ვერ მივალწიე.

მეორე დილით უფრო ადრე მოვედი, ენერგიულათ ვეცი კარის კაცს, მივიღე ნომერი 25 და მოვექეცი კუდში მთხოვნელთა წყებას.

ვინაიდან კონსულთან მთხოვნელებს წყვილად უშვებდენ — კონსულის კაბინეტში მოვხვდი ვილაც რუსის ოფიცერთან ერთად.

მე ბევრი საშიში წუთები გამივლია ჩემს ცხოვრებაში. ბევრჯელ სიკვდილისებური გზები გაშლილა ჩემს წინ, მაგრამ არასოდეს ჩემი გული ისეთი შიშით არ აძგერებულა, როგორც მაშინ როცა პირველად შევდგი ფეხი საფრანგეთის კონსულის კაბინეტში. არა, გული კი არ აძგერდა—გული დამუნჯდა. შემდეგ აიწყვიტა. აგრიალდა, ამო-

აწვა ქვევიდან ისეთნაირად, რომ გაშეშებული ენა კინალამ პირიდან ამომვარდა.

კონსული იყო **Monsieur Rossèt.**

ძველათ მგონი ადესაში ყოფილა საფრანგეთის რწმუნებულად. არის რუსეთისა და რუსულის მცოდნე. მოტეხილი აქვს ცალი ფეხი. აცვია ევროპიულათ და ფიჯაკზე მიკრული აქვს საპატიო ლეგიონის წითელი ნიშანი. ტანათ დაბალია და მოხრილი. სახე-გამშრალი და უფერული, შეკრეჭილი ჩალის ფერი უღვაშებით.

კაბინეტში ზის მარტო.

— მე ისევ ვიზის შესახებ მინდა გკითხოთ, — ამბობს მოკრძალებით რუსის ოფიცერი. ხომ არ მიგილიათ, ბატონო კონსულო, რაიშე განკარგულება ჩემი ვიზის შესახებ?

— არა, არ არის! მოსჭრა ბატონმა კონსულმა. — არ არის. თქვენ რა გნებავთ? გადმომხედა მე.

მე წავდგი ნაბიჯი წინ მაგრამ.

— **Но позвольте,** — თავდაჭერილი აღელვებით განაგრძობს ოფიცერი. წარმოუდგენელია ამდენი ცდა. ყველაფერს საზღვარი აქვს და ჩვენი მოთმინებაც არაა უსაზღვრო. თქვენ ხედავთ, როგორ გვიჭირს, რა ყოფაშიცა ვართ. ჩვენ, რუსის მხედრობას არ დაგვიმსახურებია ასეთი მოპყრობა... თქვენ არ უნდა დაივიწყოთ ჩვენი ბრძოლა, ჩვენი თავდადება... საერთო საქმისათვის... საფრანგეთისათვის... ჩვენ ვიბრძოდით...

— როგორ? უეცრად აპილპილდა კონსული-როგორ? ვიბრძოდითო?! ჩვენ ვიცით, როგორც იბრძოდით თქვენ, მოწყალეო. ხელმწიფევ. ვიცით. ჩვენც ვიბრძოდით, მაგრამ არა ისე, როგორც თქვენ. უკაცრავად, ნურას უკაცრავად! თქვენ გეტყობათ, როგორც იბრძოდით... გთხოვთ დასტოვოთ კაბინეთი და შემდეგ აღარ შეიწუხოთ თავი აქ მოსვლით. თუ რამ იქნა — წერილობით შეგატყობინებთ...

— მაგრამ... მაგრამ — უკან დახევით წაილაპარაკა ოფიცერმა — მე აქ... შიმშილით ვკვდები. მე აქ ცოლ-შვილი მეღუბება... მე უმუშევარი ვარ... მე გამათხოვრებული ვარ ამ საშინელ ქალაქში და ნუთუ ეს დამცირება

არაა საკმარისი... მე არაფერი აღარ დამრჩა. მე მივდივარ მარსელში, რომ მივიღო შავი სამუშაო... ნუთუ ამაშიდაც უარი მეთქმის. ნუთუ წყალში უნდა გადავარდე ჯანმრთელი კაცი....

ოფიცერს ეცვა ძველი ფრენჩი-ამერიკულ კომიტეტში მიღებული და ჩექმები — ძალზე შელანძლული. შეიძლება იყო 35. წლის. მაღალი, ახოვანი ვაჟკაცი. ზურგით მიეზღინა ის კარებს და პაუზის შემდეგ ისტერიულის ხმით, ყელში ჩასრესილი ტირილითა სთქვა.

— და ყველაფერი ეს თქვენთვის, თქვენი გულსათვის...

— გრათ, გთხოვთ დასტოვოთ კაბინეტი—მშრალათ მოსწყვიტა კონსულმა და როცა ოფიცერი გავიდა — ისევ მობრუნდა ჩემსკენ.

— თქვენ რა გნებავთ?

მე გაშეშებულ ხელში — მოსაკითხივით შემრჩა ჩემი პასპორტი და აჭრელებული ანკეტები. უხმოდ დაუდე წინ ეს ქაღალდები და მოუყევი: ერთი კვირაა, რაც სტამბოლში ჩამოვედი. ტფილისელი ვარ. საფრანგეთში მივდივარ ნათესავებთან. სწავლა მინდა. ფული ცოტა მაქვს და სტამბოლში დიდხანს გაჩერება უფრო გამალარიბებს. თუ შეიძლება, როგორმე... მისაშველეთ ვიზა, ბატონო კონსულო...

— შემოიარეთ ერთი კვირის შემდეგ. მე გავგზავნი პარიზში შეკითხვას თქვენს შესახებ.

— როგორც გენებოთ. გიანლებით ერთი კვირის შემდეგ... და გავიწიე კარებისაკენ.

— თქვენ გიცნობთ აქაური ქართული საკონსულო? გამომადევნა კონსულმა სიტყვა.

— დიახ, მიცნობს.

თავი დახარა და რალაც დააწერა ჩემს ქაღალდს. მე წავედი. კარებში შევეხეჩე მეორე წყვილს-ბავშვიან დედაკაცს და ჩოხიან მთიულს.

გამოვედი.

საკონსულოს ეზოში — კიბესთან თვალი მოვკარი ოფიცერს, კონსულთან რომ შეხვდა უსიამოვნო ლაპარაკი

მე შეეჩერდი, თვალი ავარიდე. ის იდგა ქუჩის პირას მოხრილი, შეწუხებული და სასოწარკვეთილი. ელაპარაკებოდა ქალს, რომელსაც გვერდზე ეკროდა ოთხი თუ ხუთი წლის პატარა გოგო.

ვინ იყო ეს ცოლქმარი? მრავალთაგანი — ყირიმიდან გამოქცეულთა შორის. ოფიცერი — ლამაზი და მდიდარი ახალგაზრდა, რომელიმე გამოჩენილი რუსული გვარისა და მოსამსახურე ასეთივე წარჩინებულსა და გამოჩენილ პოლკში. შეხვედრა და გაცნობა პეტერბურგის ბრწყინვალე საზოგადოებაში. მოკლე რომანი, საზეიმო ქორწინება და მოკლე სიზმარი, ბედნიერი ცხოვრების მსგავსი.

რომანი ფუჭდება ყირიმში. ეხვევა ევაკუაციის კოშმარებში და თავდება სტამბოლში. ესე იგი, ამ საკონსულოს წინ იწერება ამ რომანის უკანასკნელი თავი და სად დაიწერება მისი ეპილოგი — ვინ იცის?

დადუმებული სდგას ცოლ-ქმარი საკონსულოს წინ. მისჩერებიან საკონსულოს რუხ კედლებს და მათსავითვე განიავებულ ხალხს — ვიზას რომ უცდიან და ელიან ხსნას — საფრანგეთში: ზოგი მარსელის ახლო დაწყებულ დიდი არხის სამუშაოზე დადგომით. ზოგი რენოსა და სიტროიენის საავტომობილო ქარხნებში. ზოგი ვერდენის მიდამოებში დაფლულ მავთულების ამომთხრელ მუშათა ჯგუფებში. და კიდევ ვინ იცის სად და რა გზით.

აქ, ამ საკონსულოსთან ყოველდღე ფუსფუსებს თეთრი, ფრთამოტეხილი რუსეთი. მოდის აქ დილით — ვიზის იმედით გულში და ბრუნდება შუადღეზე — იმედდაკარგული. დამწვარი გულით, დამწვარი სხეულით, დამწვარი კუჭით და ავსებული — ბრაზითა და ბოღმით ყველაფერის წინააღმდეგ და პირველად ყოვლისა — წინააღმდეგ საკუთარი თავისა.

ნელის ნაბიჯით, უხმოდ სტოვებს ცოლ-ქმარი საკონსულოს კარებს და მიყვება საბაჟოს ქუჩას ზღვის პირზე. უკან მისდევს პატარა ბავში, რომელიც მაგრად მიკვრია დედის გახუნებულ შავ კაბას და მისძახის:

— Мамочка, я хочу слойку. Купите, мама, слойку.

მაგრამ არც დედა, არც მამა ყურადღებას არ აქცევს ბავშვის ძახილს, თითქო ეს მათი შვილი არ იყოს, თითქო არ არსებობდეს იგი და არ ითხოვდეს ტკბილ, დაშაქრულ „სლოიკას“, რომელიც ღირს ორი პიასტრი.

მიდიან ნელის ნაბიჯით და მწუხარებით გამოშტერებული მათი თვალები არ ეძებენ გზას. ვგრძნობ — ისინი არამც თუ ხედავენ რასმე — (ისინი არაფერს არ ხედავენ), არაფერსაც არ ფიქრობენ ისინი ამ წუთში, ისეა გაცივებული მათი გონება და ნებისყოფა — დაჩლუნგებული.

ცოლ-ქმარი ჩერდება გალატას ტუნელთან. იქ, სადაც ქუჩის კუთხეში იყიდება შეკერილი ტანსაცმელი.

მე ვჯდები ფუნუკულიორზე და ვბრუნობი შინ.

ვბრუნდები და თან მიმაქვს მარაგი იმედისა, რომელიც კონსულმა გამომატანა მთელი კვირის საზრდოთ.

თავი მხუთმეტი.

— ემელიან, — ვეუბნები მე ლომთათიძეს, როცა საფრანგეთის კონსულმა კიდევ ერთი კვირით გადამიღო ვიზის საკითხი, — ემელიან, ვატყობ, რომ ცუდათაა ჩემი საქმე და ჩემი სტამბოლიდან გასვლა ძალიან რთულდება. სტამბოლში ხარჩენა ხომ შენც კარგად იცი რას ნიშნავს. არა და რა ვქნა, რა გავაწყო, მირჩიე ერთი თუ კაცი ხარ.

— ფულზე რავა ხარ? — მეკითხება ის.

— დღეს გადავთვალე ჩემი ქონება — უპასუხებ მე — მიუმატე ყველა ჩამორჩენილი პიასტრები და შეიქნა სრული ოცდაათი ლირა.

— უი, შე საცოდავო! — ვერ შეიკავა განცვიფრება ლომთათიძემ, მაგრამ უცბათ შენიშნა, რომ ეს წამოძახილი ცუდათ მოუვიდა. შეატყო, რომ შევშინდი ამ სიტყვებზე და გამოასწორა...

— ჰო, თანხა, რასაკვირველია, მცირედია, მაგრამ ერთი თვე ამითი როგორმე გასტან. ერთ თვეში როგორ გაწყრება ღმერთი, რა დააკავენს შენს ვიზას. მდივანიც მგონია გუშინწინ გაემგზავრა პარიზში. მეცადინეობას არც

ის დააკლებს. მისწერე დღესვე კიდევ. ჩხიკვიშვილსაც მის-
წერე — ის ხომ პოეტებს კარგათ გიცნობთ. მისწერე, რომ
ყველა დაგეხმაროს გარეშე საქმეთა სამინისტროში. შემ-
დეგ...

— შემდეგ, ძმაო კიდევ მაქვს ერთი გამოსავალი და
ამის შესახებაც მიჩიე. მე ამოვიღე ორი კონვერტი ალექ-
სანდრე ჯაყელის სახელზე. — ეს ჩემი ვარაუდი ამ წე-
როლებშია დაბეჭდილი. ერთია მოწერილი მწერალთა კავ-
შირის თავმჯდომარის კოტე მაყაშვილის მიერ ჯაყელის
სახელზე. ამ წერილის შინაარსი შე ვიცი. ის იწერება, რომ
ნიკო მიწიშვილი ნიჭიერი ყმაწვილია, მწერლობაში იმე-
დებს იძლევა, შენ ქართველი კაცი ხარ და მიეშველეო.
მეორე წერილი ჯაყელისავე მეგობრის მიერაა მოწერილი
იმავე შინაარსისა. რას ფიქრობ შენ ამაზე? გასჭრის თუ
არ გასჭრის? გამოვა რამე ამ საქმიდან, თუ ბარემ ეხლავე
გავანებო თავი და რამე სხვა გამოსავალი მოვიფიქრო?
თუმცა ის კი უნდა გითხრა, რომ საქართველოდან წამო-
სვლისას დიდი იმედი მქონდა ამ ორი წერილისა და სხვა
რალა მოვიფიქრო აღარ ვიცი ამ თათრების ხელში. დამრ-
ჩა შაქრო მდივანის იმედი. მაგრამ ის უკვე საფრანგეთშია,
მე — სათათრეთში და მისთვის ძნელია ყველა იმ კეთილი
სურვილების განხორციელება, რომლითაც მდივანი გან-
წყობილია ჩემდამი...

ემელიანეს გაეხარდა ეს ამბავი. მის თვალში ჩემი საქ-
მის შანსებმა ერთი ორათ იმატა და ჩვენი ღრმა გასაუბ-
რების შედეგად გამოთქვა მტკიცე იმედი, რომ ჯაყელი
დამეხმარება და სტიპენდიასაც კი დაამინიშნავს. და თუ
სტიპენდია არ მოხერხდა, ერთდროულ რამეზე ლაპარაკიც
ზედმეტია. ეს ხომ იქნება და იქნება. ეჭვი არააო, მითხრა
ემელიანემ.

გამოირკვა ისიც, რომ ჯაყელი და ხომტარია სტამ-
ბოლში მეფეებთან გრძნობენ თავს გადმოხიზნულ ქართ-
ველთა შორის, ვინაიდან ამ ორ კაცს ჰქონდა ფული, სხვებს
კი ფული არ ჰქონდათ და ეს უბრალო არითმეტიკა სწყვე-
ტდა ყველაფერს.

შემდეგ მე ბევრჯელ მქონდა შემთხვევა მომესმინა საუბარი ამ ორი მდიდარი ქართველის შესახებ ემიგრანტების წრეში. გამიგონია მათზე ბევრი ცუდი და კარგიც გამიგონია, თუმცა მართალი უნდა ვსთქვა — უფრო მეტი გამიგონია ცუდი.

უცხოეთში ადამიანი განსაკუთრებულის გამახვილებით იმახსოვრებს ყველაფერს უმთავრესად პირველ ხანებში და ჩემს გულშიაც ყოველივე ნათქვამი და გაგონილი იმ დროს რაღაც დაუვიწყარ შთაბეჭდილებით რჩებოდა. და როცა ეხლა ვიგონებ განცდილს — შიში მიპყრობს იმ სახითათო. უფსკრულისა, რომელზედაც მე დავდიოდი. მე ბევრი არ დამკლებია, რომ დამეკარგა რწმენა საკუთარი თავის და ადამიანისადმი პატივისცემა.

კაცის კაცობა უნდა გწამდეს. უნდა იყო დაჯერებული იმაში, რომ თუნდაც ყოვლად დაკოჟრებულ სულში მოიპოვება უკეთილშობილესი, შეურყვნელი და სპეტაკი კუთხეები, სადაც დაფარულად სთვლემს თვისება, რომელიც ამაღლებს, ამშვენებს ადამიანს და უფლებას აძლევს მას დაუძლეველი იყოს ბუნების წიაღში. თუ ადამიანი არა გწამს, თუ არ გჯერა, რომ უდიდეს გაჭირვების დროს შენთან მოვა შენი მტერი და ხელს გამოგიწვდის ძმობისა და მეგობრობისათვის — ისე ამ ქვეყანაზე ცხოვრება უაზროა და შეუძლებელი.

და თუ შენ ადამიანი არა გწამს, უთუოდ გეეჭვება საკუთარი თავიც და აღარც მისი გამარჯვების გჯერა. ურწმუნო გული ვერ გაიმარჯვებს. და არ ყოფილა შემთხვევა, რომ ასეთნაირ გულს ღირსებოდეს გამარჯვება და საბოლოო სიხარული.

ეს გული აღარ მქონდა ჩემს თანამემამულეებს უცხოეთში. არც მდიდარს, არც ღარიბს. და არც ერთ მათგანს ადამიანის კაი კაცობა აღარ სჯეროდა.

მათ მოქმედებას საფუძვლად არ ედო რაიმე მორალური ფუძე. ყოველი საქციელი გამოწვეული იყო იმით, რომ ეს ამ წუთში საჭირო იყო. საჭირო იყო ფულის მოვნა და სთხოვდენ ხოშტარიას. სთხოვდენ ჯაყელსაც, თუნდაც საჭირო ყოფილიყო თავმოყვარეობაზე გადატარება. ხოშტა-

რია მისცემდა ფულს ისე, რომ არაფერი ემატებოდა მის კეთილშობილებას მიმღების თვალში: და ასე სიცალიერეზე შენდებოდა უმიწაწყლო ხალხის ურთიერთობა. ამიტომ მიმღებიც და მიმცემიც დედას იგინებოდა და ადამიანი არსად სჩანდა. მოყვრობის დროსაც ისინი იდგენ ერთი მეორის წინაშე როგორც მტერი და შემაერთებელი ხიდი მათ შორის არ სუფევდა.

განა ჩემს ლაპარაკში დავცინო მინდა ვინმეს? ან და ჩემი საუბარი გმობა არის მათი, ვინც მე ვნახე და ვისიც შემეშინდა ერთ დროს? არც იმიტომ გავიხსენე ეს ამბავი რომ ხელი ვკრა ვინმეს — ეს მოყვა სიტყვას იმის შესახებ რომ უცხოეთში ადამიანი, განსაკუთრებით სამშობლოს მოწყვეტილი, ადვილად კარგავს კაცობას, თავმოყვარეობას და იმას რასაც უბრალოდ ადამიანობა ჰქვია. ქონება ისე არსად არ მოსჩანს, როგორც უცხოეთში. და სილატაკე არსად ისე არ ყვირის, როგორც იქ. ევროპა აუთოვებს ადამიანის ბუნებას ისე, რომ სისხლისა და სინდისის ცვარი მასში აღარ რჩება.

და როდესაც ორი წერილით ხელში მე მივაღეჭი ჯაყელის ბინას — ყველაფერმა, რაც ზევით ვსთქვი და უფრო მეტმა, რაც აქ ვერ მოვათავსე — გაიელვა ჩემს თავში ზარის რაჭკუნის ჩაქრობამდე.

— არ მიგიღებს, — მეუბნებოდა ლომთათიძე. და თუ მიგიღო — ხელცარიელი არ გამოგიშვებს. ეცადე რომ მიგიღოს და ცოტა მაგრათაც ქე მიაღეჭი...

— მიმიღებს, — ვფიქრობდი მე გულში. უთუოდ მიმიღებს და არც ხელცარიელი გამომიშვებს... მაგრამ ეკარს რომ არ მიღებენ?!

გაალო ქალმა კარი და შევაგზავნე წერილები. მიმიღო.

მიმიღო და შემპირდა. შემპირდა და სთქვა, რომ — „სიამოვნებით ეცდება შეასრულოს ჩემი თხოვნა და განსაკუთრებით — თხოვნა ბატონი კოტე მაყაშვილისა“...

ჭიათურელმა ვაჭარმა დამიფასა მაყაშვილი სტამბოლში. ალბათ მწერლობაც დააფასა რამოდენიმეთ. ნოე რა-

მიშვილმა მწერალთა კავშირის თავმჯდომარე საქართველოში ვერ დაათვასა და კაბინეტიდან გამოაგდო:

კონფლიქტები არასოდეს არ იწყება პრინციპიულ საკითხებიდან.

თავი მეთექვსმეტი.

ოქროს რქაზე ბევრი გემი სდგას. და ყველაზე დიდია მათ შორის გემი — „ვლადიმირ“. ამ გემს ოცდა ათი წლის ისტორია აქვს. მაგრამ ამბავი, რომელმაც ის მაგრად მიაბა „ოქროს რქაზე“ — მეტად შემზარავი და დრამატიული ამბავია.

...ყირიმის ნახევარ კუნძულზე უკანასკნელად მოისმის ჩაწყვეტილი თოფის ხმა. ზღვის ნაპირებზე უგზო-უკვლოდ უპატრონოდ და უღვთოდ იზილება წითლების მიერ დარბეული ვრანგელის ჯარი; განადგურებული, დამარცხებული, იმედგაცრუებული და მოტყუებული მათ მიერ, ვინც წაეჩხუბა რუსეთში ოქტომბრის ძალას.

ღამეა. ნავთსადგურში ბნელა და ნავთსადგური მდუმარეა სიკვდილის მოლოდინში. დილით კი-გარიჟრაჟზე, როცა მზის სხივები თანდათან ფარდას ხდიან საბოლოოდ დაღუპულ თეთრ საქმეს — პატარა ქალაქში იწყება პანიკა. პანიკა პირს აღებს, როგორც გაუმაძლარი ვეშაპი და ამ ვეშაპის პირში თვალდახუჭული მიისწრაფვის ყველა: ლენერალი, ოფიცერი, ყაზახ-რუსი, სალდათი, ქალი, ბავშვი; ავეჯი და ტანსაცმელი, სურათი და ღვინის ბოჭკა, ნოხი და პიანინო. და ყველაფერი ეს მიექანება, როგორც წყალი წისქვილის ღარში — გემისკენ — „ვლადიმირზე“.

ორი ათას კაცზე მეტი დაიტია „ვლადიმირმა“ იმ ზამთრის დილით, როცა ვრანგელის ჯარი საბოლოოდ დამარცხდა და წითლების მიერ დევნილი, მიენარცხა შავი ღზვის ნაპირს.

— ჰო და, აუშვით გემი, — მიაშობდა „ვლადიმირის“ ბოცმანი — უკრაინელი ნიკიფორე. ზამთარია და საშინელი ღელვა. „ვლადიმერზე“ ოცდა ხუთი წელიწადია ვმუშაობ. დიდი ქარიშხლები მინახავს ინდოეთის ოკეანეში.

ოხოტსკის ზღვაში, ბისკაიაზე. ამ უზარმაზარ შენობას ერთი აქედან შემოკრავს ტალღა და გადაუარს თავზე, მეორეს იქიდან და — გადმოუარს. გადახედეთ რამდენი საუენი აქვს სიმაღლე ამ გემს. ჰო და, ეს გემი ისე გაწვება ლელვის დროს, რომ პალუბა ზღვის ზედაპირს ხეხავს. ხან ერთ მხარეს, ხან მეორე მხარეს. გამოცდილი მყავს „ვლადიმირი“ — მაგარი გემია. გამტანია. ცხადია — ინგლისშია გაკეთებული. ჰო და, ატყდა ზღვა. რა ეშველება ამდენ ხალხს? ყველაფერი არეულია და ისეა დალაგებული, რომ თუ მაგარი ზღვა შეგხვდა — ასეთნაირად დატვირული გემი უთუოდ გადაბრუნდება და მორჩა...

მაგრამ ზღვის ამბავი არაა საინტერესო.

თქვენ ის უნდა გაიგოთ, რომ ფეხისალაგის რიგში დილით ჩამდგარი კაცი საღამომდე ვერ ეღირსებოდა საშველს... აირია ერთმანეთში ლენერალი და სალდათი, ქალი და კაცი, ყველა აწვა და აჯდა ერთი-მეორეს; ყველა ერთი-მეორეს სჭამდა, აგინებდა, სრესდა. იყო ტირილი და უბედურება. ზოგი მოდიოდა სულ ულუკმაპუროდ — თოფით ხელში. ზოგს ცოლი ნაპირზე დარჩა და შვილი შერჩა ხელში. ზოგის ცოლი გემზე მოხვდა — ქმარი კი დარჩა ნაპირზე. ტირილი, ვიში და უბედურება ტრიალებდა „ვლადიმირზე“. ვიმოგზაურეთ ათი დღე სტამბოლამდე, როცა მესამე დღეს შეიძლებოდა მისვლა. გაჩნდა შიმშილობა გემზე. ამასთანავე გავრცელდა ხმა, რომ სევასტოპოლიდან დაგვედევნა ბოლშევიკების წყალქვეშა ნაგები... შემდეგ გაგვიფუჭდა მანქანა და სწორედ ამ დროს შუა ზღვაში უეცრად წყალქვეშა ნავიც გამოჩნდა. წარმოგიდგენიათ, რა ამბავი დატრიალდა გემზე? შეიქნა ზრიალი, კივილი და საშინელი მოთქმა. როგორც მეორეთ მოსვლის დროს — თითქოს დადგა აღსასრული. წყალქვეშა ნავი ჯერ შორს გამოჩნდა. შენდევ ჩაყვინთა და „ვლადიმირის“ ცხვირთან ამოყო თავი. შეუძლებელია გადმოგცეთ, რა შიში და უბედურება დატრიალდა იმ დროს. წყალქვეშა ნავი კი გაქრა. მაგრამ შიშმა დიდხანს გასტანა მაინც. დაღლილი, დაქანცული, მშიერ-მწყურვალე ხალხი ეყარა

დაწყვეტილი ნერვებით. პატარა სიგნალი, თუ გემის კივილი, იწვევდა პანიკასა და სასოწარკვეთილებას.

მაგრამ უარესი იყო წინ...

სანამ სტამბოლში შევიდოდით კავაკაში გაგვაჩერეს. გემს შემოეხვია თათრის მენავეები. ნავეები სავსე იყო სურსათით და შეიქნა საშინელი, წარმოუდგენელი ვაჭრობა. გაიძრობს ჯარის-კაცი ჩექმებს, მოაბამს ბაწარს და ჩაუშვებს მენავესთან. ქვევიდან თათარი იმავე ბაწარზე გამოაბამს პურის ნაჭერს. ესე იგი გაცვლა-გამოცვლა სწარმოებს. ჩადის თათრის ნავეებში ტუფურკები, პერანგები, ჩექმები, საცვლები, პალტოები, ოქროს ბეჭდები და ყოველგვარი ნივთი — და ამოდის ქვევიდან პური, ხმელი ლელვი, თუთუნი და პაპიროსი...

გაძარცვეს ამ თათრებმა ლტოლვილები. გაფცქვნეს. პურში წაიღეს ყველაფერი. ღენერლებსა და ვაჭრებს ეს არ სჭირდებოდათ, მაგრამ ასეთები „ვლადიმერზე“ არც ისე ბევრი იყო. უმთავრესად მოდიოდა ღარიბი ხალხი. სამი დღის ნამშიერევი — ისვროდენ წყალში ყველაფერს, ოღონდ კი ნატეხი პური ეშოვნათ და სული მოებრუნებინათ. ასე ჩამოვედით სტამბოლში.

ჯარისკაცები გალიპოლის ლაგერში წაიყვანეს, (თქვენ აღბად გაგიგონიათ რა არის გალიპოლი), ღენერლები და თავადები კი სტამბოლში დარჩენ, მაგრამ მათაც მალე ჩამოყარეს ყურები. ეხლა ისინიც გატყაული დადიან სტამბოლის ქუჩებზე, ყიდიან გაზეთებს და ტარაკანებს აჭიდებენ...

ივარგა „ვლადიმირმა“ იმ ხანებში... სასწაული იყო ამდენი ხალხის ჩამოყვანა...

და მის შემდეგ მიბმული ვართ კასიმ-ფაშასთან. ეხლა ამბობენ, რომ „ვლადიმირი“ ისევ აიშვებსო, მაგრამ ჯერ არაფერი ეტყობა. კარგი გემი კი იყო. მშვენიერი გემი იყო, — ამბობს ბოცმანი ნიკიფორე.

მე კი გულში ვამბობ, რომ „ვლადიმირი“ უთუოდ კარგი გემია. ამასთანავე ცალიერიცაა და ჯერ-ჯერობით არსად მიემგზავრება. და ვფიქრობ, რომ უთუოდ არაფერი არ უჭირს რომ ამ გემზე იცხოვროს კაცმა. რაღაც კომბი-

ნაციების წყალობით ამ ჟამად ალექსანდრე ჯაყელი ამ გემის პატრონივითაა და მე ვსთხოვ მას ნებართვას ამ გემზე ცხოვრებისას. თვეში ათ ლირას ვიხდი ოთახის ქირას და ეს ათი ლირა მაინც შემრჩება. მთავარი კი ისაა, რომ ერთი კვირის შემდეგ მე ერთი პიასტრიც აღარ მექნება და თუ ამ ერთ კვირეში რაიმე რადიკალური ცვლილება არ მოვახდინე ჩემს ცხოვრებაში — გათავდა. შინ დასაბრუნებელი ფულიც აღარ მექნება და გრიგოლ ლალიძის დიპირება უკვე რეალურ გამოსავლად მეჩვენება ხანდიხან (ფულს გამოგიგზავნიო შემპირდა).

აღარ მახსოვს მივიღე თუ არა გარკვეული პასუხი ჩემს თხოვნაზე ჯაყელისაგან. ვიცი რომ რამდენიმე დღის შემდეგ მე მივაღეჩი ჩემი მოჩელტული ჩემოდანით „ვლადიმირის“ ტრაპს. უკანასკნელი ათი პიასტრი მივეციოთ მენავეს და მოვსწყვიტე ხმელეთზე გასავალი გზა...

— იწყება ნიკოლოზ ჩემო. იწყება. — ვეუბნები მე საკუთარ თავს და ვალაგებ მეორე კლასის ცალფა კაიუტაში ჩემს ბარგს.

რა იწყება? არ ვიცი რა იწყება. იწყება ის, რომ ჯიუტი გაჭირვება ისევ კარზე მომადგა და ისევ შემადგა ფეხი. რას იზამ. ასეთია ცხოვრება. ვიცი, რომ ასეთია, მაგრამ ძნელია მუდამ წელმოხრილი სიარული. უკვე ოცდა ხუთი წელიწადია ეს გაჭირვება ზურგზე მაზის. შემჯდომია, როგორც ჩავლადარი — მთიულ ცხენს და მიმაქანებს. მეთაკილება. მათრახს არ დავირტყამ, ვითმენ, ავიტან, მაგრამ როდემდის? ერთი ხომ უნდა ჩამოჰკრას საათმა, როცა გადავეშვები მაღალ თხრილს და უკან მიტოვებულ ნაპირზე გავშხლართავ ჩემს დაუნდობელ მხედარს! როდის იქნება ეს დრო, და იქნება კი როდესმე? არა და ეხლაც აჩრდილივით ამომიდგა გვერდში ეგ დაუნდობელი ამ უზარმაზარ გემზე და ხელახლა მოითხოვს ძველი უფლების განახლებას: მე მისი ყმა ვარ, თუმცა ყმობა არ მსურს.

ასეთია ცხოვრება...

და გენანება კაცს საკუთარი თავი, ბავშობა, სიყმაწვილე, გატარებული ცივად და გაუთბობელად. გწყენს, როცა ხედავ, რომ ახალგაზრდობაც თავდება ასეთი მკაცრი,

ქარიშხლიანი დღით და ღამეც ასევე ცივად და გაუნათებლად დაგიღამდება...

— ჩემს მხარეში ამტანი ხალხია და მართალი, — ვინუგეშებ მე თავს, — და რწმენა მათი შეულახველია ჯერ-ჯერობით. გულიც მთელია მათი, როგორც სავსე თხილი. შეიძლება მიშველოს მე დედა-ჩემის ლოცვამ, რადგან მას ბეჯითად სწამს ღმერთი და ყოველდღე ახსენებს ხახულისა ღვთისმშობელს ჩემი გულისათვის... შეიძლება ღმერთი აღარ იყოს და წმინდა გიორგიც აღარ ძლევამოსილობდეს ძველებურის ძალითა და იერით, მაგრამ რა დააშავა დედა-ჩემმა, ან რა დავაშავე მე. და ნუ თუ ტყვილა უნდა ჩაიკარგოს ამდენი ლოცვა და ამდენი სიმხურვალე მართალზე გულისა? ვინმემ, სადმე უთუოდ უნდა გაიგონოს ყველაფერი ეს. და უთუოდ უნდა სთქვას თავისი სიტყვა. არა, არ უნდა დაიკარგოს. რალაც სამართალი ანაწილებს ქვეყანაზე ტკბილსა და მწარეს და ქვეყანაზე არ იკარგება არც ერთი წვეთი ცრემლისა. არიან ველნი, სადაც ცრემლნი ოქროს თავთავებად იქცევიან და ნიავი თბილი სიხარული-სა აღაღანებენ ობლის ყანას. ასეა. უთუოდ ასეა, ვინაიდან ცალგვერდა შეიქნებოდა ქვეყანა უამისოდ და გადასწონიდა მას დაღუპვისაკნ — ზედმეტი ბედიც. ზედმეტი უბედურებაც ადამიანისა. ისე, როგორც უთანასწოროდ დატვირთულ გემს — მოტბორებული ტალღა.

მე ვსწევარ „ვლადიმირის“ სამუსიკო ზალაში. აქვე კედელზე მიმაგრებულ პიანინოს მისჯდომია ინჟინერი აპალონ კობახიძე და ანადგურებს უსათნოეს ქართულ მოტივს

„განუსვენე შენ უფალო

სულსა მონისა ამის შენისასა...

— ვერ მოგართვეს, აპალონ ჩემო, ვერ მოგართვეს. რამდენიც გინდა იმდენი განისვენე შენი მოფხეკილი თავით. მე კი-სიცოცხლე მინდა, ცხოვრება მინდა, არ მოვკვდები, არ მოვკვდები. აჰა...

მევსება თვალეზი ცრემლებით.

ფეხაკრებით ვიპარები გარეთ და ავდივარ კაპიტანის ხიდზე.

თავი მეჩვიდმეტი.

გადის სექტემბერი. ბოსფორიდან ჰქრის შემოდგომის ქარი და მე კი ისევ კონსტანტინეპოლში ვარ. ბევრი ჩამოვიდა საქართველოდან ამ თვეებში. ბევრი გაემგზავრა — პარიზში, ბერლინში, პრაგაში. ყველამ გზა ნახა. ყველამ თავს უშველა: არ იქნა მხოლოდ ჩემი საშველი. აშკარა ხდება, რომ საფრანგეთის მთავრობა ნებართვას არ მაძლევს...

ამაოა ვიზიტები კონსულთან. უშედეგოა თხოვნა და შუამდგომლობა — არაფერი არ სჭრის და არაფერი არ ალბობს ფეხმოტეხილი კონსულის დაკოჭლებულ გულს.

მიდიან უფერული დღეები გემზე. საჭმელს ვჭამ დღეგამოშვებით: პურსა და შაქარს. არის დღეები, როცა პური მენატრება ისე, როგორც ავადმყოფ იმერელს.

ვდგები რიჟრაჟზე. ვკითხულობ ჯერ კიდევ სოველ პალუბაზე მეფე თეიმურაზსა და გურამიშვილს და ინტერვალებში ვადგენ სიას იმ პოეტებისას, სამშობლოს გარეთ რომ დაიხოცენ — საქართველოს ნახვის ნატვრაში.

შემდეგ გავყურებ კასიმ-ფაშას და უთვალთვალეებ გალატის მხრიდან მომავალ ნავეებს — იქნება ვინმე ნაცნობი მოადგეს ჩვენს გემს, რომ გამოვართვა ათი პიასტრი: ნავის ფული, ნაპირზე რომ გამიყვანოს სანადიროდ.

მაგრამ ვის რა საჭმე აქვს ამ გამოყრუებულ გემზე?

ისევ ჩავდივარ ჩემს სოროში — ცალფა კაიუტაში. ვღეჭავ გამომწვარ ყალიონს და ვწერ „შავ ვარსკვლავს“ ...

...კიდევ კვირა და ჯაყელი მაძლევს გზის ფულს. ის მპირდება „ჩემო“ს გემზე მოთავსებას ჰოლანდიაში წასასვლელად. იქ უფრო ადვილი ყოფილა ფრანგული ვიზის მოვნა.

ეს — ვალიკო მგალობლიშვილისა და კოლია მასხარაშვილის მუშაობაა. იყო ორი ქართველი კაცი, რომელთაც „ვლადიმირზე“ მიმეგობრეს და ამაგი დამდგეს ოსმალეთში

ეხლა, როდესაც ვფურცლავ სტამბოლის პერიოდის შენიშვნებს უბის წიგნში — ვკითხულობ: „ვალიკოს — ხუთი

ლირა“. კოლიას — ათი პიასტრი, ხუთი, რვა, ერთი ლირა, ორი, პიასტრი“...

ეს ძველი ვალია ჩემზე — დღემდე გაუსტუმრებელი. გადვიხდი, ბიჭებო, გადვიხდი. ქვეყანა არც ისე დიდია მე რო მეგონა.

მაგრამ — ჰოლანდია...

მაშასადამე, ღზავით სიარული ევროპის გარშემო ჰააგამდე. ესე იგი ერთ თვეზე მეტი ხეტიალი გაშლილ ზღვაზე. რაღაც კოლუმბისებურია ჩემს მოგზაურობაში, მაგრამ ჩემთვის უფრო მძიმე და ძნელი, ვინაიდან მე არ ვეძებ ამერიკას...

ნიდერლანდების დედოფალი ვილჰელმინა! ქალო, რომელიც გევხარ კარაქითა და რძით ავსებულ ჰოლანდიას. მე ვერ ველირსე ჰააგაში მისვლას და ვერ გამოვიყენე შენი თავაზიანი სტუმართ-მოყვარეობა: ჰოლანდიის ვიზა მივიღე, მაგრამ ინგლისელმა კაპიტანმა, რომლის გემი, მარგანეცით სავსე, ბოსფორის ყელში დადგა — არ ისურვა ჩემი წამოყვანა...

მე ვიწონიდი სამ ფუთსა და შვიდ გირვანქას. ვინაიდან ცამეტი გირვანქა წაიღო სტამბოლში დარდმა, ფიქრმა და აიმშილობამ. მე ვიწონიდი სამ ფუთსა და შვიდ გირვანქას და გემი „შეფილდი“ იტევდა ოთხმოცი ათას ფუთ შავ ქვას. შევეყოლებინე იმ ოთხმოცი ათას ფუთში, იმ ურჯულო კაპიტანს, რა იქნებოდა... არ ქნა. მოიმიზეზა, რომ ზღვა ეხლა თანდათან ფუჭდება და ბისკაის ღელვას ვერ აიტანს ასეთი სუსტი ყმაწვილიო. რა იცოდა მან, რომ ჩემი გული ატლანტიკასავით აზვირთებული იყო — აფრენილის ოცნებითა და სურვილებით და რომ მე მზად ვიყავი განმეცადა ბისკაის ღელვაც. არ ქნა. მოქაჩა კოთხოსავით ღრმა ჩიბუხი, გადააპურჭყა მთელ საყენზე, მიიღო ფოსტა და გაუდგა გზას.

...მე დავითვერი იმ დღეს რესტორან „იაკორში“. პერაზე დავიწყე „ინტერნაციონალის“ მღერა, მაგრამ კარზე მოდებამის ყოფილმა მოფერმა დროზე გამაჩერა, ვინაიდან გამოჩნდა ჯოხიანი ინგლისელი პოლისმენი.

— როდისმე ვიმღერებ შე ინტერნაციონალს „შეფილ-
დის“ გემზე და ისე მივალ ედინბურგში, — ჩავაყვირე
წინდახედულ შორაპნელ ბიჭს და გავბრუნდი ნაწყენი
„ვლადიმირზე“.

შაბათი იყო. გემზე დამხვდა ნაშაბაშევი ქართველი მუ-
შები.

— შე საწყალო, კილო ვერ გეეტიე აქედან?, — გაკვირ-
ვებით მეკითხება წაბლის წვერა ვეჭილი.

— ნებართვას არავინ მაძლევს და რა ვქნა, — ვუპასუ-
ხებ მე და უერთდები მოსაუბრეთა ჯგუფს.

— რა გითხრა იცი, — ჩუმათ მეუბნება ცოტა ხნის შემ-
დეგ ნაცნობი ინჟინერი. — შენ ჩემო ძმაო, ასე თუ გა-
ყევი — ჩალპები ამ სტამბოლში და ის იქნება. ნუ თუ ვერ
ხვდები, რომ ეს ყველაფერი ჩვენი საკონსულოს საქმეა.
ისინი შენ ბოლშევიკების კაცად გთვლიან და უთუოდ ასე-
თი ცნობა აქვთ შენს შესახებ ფრანგებისთვის მიცემული.
სხვანაირად შეუძლებელია. მესამე თვეა აქა ხარ და ამდენ
ხანში თვლა არაა იმდენმა ვიგინდარამ ჩაიარა ეს დარდა-
ნელი. რაღა შენზე გაწყრა ღმერთი? აქ რაღაც სხვა ამ-
ბავია. ფრანგები მაგენს უჯერებენ ამისთანა საქმეში და
შენი აქ ჩარჩენა უთუოდ მაგათი საქმეა.

— მე არ ვფიქრობ, რომ ასე გარეცხილი იყოს ჩვენი
საკონსულო სინდის-ნამუსისაგან.

— როგორ თუ გარეცხილი! აბა რას იზამენ, ჩამოდი
თუ არა — მოხსენი პირი და შექენი ძახილი: რას კვდებით
აქანა შიმშილით, სახლში წადით, საქართველოში თხა და
მგელი ერთად სძოვსო. ჰო და, როგორ ფიქრობ. ასეთი აზ-
რების გავრცელება მენშევიკებს ეამებათ, თუ როგორ...

— კი, მაგრამ, რა ჩემი ბრალია. მკითხავდენ და ვუპა-
სუხებდი, როგორც ვიცი და რაც ვიცი. მე ხომ ბოლშევიკი
არა ვარ.

— მით უარესი, რომ ბოლშევიკი არა ხარ. მიტომ უფ-
რო დაგიჯერებს ყველა, რომ ბოლშევიკი არა ხარ. ასეა,
დამიჯერე. დროზე მოუარე თავს. ან და უკანვე დაბრუნ-
დი თუ არა ეს „ვლადიმირი“ სადაცაა ქე წავა და მერე
ვისი ყველაის იმაში შეყოფ თავს — აღარ ვიცი.

სიცილმა დაფარა ჩვენი იდუმალი საუბარი.
ლაპარაკობდა წაბლის ფერა ვეჭილი.

— გამომძიებლად ვიყავი. და გორის მაზრაში გავყევი
დამფუძნებელი კრების წევრს მიტინგის მოსაწვევად. მოა-
წყდა დიდძალი ხალხი, აივსო კანცელარიის ეზო და გაი-
წართა სიტყვები. დასასრულ მთავრობის წარმომადგენელ-
მა სთხოვა ხალხს გამოეთქვა სურვილი და თავისი გაჭირ-
ვება. ხმა არავინ ამოიღო. ასე იყო გასუდრული ხალხი კაი-
ხანს. შემდეგ წამოდგა ერთი ხნიერი გლეხი და დაიწყო.

ხალხი იმას თხოულობს რომაო, ერთი სათხოვარი გვაქ,
თქვენი ჭირიმეო. ნიკოლოზის დროსაო ჩვენი სოფლიდან
გორამდისინ ჩვიდმეტი ვერსი იყოვო. ეხლა მოვიდენ თქვე-
ნი „ზემლებრები“, გაზომესო და ოცდა ორი ვერსი გამოი-
ყვანესო. უკაცრავათ კი ვართო, მაგრამ ჩვენი თხოვნა იქ-
ნებაო, რომ ძველებურათვე გორსა და ჩვენ სოფელ შორის
ისევ ჩვიდმეტი ვერსი დარჩესო. და ხუთი ვერსი მოგვაშო-
რონო. ვინაიდან საწყალი ხალხი ვართო და ამოწყდა ამ-
დენი სიარულით გლეხობაო. შეგვიმოკლეთ გზაო და მე-
ტის არაფრის მთხოვნელი არა ვართო...

სიცილს სიცილი დაემატა. ვილაცამ „დუზიკო“ გახსნა.
(არაყი) ვილაცამ ამ საქმის მოწყობა უფრო ორგანიზაციუ-
ლად მოინდომა და ხუთმეტი წუთის შემდეგ კასიმ-ფაშაზე
დატვირთული ნავი სურსათითა და ლუდებით მოადგა
გემს.

კაიუტ — კამპანიაში გაჩაღდა სმა.

დღეს ყველანი ერთი ამბის შთაბეჭდილების ქვეშ იყვენ.
„ფანართან“ თუ „ე-იუბში“ იდგა ერთი დაქანგული გემი.
ამ გემზე მუშაობდა ქართველი ოფიცერი ჩხეიძე. შუა დღე-
ზე დასვენების დროს საცვლების ამარა და ფეხშიშველი,
ჩხეიძე გასულა ნაპირზე პაპიროსის საყიდლად. თათრები
შეჩაო დახარბებული არიან პიასტრებზე და როცა დაუნა-
ხავს მედუქნეს უცხოელი გატყაული მუშა — ხუთ პიას-
ტრიანი პაპიროსი შვიდ ნახევრად დაუფასებია. ჩხეიძეს.
როგორც თუთუნის მწევარს, ფასი სცოდნია. დაუწყვია
დაზგაზე ხუთი პიასტრი, აუღია პაპიროსი და გამობრუნე-
ბულა. მაგრამ ამ დროს თათარს უცბად ჩხეიძესთვის ხელი

წაუვლია და პაპიროსის წართმევა მოუნდომებია. უარზე დამდგარ ჩხეიძესათვის თათარს შემოუკრავს. შემოკვრაზე ჩხეიძეს ისე ჩაუფარებია, რომ თათარი გრძნობა დაკარგული ჩაკეცილა. ყვირილზე ადგილობრივი თათრები შემოკრებილან და ატეხილა საშინელი კრივი. ჩხეიძე გარედ გამოსულა; აკვრია ზურგით კედელს, ხელში დაუჭერია პატარა სკამი და მისდგომია თათრებს, მაგრამ ერთი კაცი ჭამაშიაც ბრალიაო იტყვიან. ხუთმეტოდე კაცი — ქვით, ჯოხით, მუშტით და ყოველი საშუალებით დასევია ჩხეიძეს. ჩხეიძე ვაჟკაცია და არ წამხდარა. სდგას თურმე კაკალი კაცი თავგამოდებული. გაკრავს ერთ-წააქცევს. მოვარდება მეორე. წაიქცევა მეორე — მესამე შემოუტევს. სცემია ვილაც ბიჭი, რომლისთვისაც ჩხეიძეს ისეთი წიხლი უკრავს, რომ ბიჭი იქვე უსულოდ დავარდნილა. თათრები ამას უფრო გადურევია და საქმე მისულა იქამდე, რომ ჩხეიძის უსიკვდილოდ გამოსვლა შეუძლებელი გამხდარა.

ჩხეიძეს დაუშავებია ათიოდე კაცი.

იქვე მდგარა ინგლისური პატრული, რომელიც თურმე თავიდან დასწრებია ამ სცენას. დიდს აღტაცებაში მოსულა ჩხეიძის ვაჟკაცობით, მაგრამ საშველად და მოსახმარებლად ხელიც არ გაუნძრია. მხოლოდ მაშინ, როდესაც ჩხეიძე თავგატეხილი ჩაკეცილა და თათრები მივარდნილან მოსაკლავად, — ინგლისელებს ერთი დაუსტვენიათ, თათრები იმ წუთშივე გაქცეულან და ბრძოლა შეწყვეტილა.

ცოცხალ-მკვდარი ჩხეიძე ინგლისელებს გონზე მოუყვანიათ, ჭრილობა შეუხვევიათ, ჩაუჯენიათ ნავში და მაგრად ჩამოურთმევიათ ხელი — ყოჩაღ, ბიჭო, ვაჟკაცი ყოფილხარო.

ეხლა ჩხეიძე, თურმე, სწევს და მეტად ცუდ მდგომარეობაში ყოფილა.

ყველა აღტაცებულია ჩხეიძის ვაჟკაცობით და იმით, რომ ხუთმეტ კაცს გაუძლო ერთმა კაცმა მთელი საათის განმავლობაში და „ქართველების სახელი არ შეარცხვინა“.

ლუდი ჩვენ კაცზე ნაკლებად მოქმედობს. და ლაპარაკსაც არა აქვს გადამთვრალი იერი „ვლადიმირის“ კაიუტ-კამპანიაში.

„სხვა საქართველო სად არის
რომელი კუთხე ქვეყნისა“...

გაიძახის მაღალი მეგრელი და ყოფილი დეპუტატი, ---
გაუმარჯოს საქართველოს!..

ყველანი ფეხზე დგება. იმღერიან „დიდებას“ და სვა-
მენ სადღეგრძელოს.

— რა ქვეყანა დავკარგეთ, ბიჭო, რა ქვეყანა, — ამ-
ბობს თმახუჭუჭა მენშევიკი, — რა ქვეყანა დავკარგეთ!..

ამ წამოძახილზე არავინ არათერს ამბობს და უნებ-
ლიეთ მდუმარება ჩამოვარდება სუფრაზე. ღია ილიუმი-
ნატორებიდან შემოდის შეგრილებული სიო და იქვე, გე-
მის ახლოს გაისმის „ფანარისაკენ“ მიმავალი „შერკეთის“
სირენა.

— გამხიარულდით ბიჭებო. აბა ერთი „მრავალჟამი-
ერი“ დასძახეთ ჩვენებურად. აბა-ჰე, — იძახის ტოლუმბა-
ში. და მრავალჟამიერი იწყება.

ეს აკლდა ამ გემს და ესეც გაიგონა.

— არა, ის როგორ იყო ამბობს ვეჭილი. ბერძნის დე-
კანოზი რომ გააცურა...

მე ვკითხულობ, თუ ვინ გააცურა ბერძნის დეკანოზი,
ან და რა ამბავია ეს.

თურმე ერთ ცნობილ თავადს სტამბოლში მოუკვდა
ცოლი. ცოლი გაასვენა მართლმადიდებელი ეკლესიის წე-
სით — ბერძნულ სასაფლაოზე. გასვენების შემდეგ შეწუ-
ხებული ქმარი ყოველდღე მიდიოდა ბერძნების საყდარში.
დაიხოქებდა და საათობით ლოცულობდა. მისმა სათნო-
ებამ მოინადირა ბერძენი დეკანოზის გული, რომელიც
განიმსჭვალა დაქვრივებული ქართველისადმი უღრმესი
და უსათნოესი პატივისცემით. თითქმის ერთი თვე გასტანა
საყდარში ლოცვა-მეტანიამ და შემდეგ დეკანოზსა და
მწუხარე კაცის შორის გაიმართა დიალოგი:

— მწუხარებასაც საზღვარი აქვს. შვილო ჩემო. — ამ-
ბობს დეკანოზი. გაიქარვე მწუხარება შენი. რამეთუ
შვილნი ვართ სოფლისა და მომაკვდავნი...

— მამაო ჩემო, მკლავს ფიქრი, რომ ჩემი საყვარელი
მეუღლე ცივ სამარეში სწევს და მალე მოვა სუსხიანი

ზამთარი. ქარი და წვიმა გაასწორებს მის საფლავს, წარი-
შლება ნიშნები ჩემი სიყვარულისა და ვინძლო — გაზაფ-
ხულზე ველარც კი მოვნახო იგი სხვა საფლავთა შორის.
ვწუხვარ. მამაო ჩემო, რომ ვერ დავადგი ღირსეული ძეგ-
ლი იმისა გამო, რომ ჩემმა რწმუნებულმა პარიზში ხელ-
საყრელად ვერ გაყიდა ჩემი ნავთის აქციები. როგორ უნდა
შევხვდე მე ჩემ საყვარელ მეუღლეს საიქიოს და რა პა-
სუხი უნდა გავსცე მას!..

— ნუ თუ მაგან შეგაწუხა, შვილო ჩემო. ყოველ
მართ-ლმორწმუნეს ეხმარება მართლ-მადიდებელი ეკლე-
სია და თქვენისთანა კეთილქრიატიანეს როგორ არ უნდა
შევუწყოთ ხელი გაჭირვებასა შინა? როგორ ფიქრობთ,
ხუთასი ღირა ღირსეულად დაამშვენებდა თქვენი საყვა-
რელი მეუღლის საფლავს?!

— რა მოგახსენოთ ღირსეულო მამაო... გამოცდილება
არ მაქვს ამისა, ხოლო ამ საქმეში, რასაკვირველია, თქვენი
გამოცდილება იშვიათია...

მართლმადიდებელმა ქრისტიანმა აიღო მართალი ხუთ-
ასი ღირა და უსამართლოდ დახარჯა იგი სტამბოლის
კაზინოსა და ტერაპიას აგარაკზე. —

ნაწილი კარტში და ნაწილი ღვინოში.

— შემოელია ღირები თავადიშვილს, — განაგრძობს
ძალალი მეგრელი, — და კაიხნის შიმშილობის შემდეგ...

— არა ერთი მითხარი, ვაწყვეტინებ მე, — დეკანოზი,
რა ქნა დეკანოზმა.

— დეკანოზმა ის ქნა, რომ ანათემას მისცა მართლ-
მორწმუნე თავადის ურწმუნო თავი და მოციქული მი-
უგზავნა მას. მაგრამ ამას მიუბრუნებ, რომ, როგორ გე-
კადრებათ... ან მე როგორ ვიკადრებ... დამაცადეთ... გა-
იყიდოს ჩემი აქციებიო.

აქციები დღემდე იყიდება, მაგრამ სადაა აქციები? რისი
აქციები — ჰაერია მხოლოდ. ჰო და, იმას ვამბობდი, კაი-
ხნის შიმშილობის შემდეგ გამოაქვეყნა ამერიკულ „ბრაზნი
გაზეტაში“ — თავისი სურათი და ბიოგრაფია. ვარ ასეთი

და ასეთი, მენავთე, მემამულე, ბოლშევიკებისგან დარბეულიო. ვფიქრობ ცოლის შერთვასო.

— მაქ შარშანაც ქე გააგზავნა მგონია, ამბობს ერთი,— მაგრამ პასუხი არ მოსულა.

— მოსულა, შენ წარმოიდგინე, მოსულა. ეს გუშინწინ სთქვეს პერაზე. თითონ ნესტორ ერისთავმა მითხრა. პასუხი მოსულა ვილაც ფილადელფიელ ქალისაგან. ქალიც ქვრივი ყოფილა, შეძლებული — მილლიონ დოლარამდე ამბობენ... დადის ახლა ჩვენი თავადი თურმე, დააქვს ეს პასუხი და აგროვებს ფულს ამერიკაში წასასვლელად. გაგამდიდრებთ ყველასო, ამბობს თურმე, ოღონდ ფილადელფიამდე ჩამაწევინეთო...

— შენ არ მომიკვდე, მაგან ამერიკამდე ვერ ჩააწიოს. აქვე შესჭამს ყველაფერს.

— არა, წავა.

— რას წავა. ვერსად ვერ წავა...

— თურმე ჩვენი ბიჭები პარიზსა და გერმანიაში სულ თავადისშვილობენ. კნიაზები ვართ, ლატიფუნდიების პატრონები ვიყავით და ბოლშევიკებს გამოვექეციეთო. სადაცაა მალე დავბრუნდებით და მაშინ ჩვენ ვიციეთო. და ზოგიერთი ქე გამორკვეულან მდიდარ ქალებში...

— დურაკები ყველგან მოიპოვება, მარა ამ ჩვენ ყბამოხეულს რო უქნია გუშინწინ — ის მართლა რო ჩასაწერი ამბავია, — მეუბნება წაბლის ფერა გამომძიებელი.

— უთხარი, უთხარი და მოათავე, სადღეგრძელო მოდის, — გაიძახის ტოლუმბაში.

რა მომხდარა?

ყოფილა ერთი კაცი. თუ როდისმე ამ წიგნს სტამბოლში ნამყოფი ვინმე წაიკითხავს, — ის მიხვდება ვინც არის იგი. ეს კაცი სარგებლობდა მრავალთა სიუხვითა და

შემწეობით. მას შედგენილი ჭონია იმ პირთა სია, ვისაც
ოდესმე რაიმე დახმარება აღმოუჩენია. მისთვის და რო-
დესაც თურმე, ამ სიაში აღინიშნა ასიოდე გვარი, — ამ
კაცმა წაიკითხა სია „ჩაიხანეში“, გაუსვა მას ქვევიდან
ლურჯი ხაზი და მიაწერა —

— ყველასი დედაც...

სია გააკრა იქვე კედელზე და ყველა გაათვრთხილა:
დედას გიტირებთ, ხელი არავინ ახლოთო.

(გაგრძელება შემდეგ ნომერში).

— : —

0 8 0 1 2 0 3

ბაჩანას ლექსები

მ უ ხ ა

1

მუხავ, მიყვარხარ ტიალო
გამარტოებით მდგომარე
ერთი შენ გნახე გულისა
ქვეყანა შემოვიარე..
დალონებული, მტირალი,
მიწავ, შენკენ ვარ მოარე.
მე მიყვარს შენი სიბერე
მუდმივი დაღრეჯილობა
დახავსებული ტოტები.
სიმტკიცე ფოთოლთ შლილობა.
შენ არ გაშინებს, ვაჟკაცო,
ბუნების ფერის ცვლილობა.
რაც უნდა ქარი შხიოდეს
და ელვა იკლაკნებოდეს,
მთაბარი ირეგვნებოდეს,
ხილ-ხული იხოშებოდეს,
ლერწამი მიწას ეკვროდეს,
შველი ტყეს ინაბებოდეს
ზარდაცემული ბწკალზედა
ვეფხვი კლდის ეშხით ღმუოდეს,
ამაყად ელი ავდარსა
ქარს არ უყადრებ თავსაო
ელვა და ჭექა ჭუხილი
ვერ შეგიხრიან წარბსაო

არ ივლებ ბაიბუადა
ხალხის უღმერთოდ ჭრასაო.
საფლავიც აუყვავდება
ვინაც გვაუწყა ცნებაო:
— კაცი იშობის ერთ დღესა
და ისევ ერთ დღეს კვდებაო.
კარგი ჭაბუკი სიკვდილსა
არროს არ შეუდრკებაო.

1884 წ.

ვუკლვნი ჩემი ძმის ვაჟა-ფშაველას ხსოვნას.

2

სიკვდილი აღარ მახსოვდა
წუხელ ძმა ვნახე მომრჩალი
ცხენით აფხუშოს მოვიდა
გამოვეგებე საწყალი.
ძალიან დაწუხებული,
როგორც მზისათვის დამზრალი
ხელი მოვხვიე, ვაკოცე
უნდა დამესვა მაშვრალი.
უეცრად გრიალი დადგა
ხალხით აივსო სახლკარი
ეძგერენ შესაპყრობადა
იმან მანიშნა: „დაჰკარი“.
— გაუშვით, თორემ თავზედა
დაგეცით სისხლის ავდარი
დავჭყვივლე გაცოფებულმა
ამოვიწადე ხანჯარი.
ძალს მე და ძალსა ისინი
გაგვიხდა ჯობნებაზედა
უცებ ყორანი მოფრინდა
ვაჟა შეისვა მხარზედა
და ცისა სივრცეში გაჰქრა

ერთის თვალისა წამზედა.
მაინც წამართვეს მაინცა
აუგ დამედვა თავზედა
ვერ მოვიხმარე ხანჯარი
სისხლი ამესხა ფხაზედა.
როსნამდე უნდა გიგონო
მიწა მიყრილი ტანზედა?
მუდამ მოუვალს გელოდო,
თვალი მეჭიროს გზაზედა.
ცხადათ და მალვით ვიტყრო,
გული ვაბჯინო ქვაზედა...

1915 წ.

— : —

საუბარი მიწასთან.

(კაპიტალისტურ ქვეყანას).

როდემდე უნდა
ზილო ცოდვები
შენ, დედამიწავ,
სივრცეში მსრბოლო:
სავსე ხარ სისხლით,
ცრემლით, გოდებით
და შხამიან წლებს
არ უჩანს ბოლო.
ქვეყანას შია,
იხრჩობა ბრაზით,
შენ კი სავსე გაქვს
პურიტ ბელლები;
ჰკეტავ ოქროებს
ფოლადის რაზით,
როს ჩვენ გროშისთვის
კლდეებს ვეხლებით.
მაგრამ შენ, მიწავ,
უბედურთ კვნესა
ისე მოგესმის,
როგორც ყრმას ნანა...
თოფისწამალთან
ტალსა რომ ჰკვესავ,
რომ აფეთქდება
არ იცი განა?!
მაგ შენს სივრცეზე

არაა კუთხე,
სადმე ყოველ წუთს
არ ჰქუხდეს ომი.
მიწავ! დაჰლექდი:
ტყვიებს აფურთხებ
და გელის ბედი
უთუოდ რომის!
ვერ ხედავ განა,
რომ არ გასვენებს
ნიაღვარები
და მიწის ძვრები?
მიწავ! შენ წყევლა
გადაგასვენებს
როცა დაგახრჩობს
ლეში და ძვლები!
რომ სერავ ჰაერს
ასე თავხედათ
და ისვრი დღეებს, —
ყოფის შავ ქულებს, —
ნუთუ სიზმარში
მაინც ვერ ხედავ
მილიონობით
დაფლეთილ გულებს?!
არ ვიცი, მიწავ,
შენ ყრუ ხარ მართლა,
თუ იხშობ სმენას
განგებ თითებით,
როცა სიკვდილი
ზარბაზნებს მართავს,
წინააღმდეგათ
რომ არ ინთები?
არ გვინდა ომი!
ჩვენ, შრომის შვილებს,
გვიყვარს შრომა და
შემოქმედება:
ახალ ქვეყანას

ელექტრო-ლილებს
ვაღლებთ და წინსვლის
ცეცხლი გვედება.
გვინდა მოვკვეთოთ
შხამის სათავე,
გვინდა ცხოვრება
ვაქციოთ თაფლათ,
რომ აღარ იყოს
მუდამ სადაო:
თავისუფლება,
სიტყვა და ტაბლა!
მაგრამ შენ, მიწავ,
მოცულო ნისლით,
არ გესმის, ალბათ,
ჩვენი სურვილი;
გახელებულხარ
და გინდა სისხლით,
რომ გაანელო
ნდომა წყურვილის...
მიწავ! მე შენი
გეზი მაოცებს:
სანამ შავ საქმით
თაღხავ დღეს მზიანს,
ნუთუ არ იცი,
რომ არ გაკოცებს
მგოსნის ალერსი
და პოეზია?!

20/XI — 27.

— : —

ციკლიდან: „მოსკოვი“.

შეხვედრები კ. ბალმონტთან მოსკოვში
და ლესნოი გოროდოკში.

მახსოვს რუსული ყანა და ქერი,
მოგყვები ბავში, როგორც ჯადოქარს.
შენ კი მისცურავ, როგორც ნამქერი
შენ როგორც ქრისტე მიყვები ამ ქარს.

Я был в России, грачи кричали,
Весна смеялась в мое лице..

და ნიავს მიაქვს ყვითელი ჩალა
იშლება შენი თმა თაფლის ფერი
და სტირის ყვავი... ყვავი ყვანჩალა
ლექსებით ასე რომ მოეფერე.

Я был в России, грачи кричали!

Грачи кричали: Зачем? Зачем?

შენთან ვიყავი... ყვავი სტიროდა.

რაზე სტიროდა მე ვიცი განა?

მეც ხომ მდულარე ცრემლი მდიოდა,
მაგონდებოდა ჩემი ქვეყანა.

მართლა დამწველი ცამეტი წელი
ვერ დამავიწყებს მაშინდელ ზაფხულს;

ამდენხანს ასე თუ გავუძელი
ამდენ სიყვარულს, ამდენ სიხარულს.

იმ ზაფხულს მოკვდა ვაჟა-ფშაველა,
მახსოვს ცრემლებით შენ ეს გითხარი.

ის სიკვდილის წინ ითხოვდა ბალახს,
გახელებული წყურვილით ხარი.

მას შემდეგ დამრჩა გრძნობა ასეთი,
რომ ერთად ორ მზეს თვალი შევასწრე,
მოხიბლული ვარ ამ სინაზეთი
და სიკვდილამდე დავრჩები ასე...
გავიარ ისევ „ძაღლის მოედანს“
და მივადგები ნიკოლას საყდარს.
კარზე დარეკვას ხელი ვერ ბედავს.
ამ სახლს ვუყურებ როგორც ნატახტარს:
აქ სცხოვრობს გრუშკა ჩვენი დეკანი,
აქ კრიაბინი ებრძოდა სიკვდილს.
მე რუსთაველის მომაქვს დედანი
და შუბლზე ცივი ოფლი გადმომდის.
გვიკითხავ მთვარის, თაფლის, მზის ლექსებს
და თეთრი თოვლით სავსეა ქუჩა.
მშობელი მიწის ვიყნოსავ ფესვებს,
ჩემ ზამთრის სულში ჰყვავის ალუჩა.
თითქო ჩათვლიმა ბალტრუშაიტისს,
ვოლოშინს ჰშვენის ლომის ფათარი.
და რუსთაველის მგზნებარე შაირსს
ზამთრის სინაზე გადაეფარა.

* *

*

ფუტურისტები მაშინაც ისე
ლაზღანდარობდენ ყვითელ კოქტებში.
ჩვენ ძველი დავრჩა მაინც სინდისი
და სიყვარულით გულში მოვკვდებით...

16 — 11 — 926 წ.

ტფილისი.

ვალერიან გაფრინდაშვილი.

შემოდგომა.

(კარმენსიტას წარმოდგენის შემდეგ).

დამჭკნარ ფოთლების ბუტაფორია
მაგონებს სცენას სპექტაკლის შემდეგ.
და მსახიობი მაინც ორია:

კაცი და ქალი — მტერები დღემდე.

ბალი არ არის მთლად გაძარცული.

ცივი ქარების ჰქრის ირონია.

ო, დაივიწყოს გულმა წარსული,

თუ ის ამაოდ მოსაგონია!

ჩვენ გაზაფხული გვიყვარდა ყველას,

ყველამ ვიგემეთ მისი სხეული.

ალარ გვიქადის სუსხისგან შველას

ეს გარდამოხსნა ცრემლმორეული.

კრთიან ტოტები დასალეწავი.

შოდის ზამთარი დონ-ხოზეს დანით.

ეს შემოდგომა არის მეძავი

ბედშავ კარმენის დაფლეთილ ტანით!

— : —

ილა მოსაშვილი.

უცნობთან.

ბაგე სისხლივით შეღებილი, წარბი ნამგალი.
თხელი ხალათი და თვალებში ქურდი ცდუნება.
ხელში თითების დასვენება და დადუნება...
შემხვედები ხშირად პირზე ღიმილს ქუჩის ანგალი.

როს სანათურებს მოერევა კროტომა, კანკალი,
ჩაივლი კაფეს შესახვევთან ცივი, უნებო.
გინდა შეხვიდე, გინდა კარის დაკაკუნება,
მაგრამ გრცხვენიან, რას იტყვიან კაცი, ან ქალი?..

მიგიპატიჟე მაგიდასთან, ვიყავი მარტო.
კეთილი იყოს ეს გაცნობა, ორივე ღოთის...
მინდა ანთებულს შეგეჯიბრო, მინდა გაგართო!..
მსახური ქალი ჭიქებს გვივსებს „ნაფარეული“-თ...
გულში სისხლია, ტანში მარტის ავდარი მოდის
და როგორც ვერხვი ალაზნისა თრთის ეგ სხეული...

1922 წ.

საფო მგელაძე.

*

* *

მყავდა ბაბუა, მედლები ჰქონდა
ზოგი პატარა, ზოგი მოდილო,
და ხშირად სტუმრებს ის უამბობდა
რა დროს რა ომში მიიღო ჯილდო.

მე ვიჯექ ჩუმად დედოფალასთან,
მაგრამ იმათკენ მეჭირა ყური,
ვფიქრობდი: რატომ გახვრიტეს ფარა,
ნუთუ არ სჯობდა ეყიდათ პური?!

*

* *

შორიდან შენ ჩემს ღიმილებს ზვერავე,
თუმც ეს ნაძვნარი უღრანი ტყეა,
და ჩემმა ცივმა სასტიკმა მზერამ
შენ დაგჭრა, როგორც ფოლადის ტყვიამ.

დაჭრილი გული მკერდით მიგქონდა,
იყო ნაღველი ხმალივით მკვეთრი,
და იმ ყვავილებს, ხელში რომ მქონდა,
დაეცა ცრემლი ბროლივით თეთრი.

სულის სიმაღლე რამ დაგიკარგა,
როს გარეგნულად ამგვარად ჰმვენნი?
რატომ არა ხარ ისეთი კარგი,
რომ სიყვარული შემეძლოს შენი?!

— : —

ნასაკირალის სერები.

თენგიზ ჟღენტს.

გაღმა-გამოღმა ტევრები,
გადაკეცილი შარები.
გულები-ნასატევრები,
გულები-უშიშარები.

მტრის კვალზე გადასაფრული,
როგორც გაჭრილი ფირალი.
უცნაური და ზღაპრული —
მრისხანე ნასაკირალი.

ჩამოდენილი სერებით
მესაიდუმლე ზრახვისა,
ვაჟკაცთა სისხლის ჩქერებით
ნაღები-წყალი ბახვისა.

აჯანყებულთა რაზმები,
სოფლები დარაზმულები.
ბრძოლაში ნახვარაზმევი,
ბრძოლაში ხვარაზმულები.

დღესაც კი, როგორც ფერია
იკაზმებიან შქერები:
მარსელიოზას მღერია
ნასაკირალის სერები.

— : —